

Nihánj me se-nānā Jesucristó nana sa' cachrón síí cu'naj Juan rihaan yanj a

Nana nihánj taj xna'anj se vaa guun yuvii man se-nānā Diose a

¹ Asij ataa qui'yaj Diose chumii, ne aj vaa se-nānā Diose, ne se-nānā Diose ro', canicun' so' rihaan ma'an Diose, ne Diose me so' a. ² Dan me se asij ataa qui'yaj Diose chumii, ne canicun' se-nānā Diose rihaan Diose, ³ ne ca'ne' Diose suun rihaan so' qui'yaj so' nu' rasuun a. Ne sese taj se-nānā Diose, ne taj vaj a doj rasuun mán nihánj cuano ne guun ma'. ⁴ So' me síí qui'yaj cunuu i'na' rasuun, ne che'é se cunuu i'na' yuvii qui'yaj so', che'é dan guun nucuaj yuvii xcaj yuvii cuentá a. Dan me se ase vaa ya'an chuguun vaa so' rihaan yuvii, ⁵ ne qui'yaj so' chuguun rej rmi' rej man ní' sij man rihaan chumii nihánj sij ataa xcaj cuentá, ne ne qui'yaj canaán rej rmi' yo' rihaan so' a man adonj.

⁶ Ne curihanj yo'o snó'o, ne dan me se síí ca'née Diose me so', ne Juan cu'naj so', ⁷ ne ca'na' so' cataj xna'anj so' che'é ya'an chuguun yo', ne me rá so' cuchuman rá cunudanj yuvii ni'yaj nij yuvii man ya'an chuguun yo' a. ⁸ Nuveé ma'an so' me ya'an chuguun yo'; maan se ca'na' so' cataj xna'anj so' che'é ya'an chuguun yo' a.

⁹ Ne ya'an chuguun ya yo' ro', yo' me síí 'yaj chuguun rihaan cunudanj yuvii, che'é rej guun nucuaj nij yuvii xcaj nij yuvii cuentá a. Ne ca'na' so' rihaan chumii nihánj, ¹⁰ ne cayáán so' rihaan chumii nihánj, ne ma'an so' me síí qui'yaj chumii nihánj, qui'yaj Diose, tzaj ne ne xcaj nij síí man rihaan chumii nihánj cuentá me síí me so' a ma'.

¹¹ Ndaa rihaan ma'an nij tuvi' so' cuchi' so', tzaj ne ne ca'mii sa' nij so' ga so' a ma'. ¹² Tzaj ne xa' taran' nij síí

ca'mii sa' ga so', tzaj ne sí amán rá ni'yaj man so' me nij so', ne danj nanj rqué so' guun nij so' ta'níí ma'an ya Diose a. ¹³ Ne nij sí guun ta'nij Diose man, tzaj ne nuveé che'e se nayón nij so' rque nii nij so' me guun ta'nij Diose man nij so' ma'. Ne nuveé che'e se guun rá ma'an rej nij so' nayón nij so' rque nii nij so' me guun ta'nij Diose man nij so' ma'. Nuveé che'e se guun rá rej nij so' ca'ngaa nij so' me guun ta'nij Diose man nij so' ma'. Maan se ma'an Diose me sí qui'yaj guun ta'nij Diose man nij so' adonj.

¹⁴ Gaa ne guun se-nana Diose yo' yuvii, ne cayáan so' ga ní', ne quene'en núj se vaa ve'é inanj qui'yaj so', ne dan me se taj vaj yo'ó ta'níí Rej so' Diose ma'. Tananj orún' so' me sí qui'yaj ndaa vaa qui'yaj so', ne se luj ndo'o qui'yaj so' che'é ní', ne inanj nana ya ca'mii so' adonj.

¹⁵ Ne sí cu'naj Juan me sí cataj xna'anj rihaan yuvii che'é Jesucristó, ne nucuaj ca'mii so', cataj so':

—Síí nihánj ro', aj cataj xna'anj 'unj rihaan soj che'é so' gaa rqué á. Dan me se cataj xna'anj 'unj rihaan soj se vaa nda' se sí ca'na' rej rihanj me so', tzaj ne 'o se sij uun chij ndo'o doj me so' rihanj nanj á. 'O se asij ataa ca'ngaa 'unj, ne aj nicun' so' nanj adonj —taj sí cu'naj Juan yo' a.

¹⁶ Danj ca'mii sí cu'naj Juan che'é se Jesucristó me sí nicaj nu' rasuun sa', ne so' me sí rqué se sa' man taran' ní', ne dan me se nuveé orún' se luj 'yaj so' che'é ní' ma'. 'O se que'ee se luj 'yaj so' che'é ní' adonj. ¹⁷ 'O se rqué Diose se-tucuanj Moisés rihaan xii ní' gaa naá, tzaj ne Jesucristó me sí tacuachén nana luj do', nana ya do', rihaan ní' a. ¹⁸ Ne xa' Diose, tzaj ne taj vaj a doj sí ne'en rihaan man Diose ma'. Tzaj ne xa' Jesucristó, tzaj ne orún' so' me ta'níí Diose, ne nicun' so' rihaan Diose, ne so' me sí tihaan rihaan ní' daj vaa Diose adonj.

Nihánj me se-nana sí cu'naj Juan síí cuta' ne man yuvii a

¹⁹ Ne nij síi uun hij rihaan nij yuvii israelitá síi man chuman' Jerusalén me se ca'néé nij so' man xrej do', man doj tuvi' síi cu'naj Leví síi cayáán gaa naá do', se vaa ca'anj nij so' xna'anj nij so' man síi cu'naj Juan me síi me Juan a. Dan me se ca'anj nij so' xná'anj nij so' man Juan, gaa ne Juan yo' ro', ca'mii so' nana nihánj rihaan nij so' a. ²⁰ Dan me se yo'o cataj xna'anj síi cu'naj Juan rihaan nij so' daj sij me so', ne ne ca'mii ne so' ma'. 'O se ca'mii ya so', cataj so':

—Nuveé sij ca'néé Diose tinanii man yuvii rihaan sayuun mé 'unj ma' —taj síi cu'naj Juan yo' a.

²¹ Gaa ne xná'anj uún nij so' man so', cataj nij so':

—Che'é dan me síi mé so' ga. Síi cu'naj Elías síi nata' se-nana Diose gaa naá mé so' na' —taj uún nij so', xná'anj nij so' man Juan a.

—Taj ma'. Nuveé so' mé 'unj ma' —taj uún síi cu'naj Juan yo' a.

—Ne'en núj se vaa vaa güiii ca'na' yo'o síi nata' se-nana Diose, ne sij nata' yo' mé so' na' —taj uún nij so', xná'anj nij so' man Juan a.

—Taj ma' —taj síi cu'naj Juan yo' a.

²² Che'é dan cataj nij so':

—Tzaj ne cataj yá so' me sij mé so', gaa ne ca'vee cataj xna'anj núj rihaan nij síi ca'néé man núj ca'na' núj daj sij mé so' a. Me sij mé so' ga. Daj vaa yo', rá so' ga —taj uún nij so', xná'anj nij so' man Juan a.

²³ Ne cataj síi cu'naj Juan:

—Síi cu'naj Isaías síi nata' se-nana Diose gaa naá ro', cataj xna'anj so' che'é suun 'yaj sunj a. Dan me se 'unj me síi nucuaj ndo'o a'mii rej tacaan, ne taj 'unj rihaan yuvii se vaa nuchran' nimán yuvii, ne ve'é ca'mii nij yuvii ga síi 'nij ra'a man ní' asa' ca'na' so' a —taj síi cu'naj Juan yo' a.

²⁴ Ne ta'aj nij sí ca'na' rihaan sí cu'naj Juan me sí fariseo, ²⁵ ne cataj nij so' rihaan sí cu'naj Juan a:

—Dan me se nuveé sij ca'néé Diose tinanii man yuvii rihaan sayuun mé so' ma'. Nuveé sij cu'naj Elías mé so' ma'. Nuveé sij nata' se-nana Diose yo' mé so' ma'. Che'é dan ne nó xcuún so' cuta' ne so' man yuvii —taj nij sí fariseo yo' rihaan sí cu'naj Juan a.

²⁶ Ne cataj xna'anj sí cu'naj Juan rihaan nij so', cataj so':

—'Unj me sí uta' ne uun man yuvii a. Tzaj ne vaa yo'ó sí nicun' sca'núj soj, ne ne ne'en soj man so' ma'. ²⁷ Ne so' me sí 'na' rej xcoj, ne sij sa' uxrá doj me so' rihanj, ne daj chihaa mίj se quisij raj quirij canj 'nij tacóo so' ma' —taj sí cu'naj Juan rihaan nij sí fariseo yo' a.

²⁸ Danj guun rej Betania rej rnej tu'va chráa cu'naj Jordán, rej vaj sí cu'naj Juan gaa cuta' ne so' man yuvii a.

²⁹ Dan me se yo'ó güiii, ne quene'en sí cu'naj Juan se vaa ca'na' Jesucristó rihaan so', ne cataj so':

—Ni'lyaj soj ei. Ase vaa matzinj caví' rihaan Diose vaa sí nihánj, ne dan me se sí nihánj me sí ca'nee cacun' tumé yuvii man rihaan chumii nihánj, ³⁰ ne sí nihánj ro', cataj xna'anj 'unj rihaan soj che'é so' gaa rque, ne cataj 'unj se vaa ca'vee se sij 'na' rej xcoj me so', tzaj ne sij uun chij doj rihaan 'unj me so' a. 'O se asij ataa ca'ngaa 'unj, ne aj nicun' so' nanj adonj. ³¹ Dan me se gaa rque ro', ne quene'en ma'anj sese sij nihánj me so' ma'. Tzaj ne maan che'é se me rá 'unj quene'en nij yuvii israelitá man so' ro', che'é dan ca'ná' 'unj, ne che'é dan cuta' ne 'unj man yuvii nanj á —taj sí cu'naj Juan yo' a.

³² Gaa ne cataj xna'anj ya sí cu'naj Juan che'é se vaa quene'en ma'an so', cataj so':

—Quene'én 'unj se vaa nanij Nimán Diose rej xta', ne ase vaa 'o cha'aan vaa Nimán Diose yo', ne ca'na' yo',

quitáa yo' raꞗ Jesucristó ei. ³³ Gaa ne nu' xcaj 'un̄j cuentá se vaa ma'an so' me sí ca'néé Diose á. 'O se sí ca'néé mán 'un̄j cuta' ne 'un̄j man yuvii me se ma'an so' cataj rihaan 'un̄j se vaa sese quene'én 'un̄j nanij Nimán Diose raꞗ yo'o so', ne sese quitaj Nimán Diose yo' raꞗ so', ne so' me sí ca'néé Diose, ne çayáan uxrá Nimán Diose ga yuvii, qui'yaj so' a, taj sí ca'néé manj adonj. ³⁴ Gaa ne quene'en ma'an 'un̄j man Jesucristó nihánj, se vaa nanij Nimán Diose raꞗ so', ne aj cataj yá 'un̄j rihaan soj se vaa ta'nij Diose me so' ei —taj sí cu'naj Juan yo' a.

Nana nihánj taj xna'anj se vaa guun che'e va'nuj nij snó'o canoco' nij so' man Jesucristó a

³⁵ Güii a'yuj me se canicun' uún sí cu'naj Juan ga vij tuvi' nij sí tucu'yón se-nana so' a. ³⁶ Ne ni'yaj uxrá sí cu'naj Juan man Jesucristó ga chéé Jesucristó, ne cataj sí cu'naj Juan:

—Ni'yaj roj soj ei. Ase vaa matzinj cavi' rihaan Diose vaa sí nihánj á —taj sí cu'naj Juan a.

³⁷ Dan me se cuno roj sí tucu'yón se-nana Juan nana ca'mii so', ne canoco' roj so' man Jesucristó a. ³⁸ Gaa ne canicaj Jesucristó, ne quene'en so' se vaa canoco' roj so' man so', ne cataj Jesucristó rihaan roj so' a:

—Vaa se achiin man roj soj na' —taj Jesucristó, xná'anj Jesucristó man roj so' a.

Gaa ne xná'anj roj so', cataj roj so':

—Me rej né so', rabbí —cataj roj so', xná'anj roj so' man Jesucristó, ne nana “rabbí” yo' taj “maestró” a.

³⁹ Gaa ne cataj Jesucristó rihaan roj so' a:

—Ca'anj ní', ne quene'en soj á —taj Jesucristó a.

Che'é dan me ca'anj roj so', ne quene'en roj so' rej ne Jesucristó, ne cunuû roj so' tucua' so' cunu' güii yo' a. Dan me se aga' ca'anj rej anoco' güii me orá ca'mii roj so' ga Jesucristó a.

⁴⁰ Dan me se yo'ᵒ tuvi' roj síi cuno nana ca'mii síi cu'naj Juan ne canoco' man Jesucristó ro', me síi cu'naj Andrés, ne tinúú síi cu'naj Simón Pedró me uún so' a. ⁴¹ Asino yaan nari' síi cu'naj Andrés man tinúú so' síi cu'naj Simón, ne cataj so' rihaan tinúú so':

—Nari' núj man Mesías ei —taj so' rihaan tinúú so' a. Ne nana “Mesías” taj “síi ca'née Diose tinanii man yuvii rihaan sayuun” a.

⁴² Ne ca'anj nicaj so' man tinúú so' rihaan Jesucristó, gaa ne ni'yaj uxrá Jesucristó man síi cu'naj Simón yo', ne cataj so':

—Síi cu'naj Simón mé so', ne ta'níi síi cu'naj Juan mé so' á. Tzaj ne ndaa yaj, ne Cefas cu'naj so' á —taj Jesucristó rihaan so' a. Ne nana “Cefas” ro', xna'ánj hebreo me yo', ne 'ᵒ cyaan vaa yo' ga nana “Pedró”, ne taj yo' se vaa ase vaa 'ᵒ yuvej vaa síi cu'naj Pedró, ne sca' nimán so' a.

Nana nihánj taj xna'anj se vaa canacúún Jesucristó man síi cu'naj Felipé do', man síi cu'naj Natanael do', se vaa canoco' roj so' man so' a

⁴³ Dan me se yo'ó güii uún me rá Jesucristó cavii so' ca'anj so' estadó Galilea, ne nari' Jesucristó man síi cu'naj Felipé, ne dan me se cataj Jesucristó rihaan so' a:

—Canocó' so' manj, ca'anj ní' á —taj Jesucristó rihaan so' a.

⁴⁴ Ne Felipé ro', me síi ne chuman' Betsaida, ne Betsaida me chiháán síi cu'naj Andrés do', síi cu'naj Pedró do', uún a. ⁴⁵ Veé dan, ne nari' síi cu'naj Felipé yo' man síi cu'naj Natanael, ne cataj so':

—Aj nari' núj man síi ca'née Diose tinanii man yuvii rihaan sayuun, ne dan me se síi ca'mii Moisés che'é gaa cuchruj so' se-tucuanj so' me so', ne nij síi nata' se-nana Diose gaa naá ro', nata' uún nij so' che'é so' nanj adonj.

Ne dan me se Jesús ta'níí síí cu'naj José, síí ne chuman' Nazaret me so' ei —taj Felipé rihaan Natanael yo' a.

⁴⁶ Ne cataj Natanael yo':

—Taj vaj síí sa' avii chuman' Nazaret ma' —taj Natanael yo' a.

Ne cataj Felipé:

—Ca'anj ní, quene'én so' man so', sese me rá so' á —taj Felipé rihaan so' a.

⁴⁷ Veé dan, ne quene'en Jesucristó se vaa ca'na' Natanael rihaan so', ne ca'mii so' 'o nana che'é Natanael, cataj so':

—Ni'yaj soj ei. Ya sij israelitá me síí 'na' cuano ei. Nicá a'mii so', ne a'mii so' nana tiha' yu'unj ma' —taj Jesucristó ni'yaj so' man Natanael yo' a.

⁴⁸ Gaa ne xná'anj Natanael yo' man Jesucristó, cataj so':

—Asa' a'vee ne'én so' manj ga —taj so', xná'anj so' man Jesucristó a.

Ne cataj Jesucristó:

—Asij ataa ca'mii Felipé rihaan so' do', asij cayáán so' tacóó chruun man chruj higó raá do', ne aj quene'én 'unj mán so' ei —taj Jesucristó rihaan so' a.

⁴⁹ Gaa ne cataj Natanael:

—Ta'nij Diose mé so', maestro. Sij nicaj suun rey uun chij rihaan ní sij israelitá mé so' á —taj Natanael a.

⁵⁰ Gaa ne cataj Jesucristó rihaan so':

—Che'é se cataj 'unj rihaan so' se vaa quene'én 'unj mán so' gaa cayáán so' tacóó chruun man chruj higó ro', maan che'é dan amán rá so' ni'yaj so' manj na'. Tzaj ne quene'én so' que'ee doj rasuun nocoo doj uún a á. ⁵¹ Ya ya cataj xna'anj 'unj rihaan nij soj cuano se vaa quene'en soj naxra' rej xta', ne quene'en soj man nij se-mozó Diose, ne cavii nij so' xta', ne nanij uún nij so' rihaan 'unj sij ca'néé

Diose nicaj yu'unj man yuvij adonj —taj Jesucristó rihaan taran' nij so' a.

2

Nana nihánj taj xna'anj se vaa naqui'yaj Jesucristó na vinó man na un gaa canuû cha'anj nara'aa chuman' Caná a

¹ Cachén yavíj güii, gaa ne canuû cha'anj nara'aa chuman' Caná chuman' naj estadó Galilea, ne ca'anj nii Jesucristó cha'anj yo' a. ² Dan me se nacúún nii man Jesucristó do', man nij sí tucu'yón se-nana so' do', ca'na' nij so' cha'anj yo' a. ³ Veé dan, ne navij na vinó man nij sí navij rá cha'anj yo', ne che'é dan cataj nii Jesucristó rihaan Jesucristó a:

—Taj vaj na vinó rihaan nij sí navij rá cha'anj ma' —taj no' a.

⁴ Gaa ne cataj Jesucristó rihaan nii so' a:

—Taj che'é ca'mii so' danj rihanj ma'. Ni'yaj so', ne ataa quisij güii qui'yáj suun sa' nocoo á —taj so' no nii so' a.

⁵ Gaa ne cataj xna'anj nii Jesucristó rihaan nij mozó a:

—Cuno nij soj nu' se vaa cataj xna'anj ta'níj rihaan soj, ne qui'yaj soj nu' se vaa cataj so' á —taj no' rihaan nij mozó a.

⁶ Veé dan, ne ne vatan' xruj yahij xij a. Xruj nicaj ca'anj chihaa litró na me xruj yo', ne xruj araa nij yuvij israelitá na rásuun nij so' na'ya' nij so' ndaa vaa taj se-tucuanj Moisés me xruj yo' a. ⁷ Ne ca'ne' Jesucristó suun rihaan nij mozó, cataj so':

—Caraa soj na rque nij xruj yahij yo' á —taj so' rihaan nij mozó yo' a.

Gaa ne caraa nij mozó na, ne yo'o caraa ndaa tu'va xruj yo', qui'yaj nij so' a. ⁸ Gaa ne cataj xna'anj uún Jesucristó rihaan nij mozó yo', cataj so':

—Yaj ro', quirií soj doj na nuu rque xruj, ne ca'anj nicaj soj na yo' rihaan síi uun chij rihaan nij mozó anicaj co'oo rihaan nij yuvii á —taj Jesucristó a.

Ne danj qui'yaj nij so' a.

⁹ Veé dan, ne síi uun chij rihaan nij mozó anicaj co'oo rihaan yuvii me se co'o so' doj tzin' na yo', tzaj ne nuveé na uun me yo' a ma'. Nu' guun na yo' na vinó nanj adonj. Ne ne quene'en so' me rej cavii na vinó yo' a ma'. 'O se maan inanj nij mozó quirií na yo' rque xruj ro', orún' nij so' me síi quene'en me rej cavii na yo' a. Veé dan, ne nacúún síi uun chij yo' man síi nara'aa ca'na' síi nara'aa rihaan so',
¹⁰ ne cataj so':

—Tucuáán 'yaj ní' ro', me se nanj vaa yo' nanj á. Asino yaan go' ní' na vinó sa' doj co'o nij síi tihaj 'na' cha'anj, gaa ne ndaa quisíj guun xno yuvii asuun, gaa ne go' ní' na vinó nij doj co'o nij so' a. Tzaj ne so' me se ino qui'yáá so' chuguanj. Dan me se ndaa yaj quirií so' na vinó sa' doj yo' asanj —taj síi uun chij yo' rihaan síi nara'aa yo' a.

¹¹ Nihánj me se guun che'e Jesucristó qui'yaj Jesucristó suun sa' nocoo, ne nu' nihánj me se vaa qui'yaj so' chuman' Caná chuman' naj estadó Galilea a. Che'é dan xcaj nij yuvii cuentá se vaa sij sa' uxrá me so', qui'yaj so', ne cuchumán rá nij síi tucu'yón se-nana so' ni'yaj nij so' man so' a.

¹² Gaa quisíj canuû cha'anj nara'aa yo', gaa ne ca'anj Jesucristó do', nii so' do', nij tinúú so' do', nij síi tucu'yón se-nana so' do', chuman' Capernaum, ne doj güii cayáán nij so' chuman' yo' a.

Nana nihánj taj xna'anj daj qui'yaj Jesucristó gaa quirií so' man síi chi'ii rá nuvií nocoo a

¹³ Dan me se ataa doj quisij cha'anj pascuá cha'anj navij rá nij yuvii israelitá, gaa ne cavii Jesucristó ca'anj so' chuman' Jerusalén a. ¹⁴ Gaa ne rá nuvií nocoo ro', naj 'o

yu'vee nocoo 'yaj nij yuvii israelitá, ne maan dan man nij so' tu'vej nij so' scuj do', matzinj do', cha'aan do' a. Ne vaa síi ne rihaan chruun mesá, ne síi natuná sa'anj che'é yuvii atúj rque nuvíi me nij so' a. ¹⁵ Gaa ne nicaj Jesucristó ne', qui'yaj so' cuartá, go' so' man nij síi tu'vej xcuu do', man nij síi natuná sa'anj do', ne quirii so' xe' man taran' nij so' a. Ne rano so' man nij scuj do', man nij matzinj do', quirii so' xe' a. Ne ticha'nuu so' se-sa'anj síi natuná sa'anj rihaan yo'óo, ne tinaxru' so' nij chruun mesá a. ¹⁶ Gaa ne cataj so' rihaan nij síi tu'vej cha'aan a:

—Quirii soj rasuun nihánj xe' cuaj ei. Se guun qui'yaj soj yu'vee tucua Réj ma' —taj so' rihaan nij síi tu'vej cha'aan man rá nuvíi yo' a.

¹⁷ Gaa ne ninuj rá nij síi tucu'yón se-nana Jesucristó se vaa nó nana nihánj rihaan danj Diose a: “Che'é se 'ee ndo'o raj ve' tucua so', che'é dan ca'née nimanj qui'yaj sunj che'é yo' a”. Yo' me nana nó rihaan danj Diose a.

Nana nihánj taj xna'anj se vaa ca'mii Jesucristó che'é güii cunuu i'na' uún so' a

¹⁸ Quene'en nij síi uun chij rihaan nij yuvii israelitá se vaa qui'yaj Jesucristó rá nuvíi yo', gaa ne che'é dan cataj nij so' rihaan Jesucristó a:

—Ne nó xcúun so' quirii so' man síi tu'vej xcuu man rá nuvíi nocoo, rá núj ma'. Maan se qui'yáa so' 'o suun sa' nocoo quene'en núj, gaa ne guun ya rá núj se vaa no xcúun so' qui'yáa so' danj ei —taj nij so' rihaan Jesucristó a.

¹⁹ Ne cataj Jesucristó rihaan nij so' a:

—Tiri' soj man nuvíi nihánj, ne rque va'nuj güii, ne cunuu sa' uún nuvíi nihánj, qui'yáj ei —taj Jesucristó a.

²⁰ Che'é dan cataj nij síi uun chij yo' rihaan Jesucristó a:

—Vij chihaa vatan' ya yo' qui'yaj suun nij síi cune' nuvíi nihánj, tzaj ne asa' ca'vee naqui'yaj sa' so' nuvíi nihánj

rque va'nuj güiii, rá so' ga —taj nij so' rihaan Jesucristó a.

²¹ Tzaj ne ne ca'mii Jesucristó che'é maan nuvií nocoo yo' ma'. Maan se ca'mii so' che'é ma'an yan cunuu i'na' uún so' rque va'nuj güiii a. ²² Che'é dan, gaa quisíj cavi' so' ne cunuu i'na' uún so', gaa ne nanuj rá nij síi tucu'yón se-nana so' nana nihánj nana aj ca'mii so', ne cuchumán rá nij so' nana no rihaan danj Diose nana taj xna'anj daj quiran' síi ca'nej Diose tinanii man yuvii rihaan sayuun, ne cuchumán rá nij so' nana ca'mii ma'an Jesucristó uún a.

Nana nihánj taj xna'anj se vaa ne'en Jesucristó daj vaa nimán yuvii a

²³ Dan me se nu' nihánj qui'yaj Jesucristó chuman' Jerusalén gaa canuú cha'anj pascuá, ne che'é dan que'ee ndo'o nij yuvii cuchumán rá se vaa sij ca'née Diose me so' a. 'Q se quene'en nij yuvii nij suun sa' nocoo qui'yaj suun so' a. ²⁴ Tzaj ne ma'an Jesucristó, ne gaa nucuaj rá so' man nij yuvii yo' ma'. 'Q se so' me síi ne'en cunudanj, ²⁵ ne ne cachiin yo'o síi cataj xna'anj rihaan Jesucristó daj vaa nimán yuvii ma'. 'Q se ma'an so' me síi quene'en daj vaa nimán nu' nij yuvii adonj.

3

Nana nihánj taj xna'anj daj ca'mii Jesucristó ga síi cu'naj Nicodemo a

¹ Dan me se vaa yo'o síi fariseo cu'naj Nicodemo, ne síi uun chij rihaan nij yuvii israelitá me so' a. ² Dan me se rej nii ca'na' so' rihaan Jesucristó, ne cataj so':

—Ne'en núj se vaa sij ca'née Diose tucu'yón man yuvii mé so', maestro. 'Q se sese nuvi' Diose racuíj mán so', ne ne guun nucuáá so' qui'yáá so' ndaa vaa 'yáá so' nihánj cuano asuun ma' —taj so' rihaan Jesucristó a.

³ Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa síi se ca'ngaa naca uún ro', daj chihaa mǐj se guun nucaj so' quene'en so' man Diose asa' guun chij Diose rihaan chumii nihánj a ma' —taj Jesucristó rihaan so' a.

⁴ Dan me se xná'anj síi cu'naj Nicodemo man Jesucristó, cataj so':

—Asa' ca'vee ca'ngaa uún 'o síi aj cachij ga. Ca'vee xa' catuu uún so' rque nii so' ne ca'ngaa naca uún so' gaa a na' —taj Nicodemo, xná'anj so' man Jesucristó a.

⁵ Gaa ne cataj uún Jesucristó:

—Ya ya cataj xna'anj 'unj rihaan so' se vaa sese se ca'ngaa yo'o so' qui'yaj na ne qui'yaj Nimán Diose, ne se guun nucaj so' catuu so' rihaan Diose asa' guun chij Diose rihaan chumii nihánj ma'. ⁶ 'O se sese nanj yuvii qui'yaj ca'ngaa ní', ne nanj yuvii man rihaan chumii nihánj me ní', tzaj ne sese ca'ngaa ní' qui'yaj Nimán Diose, ne ase vaa sa' Nimán Diose ro', danj gaa sa' nimán ní' nanj adonj. ⁷ Se caráya'anj tihá' so' se vaa cataj 'unj rihaan so' ma'. 'O se no xcúún nij soj ca'ngaa ya uún nij soj adonj. ⁸ Dan me se xcaj so' cuenta ni'yaj so' nana a. Avii nana yo', ne cayuj 'yaj yo', tzaj ne ne ne'én so' me rej avii yo' 'na' yo', ne ne ne'én so' me rej ca'anj yo' ma'. Ne ase vaa nana ro', danj vaa Nimán Diose, ne dan me se sese cunuu sa' nimán yo'o so' qui'yaj Nimán Diose, ne taj ne'én' asa' ca'vee cunuu sa' nimán so' qui'yaj Nimán Diose ma' —taj Jesucristó rihaan síi cu'naj Nicodemo yo' a.

⁹ Veé dan, ne xná'anj síi cu'naj Nicodemo, cataj so':

—Asa' ca'vee qui'yaj yuvii danj ga —taj so', xná'anj so' a.

¹⁰ Gaa ne xná'anj uún Jesucristó man so', cataj Jesucristó:

—'Q se me che'é sij uun chij sij tucu'yón se-nanā Diose rihaan nij yuvii israelitá mé so', tzaj ne ne ne'éen so' nana nihánj nana cataj 'unj rihaan so' ga. ¹¹ Ya ya cataj xna'anj 'unj rihaan so' se vaa xa' núj, tzaj ne che'é inanj se vaa ne'en núj a'mii núj ne che'é se vaa quene'en núj nata' núj adonj. Tzaj ne ne amán rá nij soj nana a'mii núj ma'. ¹² Dan me se nanj che'é rasuun man rihaan chumii nihánj cataj xna'anj 'unj rihaan soj, tzaj ne ne cuchuman rá soj ma'. Asa' ca'vee cuchuman rá soj sese cataj xna'anj 'unj rihaan soj che'é rasuun man rej xta' ga. ¹³ 'Q se taj vaj síi cavii rej xta' nanij rihaan yo'óo cataj xna'anj rihaan soj daj vaa nij rasuun man rej xta' ma'. Maan orún' 'unj sij ca'née Diose nīcaj yu'unj man yuvii ro', me síi 'na' rej xta' nanij rihaan yo'óo nihánj, ne che'é dan ma'anj me síi guun nucuaj cataj xna'anj rihaan soj che'é rej xta' adonj. ¹⁴ Dan me se ase vaa tacavii síi cu'naj Moisés xcuáa aga' raā chruun rej tacaan ro', danj qui'yaj nii manj sij ca'née Diose nīcaj yu'unj man yuvii, ne tacavii nii manj raā 'o chruun, ¹⁵ ne ndaa síj, gaa ne taran' nij síi cuchuman rá nī'yaj manj ro', cayáan nij so' ga Diose nu' cavii nu' ca'anj nanj adonj —taj Jesucristó rihaan síi cu'naj Nicodemo a.

Nana nihánj taj xna'anj me che'é ca'na' Jesucristó rihaan chumii nihánj a

¹⁶ Dan me se 'ee uxrá rá Diose ni'yaj Diose man níi sij man rihaan chumii nihánj, ne nda' se orún' ta'níi Diose, tzaj ne rqué uun Diose ta'níi so' yo', ca'na' ta'níi so' rihaan chumii nihánj, ne cataj Diose se vaa nij yuvii amán rá ni'yaj man ta'níi so' ro', se cavi' nij so' daj chihaa mīj ma'. Tananj cane nij so' ga Diose nu' cavii nu' ca'anj nanj adonj. ¹⁷ 'Q se ne ca'nej Diose ta'níi so' che'é rej cuta' ta'níi so' cacun' xráa nij yuvii man rihaan chumii nihánj ma'. Tananj ca'née Diose man ta'níi so' rihaan chumii nihánj

che'é rej t̄inanii ta'níi so' man nij yuvii rihaan chrej chi'ii uun chij nimán nij so' adonj. ¹⁸ Ní' s̄ij amán rá ni'yaj man ta'níi Diose me se taj vaj sayuun quiran' ní' ma'. Tzaj ne síi ne amán rá ni'yaj man so' ro', aj cataj Diose se vaa ya quiran' so' sayuun nanj á. Che'é se ne cuchuman ya rá so' ni'yaj so' orún' ya ta'níi Diose ro', che'é dan quiran' ya so' sayuun adonj.

¹⁹ Dan me se nihánj me cacun' tumé nij síi quiran' sayuun yo' a. 'Q se aj ca'na' Jesucristó rihaan chumii nihánj, ne ase vaa 'o ya'an chuguun vaa so', tzaj ne caran' inan̄j rá nij síi man rihaan chumii nihánj cachee nij so' rej rmi', ne ne ca'vej rá nij so' quinichrun' nij so' rihaan ya'an chuguun yo' a. 'Q se chi'ii ndo'o vaa se qui'yaj nij so' adonj. ²⁰ Dan me se nu' yuvii 'yaj se chi'ii ro', taj ri'yun̄j nij so' ni'yaj nij so' ya'an chuguun yo', ne ne 'na' nij so' rihaan ya'an chuguun yo' ma'. 'Q se na'vej rá nij so' curuvj' se vaa 'yaj nij so' ma'. ²¹ Tzaj ne nij síi me rá canoco' nana ya ro', 'na' nij so' rihaan ya'an chuguun yo', ne dan me se gaa 'yaj nij so' danj, ne ruvi' se vaa 'yaj nij so', ne síi noco' man Diose me nij so', ne Diose racuij man nij so' nu' se vaa 'yaj nij so' a.

Nana nihánj taj xna'anj se vaa s̄ij sa' doj rihaan síi cu'naj Juan me Jesucristó, taj ma'an Juan yo' a

²² Dan me se gaa quisij nu' se vaa qui'yaj Jesucristó chuman' Jerusalén, gaa ne curihan̄j Jesucristó do', nij síi tucu'yón se-nana so' do', chuman' Jerusalén, ne ca'anj nij so' ne nij so' chuman' le'ej nii naj estadó Judea, ne veé dan vaj nij so' cuta' ne nij so' man yuvii do' a. ²³ Ne síi cu'naj Juan ro', ne chuman' cu'naj Enón, ne uta' ne so' man yuvii uún a. 'Q se nichrun' naj chuman' Enón ga chuman' Salim, ne man uxrá na cata' ne yuvii rej yo', ne ca'na' uxrá yuvii, ne ata' ne nij yuvii adonj. ²⁴ 'Q se ataa doj caxrii nii taga' man síi cu'naj Juan yo' gaa ei. ²⁵ Veé dan, ne guun che'e

nij s^í tucu'yón se-nana Juan ca'mii cunu' nij so' ga 'o s^í uun chij rihaan nij yuviⁱ israelitá che'é nana cataj xna'anj s^í cu'naj Moisés, se vaa daj qui'yaj yuviⁱ na'ya' yuviⁱ, gaa ne ca'vee guun niha' rá Diose ni'yaj Diose man nij so' a. ²⁶ Veé dan, ne cuchi' nij s^í tucu'yón se-nana Juan rihaan ma'an Juan, ne cataj nij so':

—S^í chéé ga so' gaa vaj ní' rej rnej tu'va chráa cu'naj Jordán ro', s^í natá' so' che'é ro', uta' ne so' man yuviⁱ cuano, ne 'anj taran' nij yuviⁱ rej vaj so', maestro —taj nij s^í tucu'yón se-nana Juan rihaan Juan a.

²⁷ Gaa ne cataj Juan:

—A 'ó yuviⁱ na'vee canoco' daj chihaa m^íj man so', sese nuveé Diose me s^í ca'vej rá ma'. ²⁸ 'O se aj cuno ma'an soj nana cataj xna'anj 'unj rihaan soj se vaa nuveé sij ca'néé Diose tinanii man yuviⁱ rihaan sayuun mej a. Maan se 'unj me s^í ca'néé Diose ca'na' asino yaan rihaan s^í tinanii man yuviⁱ rihaan sayuun ei. ²⁹ Ase vaa s^í xcaj man chana ne nara'aa ro', vaa so', ne ase vaa tuvi' s^í nara'aa ro', danj vaa 'unj, ne nicún' 'unj unó 'unj se vaa a'mii so', ne uun niha' uxrá raj, 'yaj nana a'mii s^í nara'aa, ne che'é dan me uun niha' uxrá raj adonj. ³⁰ 'O se no xcúún so' guun chij so' doj, ne 'unj me se no xcúnj gunj s^í nica' doj rihaan so' adonj —taj s^í cu'naj Juan yo' a.

Nana nihánj taj xna'anj se vaa no xcúún ní' cuchuman rá ní' ni'yaj ní' man Jesucristó a

³¹ S^í nanij rihaan chumii nihánj ro', so' me s^í uun chij rihaan cunudanj rasuun adonj. Nij s^í man rihaan chumii nihánj, tzaj ne che'é inanj rasuun man rihaan chumii nihánj a'mii nij so', ne taj vaj yo'ó rasuun ne'en nij so' ma'. Tzaj ne s^í nanij rej xta' ro', ³² so' me s^í a'mii che'é se vaa quene'en so' rej xta' do', che'é nana cuno so' rej xta' do', ne taj vaj s^í amán rá uno se-nana so' ma'. ³³ Tzaj ne s^í amán rá se-nana so' ro', so' me s^í taj se vaa nana ya

me se-nanā Diose adonj. ³⁴ Síí ca'néé Diose man ro', me síí a'mii se-nanā Diose á. 'O se rqué ndo'o Diose Nimán Diose rihaan so' adonj. ³⁵ 'Ee rá Rej so' man so', che'é yan ta'nij Rej so' me so', ne rqué Rej so' cunudanj rasuun man so', che'é rej guun chij so' rihaan cunudanj nij rasuun yo' adonj. ³⁶ Síí amán rá ni'yaj man ta'níí Diose ro', so' me síí ve'é cayáán ga Diose nu' cavii nu' ca'anj, tzaj ne síí na'vej rá cunō rihaan ta'níí Diose ro', daj chihaa míj se cayáán so' ga Diose ma'. Tananj yo'o ca'maan rá Diose ni'yaj Diose man so', ne yo'o quirān' so' sayuun, qui'yaj Diose adonj.

4

Nanā nihánj taj xna'anj che'é nanā ca'mii Jesucristó ga 'o chana samaritana a

¹ Dan me se xcaj Jesucristó cuentá se vaa cuchi' nanā rihaan nij síí fariseo se vaa doj a vaa nij síí tucu'yón se-nanā Jesucristó rihaan nij síí tucu'yón se-nanā Juan, ne nocōo doj nij yuvií cata' ne qui'yaj Jesucristó rihaan nij yuvií cata' ne qui'yaj Juan a. ² Tzaj ne nuveé ma'an Jesucristó me síí cuta' ne man nij yuvií ma'. Maan nij síí tucu'yón se-nanā so' cuta' ne man nij yuvií a. ³ Dan me se xcaj Jesucristó cuentá se vaa cuchi' nanā yo' rihaan nij síí fariseo, gaa ne cavii so' estadó Judea ca'anj so' estadó Galilea a. ⁴ 'O se ya cachēn so' estadó Samaria yo', ⁵ ne cuchi' so' tu'va yo'o chuman' naj estadó Samaria, ne Sicar cu'naj chuman' yo' a. Dan me se nichrun' naj chuman' yo' tu'va yo'óo rqué síí cu'naj Jacob rihaan ta'níí so' síí cu'naj José gaa naá, ⁶ ne tu'va chuman' yo' nuû yo'o na yu'uj qui'yaj síí cu'naj Jacob gaa naá a. Dan me se xe' man Jesucristó che'é yan cachéé uxrá so' ca'na' so' chuman' yo', ne che'é dan ca'anj canē so' tu'va na yu'uj yo', ne caxuj me yo' a.

⁷ Dan me se ca'na' 'o chana samaritana na yu'uj quirii no' na, ne cataj Jesucristó rihaan chana yo' a:

—Qui'yáá so' se ndo'o, ne rque so' doj na co'oj ruguanj —taj Jesucristó no chana yo' a.

⁸ Ne taj vaj nij sí tucu'yón se-nana Jesucristó nicun' ga so' ga ma'. 'O se ca'anj nij so' chuman' quiraan nij so' se chá a.

⁹ Veé dan, ne cataj chana samaritana yo' rihaan Jesucristó a:

—Me che'é cachín so' na rihanj, co'o so', ne ni'yaj so', ne sij israelitá mé so', ne chana samaritana mej ga —taj chana yo', xná'anj no' man Jesucristó a.

'O se ne a'mii sa' nij sí israelitá ga nij sí samaritano ma'.

¹⁰ Gaa ne cataj Jesucristó rihaan no' a:

—Sese xcaj so' cuentá che'é se luj qui'yaj Diose che'é so' ne sese quene'én so' me sí achín na mán so' cuano, ne cachín so' na 'yaj vaa i'na' yuvii man so' co'o so', ne rque so' na yo' co'o so' saj adonj —taj Jesucristó no chana yo' a.

¹¹ Gaa ne cataj chana rihaan Jesucristó a:

—Tzaj ne taj vaj sihuu rihaan so' quirii so' na nihánj ma'. Ne cunu ndo'o nuú na rá yu'uj nihánj, señor. Me rej quirii so' na 'yaj vaa i'na' yuvii rque so' co'oj ga. ¹² Dan me se xii ní' sí cu'naj Jacob ro', so' me sí co'o na nuu na yu'uj nihánj, ne veé dan me co'o ta'ní so' do', daán so' xcuu do', ne rque so' na nihánj co'o núj a. Ne sij sa' doj rihaan so' mé so', rá so' na' —taj chana yo' rihaan Jesucristó a.

¹³ Gaa ne cataj Jesucristó rihaan no':

—Cunudanj nij sí co'o na nuu rá yu'uj nihánj ro', canacoó uún nij so' na vaa güii, ne ca'na' uún nij so' quirii nij so' doj na a adonj. ¹⁴ Tzaj ne sí co'o na rque 'unj nihánj me se daj chihaa míj se canacoó uún so' na yo' a ma'. Ase

vaa rej ve'é uxrá avii na ro', danj gaa nimán so', ne cunuú uxrá se luj nimán so', ne gaa i'na' so' ga Diose nu' cavii nu' ca'anj, qui'yaj na rquej adonj —taj Jesucristó rihaan chana yo' a.

¹⁵ Ne cataj chana rihaan so':

—Rque so' doj na yo' co'oj, señor. Ne se canacoó 'unj na, ne se ca'na' uún 'unj quirij na nihánj a ma' —taj chana rihaan Jesucristó a.

¹⁶ Ne cataj Jesucristó rihaan no' a:

—Ca'anj nacunj so' man nica so', ne ca'na' so' nihánj á —taj so' rihaan no' a.

¹⁷ Ne cataj chana rihaan so':

—Taj vaj nica ma' —taj chana yo' a.

Ne cataj Jesucristó rihaan no' a:

—Cunaj uxrá ca'mii so', cataj so' se vaa taj vaj nica so' ei. ¹⁸ 'O se asij rque me se quisij ya 'un' snó'o xcaj so', tzaj ne tanáj so' man nij so', ne yaj nihánj me se nica so' man 'ó so', tzaj ne nuveé nica so' me so' ma'. Che'é dan ya uxrá ca'mii so' ei —taj Jesucristó no chana yo' a.

¹⁹ Ne cataj chana rihaan so':

—Cuanō nihánj xcaj 'unj cuentá se vaa sij nata' se-nana Diose mé so', señor. ²⁰ Dan me se xii núj ro', quina'víj nij so' xráá quij nihánj, tzaj ne soj sij israelitá taj se vaa orún' chuman' Jerusalén me rej nō xcúún ní' na'víj ní' rihaan Diose, taj soj adonj —taj chana yo' rihaan Jesucristó a.

²¹ Gaa ne cataj Jesucristó rihaan chana a:

—Cuchuman rá so' nana nihánj nana cataj xna'anj 'unj rihaan so', nocoj. Dan me se vaa güii, ne se cavii nij soj raá quij nihánj do', se ca'anj nij soj chuman' Jerusalén do', na'víj soj rihaan Rej ní' Diose ma'. ²² Dan me se ne ne'en nij soj man sí na'víj soj rihaan ma'. Tzaj ne xa' núj sij israelitá, tzaj ne ne'en núj man sí na'víj núj rihaan a. 'O se núj sij israelitá me nij sí qui'yaj quinanií yuvií rihaan

sayuun a. ²³ Tzaj ne vaa güüi, ne nij sí na'vîj sa' rihaan Rej ní' Diose ro', guun inanj rá nij so' na'vij nij so' rihaan Diose, ne me rej ma'an vaj nij so' na'vij ya nij so' rihaan Diose nanj adonj. Ne cuano nihánj me aj guun che'e yuvii qui'yaj yuvii danj adonj. 'O se me ndo'o rá Rej ní' Diose na'vij ya yuvii rihaan so' ei. ²⁴ Dan me se me ma'an rej vaj ní' nicun' Diose, ne che'é dan ní' sij na'vîj rihaan Diose ro', me ma'an rej mán ní', ne no xcúún ní' guun niha' rá ní' na'vij ya ní' rihaan so' adonj —taj Jesucristó rihaan chana yo' a.

²⁵ Gaa ne cataj chana rihaan Jesucristó a:

—Ne'én 'unj se vaa vaa güüi, ne ca'na' sí ca'nej Diose tinanii man ní' rihaan sayuun, ne asa' ca'na' so', ne cataj xna'anj ma'an so' che'é cunudanj rasuun rihaan ní' nanj á —taj chana rihaan Jesucristó a.

²⁶ Gaa ne canicaj Jesucristó cataj Jesucristó rihaan no', ne:

—'Unj sij a'mii rihaan so' cuano nihánj ro', me sí ca'neé Diose adonj —taj Jesucristó rihaan chana yo' a.

²⁷ Veé dan, ne nu' 'na' nique nij sí tucu'yón se-nana Jesucristó, ne caráya'anj nij so' se vaa ca'mii Jesucristó ga chana yo' a. Tzaj ne a 'ó nij so' ne xna'anj man so' daj qui'yaj so' do', me che'é ca'mii so' ga chana yo' do' a ma'. ²⁸ Gaa ne tanáj chana se-sihuú chana, ne cavii chana quinan' chana chuman', gaa ne cataj chana rihaan nij yuvii man chuman' a:

²⁹ —Ca'anj ní', ne quene'en soj 'o snó'o sí cataj xna'anj rihanj che'é nu' se vaa qui'yáj gaa rque á. Nuveé sij ca'neé Diose tinanii man ní' rihaan sayuun me so', rá soj na' —taj chana rihaan nij snó'o man chuman' yo' a.

³⁰ Gaa ne curihanj nij so' chuman', ne ca'na' nij so' rihaan Jesucristó a.

³¹ Dan me se gaa ca'mii chana ga nij síi man chuman' yo', ne guun che'e nij síi tucu'yón se-nana Jesucristó rquee nij so' chraa man Jesucristó, cataj nij so':

—Cha so' doj chraa, maestro —taj nij so' a.

³² Tzaj ne cataj Jesucristó rihaan nij so' a:

—Vaa se chá rihanj, tzaj ne ne ne'en soj ma' —taj Jesucristó rihaan nij so' a.

³³ Gaa ne xna'anj nij so' man tuvi' nij so', cataj nij so':

—Vaa síi ca'na' rque se chá so', rá soj na' —taj nij so' rihaan tuvi' nij so' a.

³⁴ Gaa ne cataj Jesucristó rihaan nij so' a:

—Sese 'yáá 'unj ndaa vaa me rá síi ca'née manj qui'yáj, ne sese navij quisj suun ca'ne' so' rihanj, ne ase vaa se chá vaa yo' rihanj adonj. Dan me se nuu xej nimanj gaa 'yaj sunj suun yo' ei. ³⁵ Se guun cataj soj se vaa cachén yo'ó ca'anj yavii, gaa ne quirii ní' naa, cataj soj ma'. Maan se cuano nihánj cataj xna'anj 'unj rihaan soj se vaa naxcaj soj rihaan soj, ni'yaj soj nij yuvii, se vaa ase vaa naa 'núú trigó vaa nij yuvii, ne catzii ndo'o vaa naa 'núú trigó yo', cachij yo', ne cuano nihánj me se no xcúún ní' quirii ní' 'núú trigó yo' adonj. Dan me se aj guun che'e ³⁶ Diose naru'vee Diose rihaan nij síi rii naa yo', ne naqui'yaj chre' ndo'o nij so' man nij síi cayáán ga Diose nu' cavii nu' ca'anj, ne rej rihaan guun niha' rá síi cunô naa ga síi rii naa adonj. ³⁷ 'Q se ya uxrá vaa nana nihánj se vaa ino vaa síi cunô naa ga síi rii naa, ³⁸ ne aj ca'née 'unj man soj quirii soj naa rej ne qui'yaj suun soj ma'. Yo'ó yuvii me nij síi qui'yaj suun naa yo' gaa rque, ne catúj soj qui'yaj suun soj ga nij so' adonj —taj Jesucristó rihaan nij síi tucu'yón se-nana so' a.

³⁹ Dan me se che'é se nata' chana yo' rihaan nij yuvii samaritana man chuman' yo' se vaa cataj xna'anj Jesucristó rihaan no' nu' se vaa qui'yaj no' gaa rque ro', che'é dan me cuchumán rá que'ee nij yuvii man chuman' yo'

ni'yaj nij yuvii man Jesucristó a. ⁴⁰ Dan me se cuchí' nij síi man chuman' yo' rihaan Jesucristó, ne cachíin ni'yaj uxrá nij so' rihaan so' se vaa caran' so' doj tucúa nij so', ne che'é dan vij güii quináj so' chuman' yo' a. ⁴¹ Ne guun rii doj nij síi cuchumán rá cuno se-nana Jesucristó a. ⁴² Ne nij yuvii amán rá ni'yaj man Jesucristó ro', cataj nij so' rihaan chana yo' a:

—Nuveé che'e doj nana natá' so' rihaan núj me cuchumán rá núj ni'yaj núj man so' ma'. Maan se cuno ma'an núj se-nana so', ne xcaj núj cuentá se vaa ya síi tinanii man yuvii man rihaan chumii nihánj rihaan sayuun me síi nihánj nanj adonj —taj nij so' rihaan chana yo' a.

Nana nihánj taj xna'anj se vaa nahuun sa' ta'nii yo'o síi nicaj suun, qui'yaj Jesucristó a

⁴³ Dan me se quisij vij güii caran' Jesucristó chuman' yo', gaa ne cavii so' ca'anj so' estadó Galilea a. ⁴⁴ Dan me se ma'an Jesucristó me síi cataj xna'anj se vaa nij síi man chiháán 'o síi a'mii natáj se-nana Diosé me se ne aráj cochroj nij síi man ma'an dan rihaan so' ma'.

⁴⁵ Gaa ca'na' Jesucristó estadó Galilea, gaa ne ve'é uxrá ca'mii nij síi man estadó yo' che'é suun sa' nocoo qui'yaj so' cha'anj canuú chuman' Jerusalén a. 'O se ma'an nij so' ca'anj cha'anj yo' a.

⁴⁶ Dan me se ca'anj uún so' chuman' Caná chuman' naj estadó Galilea a. Chuman' yo' me chuman' naqui'yaj so' na vinó man na uun gaa rque a. Ne chuman' Capernaum ro', ne yo'o síi nicaj suun rihaan rey a. Ne canó chi'ii man ta'nii so' 'o snó'o cunii a. ⁴⁷ Dan me se cuchí' nana rihaan síi nicaj suun yo' se vaa cavii Jesucristó estadó Judea ca'na' Jesucristó estadó Galilea, gaa ne ca'anj so' cuchí' so' rihaan Jesucristó, ne cachíin ni'yaj uxrá so' rihaan Jesucristó se vaa ca'anj Jesucristó qui'yaj cono'ó

Jesucristó man ta'níí so' a. Dan me se daj doj cavi' ta'níí so', taj so' a. ⁴⁸ Gaa ne cataj Jesucristó rihaan so' a:

—Sese se qui'yáj suun sa' nocoo quene'en soj, ne daj chihaa míj se cuchumán rá soj ni'yaj soj manj ma' —taj Jesucristó rihaan so' a.

⁴⁹ Gaa ne cataj síí nicaj suun yo' rihaan Jesucristó a:

—Daj doj cavi' ta'níj, nanj señor. Qui'yáá so' se ndo' o uxrá, ne ca'anj ní' doj ruguanj —taj so', cachín ni'yaj so' rihaan Jesucristó a.

⁵⁰ Ne cataj Jesucristó rihaan so' a:

—Ca'vee ca'anj so' á. 'Q se aj nahuun sa' ta'níí so' nanj adonj —taj Jesucristó rihaan so' a.

Gaa ne cuchumán rá snó'o yo' nana cataj xna'anj Jesucristó rihaan so', ne cavii so' ca'anj so' a.

⁵¹ Veé dan, ne tihaj nan' so' chrej, ne ca'anj caran' nij se-mozó so' man so', ne cataj xna'anj nij yo' rihaan so' se vaa aj nahuun sa' ta'níí so' nanj adonj. ⁵² Veé dan, ne xna'anj so' man nij mozó yo':

—Me orá me guun che'e ta'níj nahuun sa' yo' ga —cataj so' rihaan nij mozó yo' a.

Gaa ne cataj nij mozo yo' rihaan so':

—Quii aga' 'Q me na'maân cachi' man xnii nanj á —taj nij mozó yo' rihaan so' a.

⁵³ Che'é dan me xcaj snó'o yo' cuentá se vaa maan orá cataj xna'anj Jesucristó rihaan so' se vaa nahuun sa' ta'níí so' ro', maan orá dan me nahuun sa' ya' ta'níí so' a. Gaa ne cuchumán rá nij tucua so' se vaa sij ca'née Diose me Jesucristó a. ⁵⁴ Dan me se quisíj vij suun sa' nocoo qui'yaj Jesucristó gaa quisíj cavii so' estadó Judea ca'anj so' estadó Galilea a.

5

Nana nihánj taj xna'anj se vaa nahuun sa' 'o síí ninaj cunu' icō xnu' va'nuj yo', qui'yaj Jesucristó a

¹ Veé dan, ne canuû cha'anj navij rá nij síí israelitá, gaa ne cavii Jesucristó ca'anj so' chuman' Jerusalén a. ² Dan me se chuman' Jerusalén ro', vaa 'o na cu'naj Betesda xna'ánj a'mii nij síí israelitá a. Nichrun' naj na yo' ga ta'yaa atúj matzinj, ne vaa 'un' ve' ne nu' anicaj tu'va na yo' a. ³ Rá ve' yo' mán ndo'o síí ninaj do', síí tuchrii do', síí rengo do', síí nuu chrúnj ra'a do' a. ⁴ Dan me se ndaa vaa orá nanij yo'o se-mozó síí 'nij ra'a man ní' rá na yo', ne tanicaj so' na yo', taj nij yuvii yo' a. Ne gaa anicaj na yo', ne síí nanij asino yaan rque na ro', orún' so' güej naj guun chi'ii xráá, taj uún nij yuvii yo' a. ⁵ Ne naj yo'o snó'o tu'va na yo', ne síj icō xnu' va'nuj ya yo' ran' so' a. ⁶ Dan me se quene'en Jesucristó man so' se vaa naj so' rej yo', ne aj quene'en Jesucristó se vaa guun que'ee yo' ran' so', ne xná'anj Jesucristó man so', cataj Jesucristó a:

—Nahuun sa' so', rá so' na' —taj Jesucristó rihaan so' a.

⁷ Ne cataj síí ran' yo' rihaan Jesucristó a:

—Nahuún 'unj raj, tzaj ne taj vaj tuví' 'unj síí tinanij mán 'unj rá na gaa anicaj na, man señor. Che'é dan me gaa 'anj 'unj tu'va na yo', ne guun yucuan' yo'ó so', ne asino so' atúj rque na rihanj nanj adonj —taj so' rihaan Jesucristó a.

⁸ Gaa ne cataj Jesucristó rihaan so':

—Naxagaa so', ne naxcaj so' tuvée so', cachee so' á —taj Jesucristó rihaan so' a.

⁹ Gaa ne nu' nahuun sa' snó'o yo', ne naxcaj so' tuvée so', ne ca'anj so' a.

Nana nihánj taj xna'anj me che'é no xcuún Jesucristó qui'yaj cono'ó so' man yuvii güii naránj rá nij yuvii israelitá a

Ne güii nahuun sa' snó'o yo' me güii naránj rá nij yuvij israelitá a. ¹⁰ Che'é dan me nij síi uun chij rihaan nij yuvij israelitá me se cataj nij so' rihaan síi nahuun sa' yo':

—Güii naránj rá ní' me nihánj á. Ne nó xcúun so' catá so' tuvée so' cuan' ma' —taj nij so' rihaan so' a.

¹¹ Gaa ne cataj so' rihaan nij so' a:

—Tzaj ne síi qui'yaj nahuun sa' 'unj ro', so' me síi ca'ne' suun rihanj naxcaj 'unj tuvée 'unj ne cachee 'unj adonj —taj so' rihaan nij so' a.

¹² Gaa ne xná'anj nij so' man so', cataj nij so':

—Me síi cataj rihaan so' naxcaj so' tuvée so' ne cachee so' ga —taj nij so' rihaan so' a.

¹³ Tzaj ne ne quene'en síi nahuun sa' me síi qui'yaj danj ma'. 'Q se gaa quisj nahuun sa' so', ne naxuun Jesucristó man ma'an so' cachén Jesucristó sca'núj nij yuvij man anicaj ni'yaj man síi nahuun sa' yo', ca'anj so' a. ¹⁴ Veé dan, ne nari' Jesucristó man síi nahuun sa' yo' rá nuví nocoo, ne cataj Jesucristó rihaan so' a:

—Ya nahuun sa' so' á. Tanáj so' chrej chi'ii á. Sese taj, ne canicaj uún chi'ii mán so', ne doj a quirán' so' nanj adonj —taj Jesucristó rihaan so' a.

¹⁵ Dan me se cavii snó'o yo', ne nata' so' rihaan nij síi uun chij rihaan nij yuvij israelitá se vaa Jesucristó me síi qui'yaj nahuun sa' so' a. ¹⁶ Che'é dan guun rá nij síi uun chij yo' qui'yaj nij so' sayuun man Jesucristó, che'é se güii naránj rá nij so' me güii nahuun snó'o yo', qui'yaj Jesucristó a.

¹⁷ Gaa ne cataj Jesucristó rihaan nij so' a:

—Réj me se ne anicun' so' ga suun ma'. Che'é dan yo'o 'yaj suun ma'anj adonj —taj Jesucristó rihaan nij so' a.

¹⁸ Che'é dan doj a nano' nij so' daj qui'yaj nij so', gaa ne ca'vee cavi' Jesucristó a. 'Q se nuveé che'e inanj tinavij Jesucristó tucuáan nocoo' nij so' che'é güii naránj rá nij so'

me guun rá nij so' cavi' Jesucristó ma'. 'Q se che'é se cataj so' se vaa Rej ma'an so' me Diose, che'é dan guun doj rá nij so' cavi' Jesucristó nanj adonj. Dan me se ase vaa Diose vaa ma'an so', taj so' a. ¹⁹ Che'é dan cataj Jesucristó rihaan nij so' a:

—Dan me se cataj xna'anj yá yá 'unj rihaan soj a. Dan me se ase vaa xnii rihaan rej xnii ro', danj vaa 'unj sij ta'nij Diose nihánj rihaan Réj Diose, ne ne uun nucuáá 'unj 'yáá 'unj se vaa rii nimán ma'anj ma'. 'Q se inanj 'yáá 'unj ndaa vaa 'yaj Réj Diose ne'enj a. Ne ase vaa 'yaj guee so' ro', veé danj vaa guee 'yáá 'unj uún adonj. ²⁰ 'Q se 'ee ndo'o rá Réj Diose ni'yaj so' manj che'é se ta'nij so' mej, ne tihaan so' manj nu' se vaa 'yaj so' a. Ne suun sa' doj rihaan suun sa' qui'yáj quene'en soj cuano ro', tihaan so' manj a. Yo' me se doj a caraya'anj soj ni'yaj soj suun sa' yo' ei. ²¹ Dan me se ase vaa nuu i'na' uún nij sí cavi' 'yaj Réj ro', danj qui'yáá 'unj uún adonj. Dan me se cunuu i'na' uún naj guun yuvií qui'yáá 'unj, sese guun rá 'unj cunuu i'na' uún nij so' adonj. ²² Dan me se ne a'ne' Réj Diose cacun' che'é a doj yuvií ma'. 'Q se aj ca'ne' so' suun rihanj sij ta'nij so' se vaa ca'ne' ma'anj cacun' che'é cunudanj yuvií, ²³ ne ase vaa aráj cochroj yuvií rihaan so' ro', danj gaa caraa cochroj yuvií rihanj adonj. Dan me se sí na'vej rá caraa cochroj rihanj sij ta'nij Diose me se so' me sí se guun rá caraa cochroj rihaan ndaa Réj Diose sí ca'néé manj a.

²⁴ “Ya ya cataj xna'anj 'unj rihaan soj cuano se vaa sí uno se-nanaj ne amán rá ni'yaj man sí ca'néé manj ro', se cuta' Diose cacun' xráá so' ma'. Dan me se daj chihaa mój se cavi' nu' so' ma'. Tananj gaa i'na' so' nu' cavii nu' ca'anj ga Diose adonj. ²⁵ Ya ya cataj xna'anj 'unj rihaan soj cuano se vaa vaa güii, ne nij sí man rihaan chumii nihánj nij sí cavi' vaa güii ro', ca'mij sij ta'nij Diose rihaan nij so', ne nu' nij sí cunō nana ca'mij ro', cunuu i'na' ya nimán

nij so', ne cuano nihánj me güii a'mij rihaan nij so', sese me rá nij so' cunō nij so' adonj. ²⁶ 'O se ase vaa vaa i'na' ma'an Diose, ne vaa i'na' taran' nij rasuun 'yaj Diose ro', danj vaa vaa i'na' ma'anj sij ta'nij Diose uún, 'yaj Diose, ne cunuū i'na' yuvii, qui'yáá 'unj, ²⁷ ne 'unj me síí nicaj suun, ne ca'ne' 'unj cacun' che'é yuvii, che'é yan síí ca'née Diose nicaj yu'unj man yuvii mej adonj.

²⁸ “Se caráya'anj soj nana nihánj ma'. 'O se vaa güii cunō taran' nij síí cavi' naj rihaan santó se-nanaj, ²⁹ ne curihanj nij so' rque yo'óo nanj adonj. Dan me se, nij síí qui'yaj se sa' gaa vaa i'na' ro', curihanj nij so', ne cunuū i'na' uún nij so' cane nij so' ga Diose adonj. Tzaj ne nij síí qui'yaj se chi'ii ro', curihanj nij so', tzaj ne 'o quiran' ndo'o nij so' sayuun che'é cacun' tumé nij so' nanj adonj. ³⁰ Dan me se a doj ne uun nucuaj ma'anj qui'yaj sunj a ma'. Maan se ase vaa taj xna'anj Réj Diose rihanj ro', veé danj vaa 'yáj gaa a'ne' 'unj cacun' che'é nij yuvii, ne 'o nica a'ne' 'unj cacun' che'é nij yuvii nanj adonj. 'O se ne 'yáj inanj se me raj qui'yáj ma'. Tananj inanj se ataj xna'anj síí ca'née manj me se vaa 'yáj adonj.

³¹ “Sese orún' 'unj me síí cataj xna'anj rihaan soj daj sij mej, ne taj che'é cataj soj se vaa ya vaa se-nanaj ma'. ³² Tzaj ne vaa yo'ó síí cataj xna'anj daj sij mej, ne ne'én 'unj se vaa so' me síí cataj xna'anj ya che'é 'unj ei.

³³ “Dan me se ca'née soj síí cuchi' rihaan síí cu'naj Juan che'é rej narí' nij so' se-nana síí cu'naj Juan, ne cataj xna'anj so' nana ya rihaan nij soj a. ³⁴ (Dan me se ca'vee se ca'mii ve'é yuvii che'ej ca'vee se se ca'mii ve'é yuvii che'ej, taj se 'yaj ma'. Maan se nanj taj 'unj rihaan soj che'é se me raj quinanii soj rihaan sayuun nanj adonj.) ³⁵ Dan me se síí cu'naj Juan ro', ase vaa aga' ya'an vaa so', ne ase vaa ruvi' sa' rihaan yuvii gaa chuguun aga' ya'an yo' ro', danj vaa ruvi' sa' tucuán ya rihaan soj qui'yaj so' nanj adonj.

Tzaj ne nij soj ro', guun rá soj cunō soj se-nānā so' 'o orá nii, che'é se guun rá soj guun niha' rá soj, qui'yaj se-nānā so', tzaj ne qui'yaj rma'an soj doj tzin', ne tanáj uún soj se-nānā so' a.

³⁶ “Ne xa' 'unj nihánj, tzaj ne sa' doj vaa síí taj xna'anj che'é 'unj rihaan síí cu'naj Juan a. Dan me se vaa suun ca'ne' Réj rihanj se vaa ya quisij suun yo' qui'yáj, ne che'é dan me 'yaj suun 'unj nij suun yo' a. Che'é ma'an suun sa' yo' ca'vee xcaj soj cuentá se vaa sij ca'née Réj Diose mej adonj. ³⁷ Ne Réj síí ca'née manj ro', ma'an so' cataj xna'anj daj sij mej, tzaj ne taj se-nānā so' cunō soj ma'. Ne ne ne'en soj daj vaa Réj ma'. ³⁸ Ne taj se-nānā so' nayón nimán soj a ma'. Danj vaa soj, che'é yan ne cuchuman rá soj ni'yaj soj manj sij ca'née so' rihaan chumií nihánj man adonj. ³⁹ Dan me se nayaa uxrá soj danj Diose, che'é se me rá soj xcaj soj cuentá daj qui'yaj soj ne ca'vee cayáan soj ga Diose nu' cavii nu' ca'anj ei. Ne veé ma'an danj Diose ataj xna'anj che'é 'unj a. ⁴⁰ Tzaj ne na'vej rá soj ca'na' soj rihanj, yan ca'vee canē soj ga Diose nu' cavii nu' ca'anj qui'yáj ma'.

⁴¹ “Taj se 'yaj sese na'vej rá yuvií ca'mii yuvií nana sa' che'ej ma'. ⁴² Tzaj ne ne'én 'unj daj vaa rá soj, se vaa ne niha' rá soj ni'yaj soj Diose ma'. ⁴³ Dan me se ca'née Réj manj ca'naj rihaan chumií nihánj ca'mij se-nānā Réj Diose rihaan soj, tzaj ne ne aran' rá soj ca'mij rihaan soj ma'. Tzaj ne sese ca'na' me ma'an yo'ó so' ca'mii so' nana avii raā ma'an so', ne ve'é cunō soj se-nānā so' ei. ⁴⁴ Daj chihaa mīj se guun nucuaj soj cuchuman rá soj ni'yaj soj manj a ma'. 'O se me rá soj ve'é ca'mii nij tuvi' soj che'é soj, tzaj ne ne nanó rá soj daj qui'yaj soj, ne ve'é ca'mii Diose che'é soj ma'. ⁴⁵ Se guun rá soj se vaa 'unj me síí cuta' cacun' xráá soj rihaan Réj Diose ma'. Maan se vaa síí cu'naj Moisés, ne nucuaj ndo'o rá soj man so' se vaa ca'vee cavii

sa' soj rihaan Diose qui'yaj so', tzaj ne ma'an so' me sí cuta' cacun' xraá soj adonj. ⁴⁶ 'O se sese ya amán rá soj ni'yaj soj man sí cu'naj Moisés, ne cuchuman rá uún soj ni'yaj soj manj, gaa ne ca'vee ei. 'O se so' me sí cachrón nana rihaan yanj nana taj xna'anj che'é 'unj adonj. ⁴⁷ Tzaj ne sese ne amán rá soj nana cachrón so' rihaan yanj, gaa ne asa' ca'vee cuchuman rá soj cunō soj se-nanaj ga —taj Jesucristó rihaan nij sí uun chij rihaan nij yuvi israelitá a.

6

Nana nihánj taj xna'anj se vaa go' Jesucristó se chá rihaan 'un' mij snó'o a

¹ Veé dan, ne cavii Jesucristó ca'anj Jesucristó rej xcō na lacuaná cu'naj Galilea a. Tiberias cu'naj yo'ó se-chuvii na lacuaná yo' a. ² Dan me se rii uxrá yuvi canocō' rej xcō so', che'é yan aj quene'en nij yuvi nu' nij suun sa' nocōo qui'yaj suun Jesucristó, se vaa nahuun sa' ndo'o sí ran', qui'yaj so' a. ³ Dan me se cavii so' raá quij, ne ca'anj cane so' rihaan yo'óo ga nij sí tucu'yón se-nana so', ⁴ ne dan me se daj doj güii achiin canuû cha'anj pascuá cha'anj navij rá nij yuvi israelitá a. ⁵ Dan me se naxcaj Jesucristó rihaan Jesucristó, ne quene'en so' se vaa ca'na' ndo'o yuvi rihaan so', ne cataj so' rihaan sí cu'naj Felipé a:

—Me rej quiraan ní' rachrúun cha taran' nij yuvi nihánj, rá so' ga —taj so', xna'anj so' man sí cu'naj Felipé yo' a.

⁶ Danj ca'mii so' rihaan sí cu'naj Felipé, che'é se me rá so' quene'en so' daj cataj sí cu'naj Felipé a. Tzaj ne aj ne'en so' daj qui'yaj ma'an so' nanj adonj.

⁷ Dan me se cataj sí cu'naj Felipé rihaan Jesucristó:

—A' sa'anj vaa tu'vee yuvi 'yaj suun tunj yavii se quisíj quiri' nij so' doj rachrúun cha nij so' a ma' —taj so' a.

⁸ Dan me se 'o sí tucu'yón se-nanā so' sí cu'naj Andrés tinúú sí cu'naj Simón Pedró me so' a. Cataj so' rihaan Jesucristó a:

⁹ —Nihánj me nicun' 'o xnii, ne nicaj xnii nihánj 'un' guee rachrúún 'núú cebada, ne vij guee xcuaj nicaj so', tzaj ne asa' ca'vee quisij doj tzin' nihánj chá taran' nij yuvií nihánj ga —taj sí cu'naj Andrés yo' a.

¹⁰ Gaa ne cataj Jesucristó:

—Ca'anj canē nij yuvií rihaan coj chrin', qui'yaj nij soj ei —taj Jesucristó rihaan nij sí tucu'yón se-nanā so' a.

Dan me se man uxrá coj chrin' rej yo', ne ca'anj canē nij yuvií rihaan coj chrin' yo', ne 'un' mǐj snó'o me nij so' a.

¹¹ Dan me se quita'aa Jesucristó rachrúún, ne nago' so' graciá rihaan Diose, ne cuxra' ta'aj so' rachrúún caxrǐj so' ston nij sí tucu'yón se-nanā so', ne nij sí tucu'yón se-nanā so' ro', rqué nij so' chá taran' nij sí ne rihaan coj chrin' yo' a. Ne ase vaa qui'yaj so' ga rachrúún ro', danj qui'yaj uún so' ga nee xcuaj yo', rqué so' nu' se vaa me rá nij yuvií chá nij yuvií yo' a. ¹² Gaa quisǐj caraa rque nij yuvií, ne cataj Jesucristó rihaan nij sí tucu'yón se-nanā so' a:

—Naqui'yaj chre' nij soj se quináj tu'va nij yuvií, ne se guun quirǐ' uun yo' ma' —taj Jesucristó rihaan nij so' a.

¹³ Che'é dan naqui'yaj chre' nij so' nu' se quináj tu'va nij yuvií, ne caraa cunu' chuvij ya scaa, qui'yaj nij xco' nii rachrúún quináj tu'va nij yuvií gaa quisǐj chá nij yuvií yo' 'un' rachrúún yo' nanj adonj. ¹⁴ Dan me se gaa quene'en nij snó'o suun sa' nocoo qui'yaj suun Jesucristó, ne cataj nij so':

—Sí nihánj ro', ya uxrá sí nata' se-nanā Diose me so', ne sí na'vij ní' ca'na' ya rihaan chumii nihánj me so' ei —taj nij snó'o yo' a.

¹⁵ Tzaj ne aj ne'en Jesucristó se vaa ca'na' nij so', ne quita'aa nij so' man so', ne cune' nij so' man Jesucristó guun so' sí nicaj suun rey guun chij rihaan nij so', ne che'é dan naxuun so' man so', ne cavii uún orún' so' ca'anj so' quij a.

Nana nihánj taj xna'anj se vaa cachéé Jesucristó rihaan na a

¹⁶ Dan me se rej ti'nuu, ne nanij nij sí tucu'yón se-nana Jesucristó tu'va na lacuaná, ¹⁷ gaa ne catúj nij so' rihoo, gaa ne cavii nij so' ca'anj nij so' chuman' Capernaum a. Dan me se quisj guun rmi' rihaan na lacuaná yo', ne ataa naman Jesucristó rihaan nij so' a. ¹⁸ Ne cavii nana yuvaa, ne uxrá nari' nucuaj ndo'o na lacuaná yo', ¹⁹ ne dan me se 'un' kilómetro ca'anj nij so', gaa ne quene'en nij so' se vaa chéé Jesucristó rihaan na 'na' so', ne gaa quinichrun' so' rihaan rihoo yo', ne cuchu'vi' nij so' a. ²⁰ Tzaj ne cataj Jesucristó rihaan nij so' a:

—'Unj me yo' ei. Se chu'vi' soj ma' —taj Jesucristó a.

²¹ Che'é dan guun niha' uxrá rá nij so', ne nu' catúj Jesucristó rá rihoo, ne nu' cuchi' rihoo tu'va na lacuaná rej vaj nij so' a.

Nana nihánj taj xna'anj se vaa cataj Jesucristó se vaa ase vaa se chá vaa Jesucristó rihaan nimán ní' a

²² Dan me se yo'ó güii me se quene'en nij yuvii quináj rej xcq na lacuaná yo' se vaa taj vaj yo'ó rihoo chéé rihaan na rej yo', maan se oruun rihoo catúj nij sí tucu'yón se-nana Jesucristó gaa ca'anj nij so' a. Tzaj ne ne catuu Jesucristó rá rihoo yo' ga nij sí tucu'yón se-nana so', ni'yaj nij yuvii a. Che'é dan ne quene'en uxrá nij yuvii me rej ca'anj Jesucristó a. ²³ Tzaj ne ca'na' doj rihoo cavii chuman' Tiberias tu'va na lacuaná nichrun' rej nago' sí 'nij ra'a man ní' graciá rihaan Diose che'é rachruún ne chá nij yuvii rachruún yo' a. ²⁴ Che'é dan gaa quene'en nij yuvii

se vaa taj vaj Jesucristó ga nij sí tucu'yón se-nānā so' chéé ga nij so', gaa ne catúj nij yuvii rque nij rihoo yo', ne ca'anj nij yuvii chuman' Capernaum, nano' nij yuvii man Jesucristó a. ²⁵ Dan me se nari' nij so' man Jesucristó chuman' Capernaum, gaa ne xná'anj nij so' man so', cataj nij so':

—Me aman ca'ná' so' nihánj, ga maestro' —taj nij yuvii, xná'anj nij so' man Jesucristó a.

²⁶ Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa nuveé che'e se quene'en soj nij suun sa' nocoo qui'yáá 'unj me nano' soj manj ma'. Maan che'é se chá soj rachrúun yo' ne caraa rque soj ro', che'é dan nano' soj manj ei.

²⁷ “Se guun qui'yaj suun soj che'é inanj se chá soj ma'. 'O se vaa güii, ne quinavij nu' nij rasuun yo' nanj adonj. Che'é dan qui'yaj suun soj che'é se vaa qui'yaj cavii sa' nimán soj, gaa ne gaa i'na' ya nimán soj nu' cavii nu' ca'anj ei. 'Unj sij ca'née Diose nīcaj yu'unj man yuvii me sí rque se sa' yo' rihaan soj ei. 'O se Réj Diose me sí cataj se vaa ca'vee qui'yaj danj che'é soj adonj —taj Jesucristó rihaan nij yuvii a.

²⁸ Che'é dan cataj nij yuvii rihaan so' a:

—Me suun qui'yaj suun núj, rá Diose ga —taj nij yuvii a.

²⁹ Gaa ne cataj Jesucristó rihaan nij yuvii:

—Nihánj me suun me rá Diose qui'yaj suun soj, se vaa cuchuman rá soj nī'yaj soj mán 'unj sij ca'née so' rihaan soj adonj —taj Jesucristó rihaan nij yuvii a.

³⁰ Che'é dan cataj nij yuvii rihaan so' a:

—Sese danj vaa, ne me suun sa' nocoo qui'yáá so' quene'en núj, gaa ne cuchuman rá núj nī'yaj núj mán so' ga. ³¹ Dan me se qui'yaj Diose suun sa' nocoo gaa naá, ne xii ní' me se chá nij so' se cu'naj maná gaa chéé nij so' rej

tacaan, qui'yaj Diosē gaa naá, ne dan me se danj Diosē taj se vaa nanij se chá rihaan nij so', qui'yaj Diosē, ne chá nij so' se chá nanij rej xta' adonj —taj nij so' rihaan Jesucristó a.

³² Che'é dan cataj Jesucristó rihaan nij so' a:

—Ya ya cataj xna'anj 'un̄j rihaan soj cuang, ne xa' se rqué Moisés chá soj, tzaj ne nuveé se chá 'yaj vaa i'na' yuvii nu' cavii nu' ca'anj me yo' ma'. Xa' se rqué Réj Diosē cha soj, tzaj ne se qui'yaj gaa i'na' soj me ya yo' adonj. ³³ 'O se se chá rqué Réj Diosē rihaan soj mé 'un̄j sij cavii rej xta', ne 'un̄j me sí rqué se vaa ca'vee gaa i'na' ya soj sij man rihaan chumii nihánj nu' cavii nu' ca'anj adonj —taj Jesucristó rihaan nij yuvii a.

³⁴ Che'é dan cataj nij yuvii rihaan Jesucristó a:

—Rque so' se chá yo' rihaan núj nu' cavii nu' ca'anj, señor —taj nij yuvii a.

³⁵ Gaa ne cataj Jesucristó rihaan nij yuvii a:

—'Un̄j nihánj me se chá, ne a'vee 'yáj vaa i'na' ya yuvii ei. Sese ca'na' soj rihanj, ne yo'o gaa xej nimán soj, sese ya uxrá amán rá soj ni'yaj soj manj á. ³⁶ Tzaj ne aj cataj 'un̄j rihaan soj se vaa nda' se quene'en soj manj, tzaj ne ne cuchuman rá soj ni'yaj soj manj a ma'. ³⁷ Xa' nij sí rqué Réj Diosē manj, tzaj ne ca'na' nij so' rihanj, ne ve'é ca'mii 'un̄j ga nij so', ne xa' nij sí 'na' rihanj, tzaj ne daj chihaa míj se quiri'íj yaníj 'un̄j man nij so' ma'. ³⁸ Dan me se ca'ná' 'un̄j rihaan chumii nihánj, tzaj ne se guun qui'yáa 'un̄j ndaa vaa me rá ma'anj qui'yáj ma'. Tananj che'é rej qui'yáa 'un̄j se vaa me rá Diosē sí ca'neé mán 'un̄j qui'yáa 'un̄j ro', che'é dan nanij 'un̄j rihaan chumii nihánj adonj. ³⁹ Ne nihánj me se vaa me rá Diosē qui'yáj ei. Dan me se na'vej uxrá rá Diosē ca'anj ni'ya a 'ó nij sí rqué so' manj ma'. Dan me se me rá Diosē cunuu i'na' uún taran' nij so', qui'yáj, asa' quisíj güii ca'anj ni'ya chumii nihánj adonj.

⁴⁰ 'Q se nihánj me se vaa me rá Réj Diose ei. Me rá so' yo'q gaa i'na' taran' nij sí amán rá ni'yaj manj nu' cavii nu' ca'anj ga so', ne 'unj me sí qui'yaj cunuu i'na' uún nij so' asa' quisj güii ca'anj ni'ya chumii nihánj adonj —taj Jesucristó rihaan nij yuvii a.

⁴¹ Dan me se, che'é se cataj Jesucristó se vaa ma'an so' me se chá nanij rej xta' rihaan chumii nihánj, ne che'é dan ca'mii nij sí uun chij rihaan nij yuvii israelitá nana nij ni'yaj nij so' man Jesucristó, ⁴² cataj nij so':

—Nuveé sij cu'naj Jesús me sí nihánj na'. Nuveé ta'nij sí cu'naj José me so' na'. Nuveé sij ne'en ní' me rej so' me nii so' dq' na'. Me che'é guun rá so' cataj so' cuano se vaa me so' sí nanij rej xta' rihaan chumii nihánj ga —taj nij sí uun chij ni'yaj nij so' man Jesucristó a.

⁴³ Gaa ne cataj Jesucristó rihaan nij so' a:

—Se ca'mii soj nana nij ga tuvi' soj ma'. ⁴⁴ Dan me se ca'neé Réj Diose manj, ne a 'ó yuvii se ca'vee ca'na' rihanj sese nuveé Réj Diose qui'yaj ca'na' so' rihanj a. Ne xa' sí 'na' rihanj, tzaj ne cunuu i'na' uún so' qui'yaj asa' quisj güii ca'anj ni'ya chumii nihánj adonj. ⁴⁵ Dan me se vaa 'q sí nata' se-nana Diose cahrón nana nihánj rihaan yanj gaa naá a: “Ne ma'an Diose tucuyón man taran' nij so' adonj”, taj sí nata' yo' a. Dan me se taran' nij sí uno rihaan Réj ne nari' se-nana Réj me sí 'na' rihanj ei. ⁴⁶ Taj vaj yo'ó sí quene'en man Réj a ma'. Tzaj ne orún' 'unj me sí quene'en man so', che'é se sij cavii rihaan so' mej adonj.

⁴⁷ “Ya ya cataj xna'anj 'unj rihaan soj cuano se vaa sí amán rá ni'yaj manj me se yo'q cayáan so' ga Diose nu' cavii nu' ca'anj ei. ⁴⁸ Dan me se ase vaa i'na' nee man soj 'yaj se chá soj ro', danj gaa i'na' nimán soj qui'yáa 'unj adonj. ⁴⁹ Xa' xii soj sí man gaa naá, tzaj ne chá nij so' se cu'naj maná gaa chéé nij so' rej tacaan, gaa ne cavi'

nij so', ⁵⁰ tzaj ne vaa 'unj nihánj, ne ase vaa se chá cu'naj maná cavii rej xta' nanij rihaan xii soj vaa 'unj, ne sese chá soj mán 'unj ne daj chihaa mǐj se cavi' nimán soj ma'. ⁵¹ Dan me se 'unj me se chá vaa i'na' ya nanij rej xta', ne sese chá yo'o so' man se chá nanij rej xta' nihánj, ne yo'o gaa i'na' so' ei. Tzaj ne se chá rqué 'unj chá yuvii ro', nee manj me yo' ei. Ne yo' me qui'yáj, gaa ne ca'vee gaa i'na' ya cunudanj soj sij man rihaan chumii nihánj ei —taj Jesucristó rihaan nij síi uun chij rihaan nij yuvii israelitá a.

⁵² Dan me se nuchruj raa ndo'o nij síi uun chij yo' ga tuvi' nij so', ne xná'anj nij so' man tuvi' nij so', ne:

—Asa' ca'vee rque síi nihánj nee man ma'an so' chá yuvii ga —taj nij so', xná'anj nij so' man tuvi' nij so' a.

⁵³ Che'é dan cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se chá soj nee manj, ne sese se co'o soj ton manj, ne se ca'vee gaa i'na' nimán soj a ma'. ⁵⁴ Tzaj ne síi chá nee manj ne co'o ton manj me se yo'o gaa i'na' so' nu' cavii nu' ca'anj, ne asa' quisij güiii ca'anj ni'ya chumii nihánj, ne cunuu i'na' uún so', qui'yáj adonj. ⁵⁵ Xa' nee manj, tzaj ne nee chá ya ya me yo', ne ton manj me se na co'o ya me yo' ei. ⁵⁶ Ne síi chá nee manj ne co'o ton manj me se yo'o cayáan so' ga 'unj, ne yo'o cayáan 'unj ga so' chuguanj. ⁵⁷ Ase vaa vaa i'na' Réé 'unj síi ca'née mán 'unj rihaan chumii nihánj ro', danj vaa vaa i'na' 'unj, 'yaj Réé 'unj a. Ne xa' síi chá mán 'unj, tzaj ne yo'o gaa i'na' nimán so', qui'yáa 'unj a. ⁵⁸ 'Unj nihánj me se se chá 'na' rej xta' nanij rihaan yo'óo nihánj mé 'unj ei. Tzaj ne ino uxrá vaa 'unj ga se cu'naj maná chá xii soj gaa naá ei. 'O se cavi' cunudanj nij so' nanj á. Tzaj ne síi chá manj me se yo'o gaa i'na' nimán so' nu' cavii nu' ca'anj adonj. ⁵⁹ —Nana nihánj me nana tucu'yón Jesucristó rihaan nij yuvii cunuu chre' rá ve' tucu'yón nij

síí israelitá se-tucuꞵanj Moisés ve' nē chuman' Capernaum a.

Nanā nihánj taj xna'anj daj ca'mii síí tanáj xc̄o man Jesucristó nē daj ca'mii síí noco' raan man Jesucristó a

⁶⁰ Que'eē nij síí tucu'yón se-nanā Jesucristó cuno nanā nihánj nanā ca'mii Jesucristó, gaā nē cataj nij so':

—Sayuun uxrá vaa nanā nihánj chuguꞵanj. Daj chihaā mǐj sē cuno ní' doj nanā tu'va so' a ma' —taj nij so' rihaan tuvi' nij so' a.

⁶¹ Quene'en ma'ꞵan Jesucristó se vaa nanā nij yo' ca'mii ta'aj nij síí tucu'yón se-nanā so', gaā nē cataj Jesucristó rihaan nij so':

—Guun na'aj soj, qui'yaj nanā nihánj ei. ⁶² Che'é dan sese quene'en soj mán 'un̄j sij ca'néē Diosē n̄icaj yu'un̄j man yuvii se vaa cavii uún 'un̄j quínán' 'un̄j rej cayáán 'un̄j asij rque, nē daj guun rá soj ga. 'O se doj a guun na'aj soj che'é se nē cunō soj se-nanāj chuguꞵanj. ⁶³ Dan me se Nimán Diosē me se vaa 'yaj vaa i'na' nimán yuvii ei. Tzaj nē taj se gún' man neē man yuvii qui'yaj yo' gaā i'na' yuvii a ma'. Xa' nanā ca'mij rihaan soj, tzaj nē nanā cavii Nimán Diosē me nanā yo', nē ca'veē gaā i'na' nimán soj, qui'yaj se-nanāj ei. ⁶⁴ Tzaj nē ta'aj soj me síí ne amán rá uno se-nanāj a man adon̄j —taj Jesucristó rihaan nij síí tucu'yón se-nanā so' a.

'O se asij guun che'ē Jesucristó tucu'yón so' se-nanā so' man yuvii, nē aj ne'en so' me síí me síí cuchumán rá ni'yaj man so', nē aj ne'en so' me síí me síí taꞵuachén man so' rihaan nij síí taj ri'yun̄j man so' adon̄j. ⁶⁵ Gaā nē cataj uún Jesucristó:

—Che'é se nē cuchuman̄ rá soj ro', che'é dan cataj xna'anj 'un̄j rihaan soj se vaa a 'ó síí sē guun nucuaj ca'na' rihaan 'un̄j, sese nuveé Réj Diosē me síí qui'yaj ca'na' so' rihaan 'un̄j ma' —taj uún Jesucristó a.

⁶⁶ Che'é dan canicaj que'ee nij sí tucu'yón se-nana so', ne ca'ne' rá nij so' ga suun chée ga Jesucristó a.

⁶⁷ Che'é dan xná'anj Jesucristó man chujij nij sí tucu'yón se-nana so', cataj so':

—Soj do' me rá tanáj manj na' —taj Jesucristó, xná'anj so' man chujij nij sí tucu'yón se-nana so' a.

⁶⁸ Gaa ne cataj sí cu'naj Simón Pedró rihaan so' a:

—Taj yo'ó sí cuchi' núj rihaan, man Señor. 'Q se so' me sí a'mii nana qui'yaj gaa i'na' núj rihaan Diose nu' cavii nu' ca'anj, ⁶⁹ ne amán rá núj ni'yaj núj mán so', ne aj ne'en núj se vaa mé so' sí guee sí ca'née ma'an Diose rihaan chumij nihánj adonj —taj Simón Pedró rihaan Jesucristó a.

⁷⁰ Gaa ne cataj Jesucristó rihaan chujij nij so' a:

—Dan me se 'unj me sí narii man chujij nij soj se vaa canoco' soj manj, tzaj ne ase vaa ma'an sí chree vaa yo'ó tuvi' soj adonj —taj Jesucristó rihaan chujij nij so' a.

⁷¹ Nana yo' ca'mii Jesucristó ni'yaj Jesucristó man sí cu'naj Judas ta'níí sí cu'naj Simón Iscariote a. 'Q se sí cu'naj Judas yo', tzaj ne yo'ó tuvi' chujij nij sí tucu'yón se-nana Jesucristó me so', tzaj ne me so' sí tacuachén man Jesucristó rihaan nij sí taj ri'yunj man Jesucristó a.

7

Nana nihánj taj xna'anj che'é nana ca'mii Jesucristó ga nij tinúú so' a

¹ Quisij ca'mii Jesucristó nu' nana dan, gaa ne cachée Jesucristó estadó Galilea a. 'Q se ne ca'vej rá so' cachee so' estadó Judea, che'é se nano' nij sí uun chij rihaan nij yuvij israelitá man so', ne ticavi' nij so' man Jesucristó, rá nij so' a.

² Dan me se daj doj quisij cha'anj navij rá nij yuvii israelitá cha'anj une' nij so' ve' yacataj a. ³ Che'é dan cataj nij tinúú Jesucristó rihaan so' a:

—Cavii so' ca'anj so' estadó Judea, gaa ne quene'en nij síi tucu'yón se-nana so' nij suun sa' nocoo 'yáá so', tinuj. ⁴ 'Q se sese me rá so' qui'yáá so' suun sa' nocoo, ne ca'anj so' rej quene'en nij síi man rihaan chumii nihánj man so' á —taj nij tinúú ma'an Jesucristó rihaan so' a.

⁵ 'Q se ndaa ma'an nij tinúú Jesucristó ne cuchuman rá ni'yaj man Jesucristó a ma'. ⁶ Che'é dan cataj Jesucristó rihaan nij so':

—Ataa quisij güii no xcúún 'unj qui'yaj suun 'unj á. Se-suun ma'an soj me se a me ma'an güii ca'vee qui'yaj suun soj se-suun soj ei. ⁷ Taj che'é quitaj ri'yunj nij síi man rihaan chumii nihánj man soj ma'. 'Unj ro', vaa che'é quitaj ri'yunj nij so', ese 'unj me síi taj xna'anj rihaan nij so' se vaa chi'ii ndo'o vaa 'yaj nij so' adonj. ⁸ Ca'anj soj cha'anj xraj ei. Xa' 'unj, tzaj ne se ca'anj 'unj cha'anj ma'. 'Q se ataa quisij güii qui'yaj sunj nanj adonj ⁹ —taj Jesucristó rihaan nij so', gaa ne quináj so' estadó Galilea a.

Nana nihánj taj xna'anj daj qui'yaj Jesucristó gaa canuû cha'anj une' nii ve' yacataj a

¹⁰ Dan me se gaa quisij cavii nij tinúú Jesucristó ca'anj nij so' cha'anj, gaa ne cavii ma'an Jesucristó ca'anj so' cha'anj uún a. Tzaj ne ca'anj yuve so' a. ¹¹ Che'é dan me nano' nij síi uun chij rihaan nij yuvii israelitá man Jesucristó rej canuû cha'anj yo' a. Ne xná'anj nij so' man tuvi' nij so', cataj nij so':

—Me rej vaj so' ga —taj nij so', xná'anj nij so' man tuvi' nij so' a.

¹² Ne nanó yuve ndo'o nij yuvii cuentó che'é Jesucristó a. Dan me se ta'aj nij yuvii cataj:

—Síí sa' me so' á —taj ta'aj nij yuvii a.

Tzaj ne yo'ó ta'aj nij yuvii cataj:

—Taj ma'. Síí tiha' yu'unj man nij yuvii me so' ei —taj yo'ó ta'aj nij yuvii yo' a.

¹³ Tzaj ne a 'ó nij yuvii ne ca'mii ranga' che'é Jesucristó ma'. 'O se cuchu'vi' nij yuvii ni'yaj nij yuvii man nij síí uun chij rihaan nij so' a.

¹⁴ Dan me se gaa anuê cha'anj, ne cavii Jesucristó rá nuvíí nocoo, ne tucu'yón so' man nij yuvii a. ¹⁵ Che'é dan caráya'anj nij síí uun chij rihaan nij yuvii israelitá, ne cataj nij so':

—Nuveé sij tucu'yón me síí nihánj ma'. Me rej nari' so' se-nana Diose ga —taj nij síí uun chij yo' ni'yaj nij so' man Jesucristó a.

¹⁶ Che'é dan cataj Jesucristó rihaan nij so' a:

—Xa' se-nanaj, tzaj ne nuveé nana cavii raá 'unj me nana nihánj ma'. 'O se se-nana Diose síí ca'née manj me nana nihánj ei. ¹⁷ Dan me se sese me rá yo'ó so' cunoo so' rihaan Diose, ne quene'en so' se vaa nuveé nana avii raá 'unj me nana tucu'yón 'unj ma'. 'O se quene'en so' se vaa se-nana Diose me nana yo' a. ¹⁸ Xa' síí a'mii se-nana ma'an, tzaj ne inanj me rá so' ca'mii sa' yuvii che'é ma'an so', ne me rá so' cavii sa' ma'an so' ei. Tzaj ne sese me rá yo'ó so' ca'mii sa' yuvii che'é síí ca'née man so', ne inanj nana ya che'é síí ca'née man so' a'mii so', ne ne nano' so' chrej chi'lii ma'. ¹⁹ Ya uxrá rqué síí cu'naj Moisés se-tucuanj so' rihaan soj, tzaj ne a 'ó tuvi' soj na'vej rá qui'yaj tucuaán yo' a ma'. Me che'é nano' soj daj qui'yaj soj, ne cavi' 'unj ga —taj Jesucristó rihaan nij síí uun chij rihaan nij yuvii israelitá a.

²⁰ Gaa ne cataj nij yuvii rihaan Jesucristó a:

—Nuu nana chree nimán so' á. Me síí me rá ticavi' mán so', rá so' ga —taj nij yuvii rihaan Jesucristó a.

²¹ Gaa ne cataj Jesucristó rihaan nij so' a:

—Gaa rque me se orún' suun sa' nocoo qui'yáj, ne caráya'anj taran' nij soj se vaa qui'yáá 'unj suun sa' nocoo güii naránj rá ní' a. ²² Dan me se ya uxrá cataj xna'anj Moisés rihaan ní' se vaa ca'ne' ní' ta'nga' man snó'o che'é rej ca'vee cunu sa' ní' rihaan Diose adonj. Tzaj ne nuveé tucuñanj cuchruij ma'an Moisés me yo' ma'. 'O se se-tucuñanj xii ní' nij síi man gaa naá me yo' adonj. Ne ndaa güii naránj rá a'ne' soj ta'nga' man snó'o ei. ²³ Dan me se che'é se me rá soj qui'yaj soj nu' se-tucuñanj Moisés, che'é dan a'vej rá soj cata' ta'nga' man snó'o güii naránj rá soj, tzaj ne me che'é axrij yuvaa soj manj che'é yan cunuu sa' nu' nee man yo'o snó'o qui'yáj güii naránj rá soj ga. ²⁴ Se guun xcaj soj cuentá che'é se vaa 'yaj yuvii ni'yaj soj che'é inanj tucuáan noco' soj ma'. 'O se xcaj soj cuentá daj me rá Diose, ne cunu cuu soj doj, qui'yaj soj ei —taj Jesucristó rihaan nij yuvii a.

²⁵ Che'é dan cataj ta'aj nij síi ne chuman' Jerusalén:

—Ne sij nihánj, nuveé sij nano' nii ticavi' nii man me so' na'. ²⁶ Ne veé a'mii ranga' so' nihánj, ne a' ó nana ne a'mii nij so' rihaan so' man asanj. Ya ya síi ca'née Diose tinanii man yuvii rihaan sayuun me so', rá nij xrej atá suun sa' doj na'. ²⁷ Tzaj ne ne'en ní' me rej cavii síi nihánj ei. Tzaj ne taj síi ne'en me rej cavii síi ca'nej Diose tinanii man yuvii rihaan sayuun asa' ca'na' so' man asanj —taj nij síi ne chuman' Jerusalén yo' a.

²⁸ Che'é dan sca' ndo'o ca'mii Jesucristó, cataj so':

—Ne'en soj manj, ne ne'en soj me rej cavii 'unj ei. Tzaj ne ne ca'na' ma'anj ma'. 'O se ya a'mii síi ca'née manj, tzaj ne ne ne'en uxrá soj man so' a ma'. ²⁹ 'Unj me síi ne'en man so', che'é se cavii 'unj rihaan so', ne so' me síi ca'née manj adonj —taj Jesucristó rihaan nij yuvii a.

³⁰ Che'é dan nano' nij so' daj qui'yaj nij so' ne quita'aa nij so' man Jesucristó, tzaj ne a 'ó nij so' ne quisij rá quita'aa man so' a ma'. 'Q se ataa quisij güii ca'vee qui'yaj nij so' danj man so' a.

³¹ Ne que'ee nij yuvií cuchumán rá ni'yaj man so', ne cataj nij síí cuchumán rá ni'yaj man so':

—Ca'vee se ca'na' yo'ó so' cataj so' se vaa tinanii so' man ní' rihaan sayuun, tzaj ne daj chihaa míj se quisíj so' qui'yaj so' doj suun sa' nocoo rihaan suun sa' nocoo qui'yaj síí nihánj a ma'. Ya ya sij tinanii man ní' rihaan sayuun me síí nihánj adonj —taj nij yuvií ni'yaj nij so' man Jesucristó a.

³² Dan me se gaa cuno nij síí fariseo se vaa ca'mii yuve nij yuvií nana dan che'é Jesucristó, gaa ne ca'née nij xrej ata suun nocoo doj ca'née nij síí fariseo man tanuu ca'anj nij tanuu quita'aa nij tanuu man Jesucristó a. ³³ Che'é dan cataj Jesucristó:

—Doj güii cayáán 'unj ga nij soj, ne cavií 'unj quínán' 'unj rihaan síí ca'née manj 'na' 'unj nanj ei. ³⁴ Nano' soj manj, tzaj ne se nari' soj manj a ma'. Ne se guun nucuaj soj cuchí' soj rej cayáán 'unj a ma' —taj Jesucristó a.

³⁵ Che'é dan nij síí uun chij rihaan nij yuvií israelitá cataj rihaan tuvi' nij so' a:

—Me rej ca'anj síí nihánj, ne se nari' ní' man so' ga. Ca'anj so' rihaan tuvi' ní' síí ne chiháán nij yuvií yanj na'. Tucuyón so' se-nana so' rihaan nij yuvií yanj na'. ³⁶ 'Q se cataj so' nana nihánj se vaa: “Nano' soj manj, tzaj ne se nari' soj manj a ma'. Ne se guun nucuaj soj cuchí' soj rej cayáán 'unj a ma'”. Me che'é tu'va so' danj, rá soj ga —taj nij síí uun chij yo', xná'anj nij so' man tuvi' nij so' a.

³⁷ Dan me se daj yo'ó güii navij cha'anj nocoo sa' ndo'o yo', ne güii yo' canicun' Jesucristó, ne cataj so':

—Sese ase vaa síí nacoo ndo'o na vaa soj, ne ca'na' soj rihanj, ne rquej na achiin ya man soj á. ³⁸ Xa' síí amán rá ni'yaj manj, tzaj ne quiri' so' se vaa taj danj Diose rihaan ní', ne dan me se ase vaa 'o chráá sa' ndo'o nuu na sa' inanj ro', danj gaa se sa' cunuû nimán síí amán rá ni'yaj manj, ne ca'vee gaa i'na' nimán so' adonj. ³⁹ —Danj taj Jesucristó, ca'mii so' che'é Nimán Diose cunuû nimán nij síí cuchumán rá ni'yaj man so' a. 'O se ataa ca'na' Nimán Diose rihaan yuvi, ese ataa quisij güii cavi' so' rihaan rcutze a.

⁴⁰ Che'é dan ta'aj nij yuvi cuno nana nihánj cataj:

—Ya ya sij nata' se-nana Diose gaa naá sij ca'na' uún rihaan chumii nihánj me síí nihánj nanj á —taj ta'aj nij yuvi a.

⁴¹ Yo'ó ta'aj nij yuvi cataj:

—Sij ca'née Diose tinanii man ní' rihaan sayuun me síí nihánj ei —taj yo'ó ta'aj nij so' a.

Tzaj ne yo'ó ta'aj nij yuvi cataj:

—Xa' síí ca'nej Diose tinanii man ní' rihaan sayuun, tzaj ne nuveé sij cavii estadó Galilea me so' ma'. ⁴² 'O se danj Diose taj se vaa ta'níí ta'nij si'no síí cu'naj David síí cane gaa naá me síí ca'nej Diose, ne sij cavii chiháán síí cu'naj David chuman' Belén me uún so' adonj —taj yo'ó ta'aj nij yuvi uún a.

⁴³ Che'é dan guun vij ca'mii nij yuvi, ni'yaj nij yuvi man Jesucristó a. ⁴⁴ Ne guun rá ta'aj nij so' quita'aa nij so' man Jesucristó, tzaj ne taj vaj síí quisíj rá quita'aa man so' a ma'. ⁴⁵ Che'é dan canicaj nij tanuu ca'anj uún nij tanuu rihaan nij xrej ata suun nocoo doj do', rihaan nij síí fariseo do', gaa ne cataj nij xrej do', nij síí fariseo do', rihaan nij tanuu:

—Me che'é ne ca'na' Jesucristó ga soj, qui'yaj soj ga —taj nij so', xná'anj nij so' man nij tanuu yo' a.

⁴⁶ Gaa ne cataj nij tanuu:

—Tzaj ne cunaj uxrá vaa naná a'mii so', ne taj vaj yo'ó yuvii ne'en ca'mii naná a'mii so' a ma' —taj nij tanuu yo' a.

⁴⁷ Che'é dan cataj nij síi fariseo rihaan nij tanuu a:

—Tiha' yu'unj so' man soj do' nanj ei. ⁴⁸ 'Q se a 'ó nij síi uun chij do', a 'ó nij síi fariseo do', ne cuchuman rá se vaa sij ca'néé Diose me so' a ma'. ⁴⁹ Ne xa' nij yuvii, tzaj ne ne ne'en nij yuvii se-tucuanj Moisés, ne inanj sayuun quiran' nij yuvii yo', qui'yaj Diose chuguanj —taj nij síi fariseo rihaan nij tanuu yo' a.

⁵⁰ Dan me se nicun' síi cu'naj Nicodemo ga nij so', ne yo'ó tuvi' nij so' me so', ne síi ca'anj nano cuentó ga Jesucristó rej nii gaa rque doj me so', ne cataj so':

⁵¹ —Tzaj ne se-tucuanj Moisés taj se vaa ne nó xcúún ní' ca'ne' ní' cacun' che'é yo'ó so', sese ataa cunó ní' naná a'mii so' ne sese ataa xcaj ní' cuentá daj 'yaj so' ma' —taj síi cu'naj Nicodemo rihaan yo'ó nij síi fariseo yo' a.

⁵² Gaa ne cataj nij so' rihaan síi cu'naj Nicodemo a:

—Me che'é me rá so' ca'mii sa' so' che'é Jesucristó ga. 'Q se sij cavii estadó Galilea mé so' ga so' na'. Tucuyón so', ne xcaj so' cuentá se vaa a 'ó síi nata' se-naná Diose ne avii estadó Galilea, 'yaj Diose ma' —taj nij síi fariseo rihaan síi cu'naj Nicodemo yo' a. ⁵³ Dan me se cavii nij so', ne quinan' 'ó 'ó nij so' tucua' nij so' a.

8

¹ Tzaj ne cavii Jesucristó xráá quij cu'naj Quij man Chruun Olivó a.

Naná nihánj taj xna'anj daj ca'mii Jesucristó ga nij síi me rá go' yahij man chana tumé cacun' a

² Dan me se rej síj güii me se ca'anj uún Jesucristó rá nuvíi nocoo a. Gaa ne cuchi' cunudanj nij yuvii rihaan so', ne ca'anj quitaj so' chruun xlá, ne tucuyón so' man

nij yuvij yo' a. ³ Veé dan, ne ca'na' nij síí naqui'yaj cuu se-tucuanj Moisés rihaan yuvij ca'na' nij síí fariseo do', ne nicaj nij so' man 'o chana a. Ne chana nicaj nij so' me se aj nari' nii man chana yo' gaa cotoj no' ga snó'o, tzaj ne nuveé nica no' me snó'o cotoj ga no' a. Che'é dan quita'aa nij so' man no', ne nicaj nij so' man no' ca'na' nij so' rihaan Jesucristó, ne cachrón nij so' man chana tanuu ma'an nij so' ga Jesucristó a. ⁴ Gaa ne cataj nij so' rihaan Jesucristó a:

—Chana nihánj me se maan orá cotoj no' ga yo'ó snó'o, ne nari' nii man no', ne quita'aa nii man no', maestro. ⁵ Dan me se se-tucuanj Moisés taj se vaa no xcuún ní' go' ní' yahij man chana vaa danj ndaa se cavi' no', taj tucuaán yo' nanj á. Che'é dan me, daj qui'yaj ní', rá so' ga —taj nij so', xná'anj nij so' man Jesucristó a. ⁶ 'O se guun rá nij so' ca'mii Jesucristó yo'o nana vaa nij che'é se-tucuanj Moisés, gaa ne ca'vee cuta' nij so' cacun' xráá Jesucristó che'é nana ca'mii so' a.

Dan me se ca'anj canej ruj Jesucristó, ne cachrón ra'a so' letrá rihaan yo'óo a. ⁷ Tzaj ne yo'o tirquee nij so' xná'anj nij so' man so' a. Che'é dan canicun' caya uún so', ne cataj so' rihaan nij so' a:

—Sese danj me rá soj, ne ca'vee, tzaj ne a me ma'an 'o soj taj a doj cacun' tumé ro', ca'vee go' yahij man no' asino yaan ei —taj Jesucristó rihaan nij so', tzaj ne aj ne'en Jesucristó se vaa taran' nij so' ata cacun' a.

⁸ Gaa ne ca'anj canej ruj uún Jesucristó, ne cachrón uún so' letrá rihaan yo'óo yo' a.

⁹ Veé dan, gaa ne guun na'aj nij so' gaa cuno nij so' se-nana Jesucristó, ne nayón nij so' chrej, ne ca'anj nij so' a. Dan me se ndaa 'o 'o nij so' nayón chrej, ne asino yaan ca'anj nij síí cachij doj, gaa ne canoco' nij síí tachruu doj xcó nij so', ne ca'anj cunudanj nij so' nanj adonj. Ndaa síj,

gaa ne quináj uun Jesucristó, ne nicun' orún' chana yo' rihaan so' a. ¹⁰ Gaa ne canicun' caya uún Jesucristó, ne cataj so' rihaan chana yo':

—Ca'anj taran' nij so', nanj nocoj. Me rej vaj nij sí cuta' cacun' xráá so' ga. A 'ó nij so' ne quisij rá cavi' so' a na' —taj Jesucristó, xná'anj so' man chana yo' a.

¹¹ Gaa ne cataj chana yo':

—Taj vaj a 'ó sí me rá ca'mii danj, a man Señor —taj chana yo' rihaan Jesucristó a.

Gaa ne cataj Jesucristó rihaan no' a:

—A 'unj se cataj se vaa qui'yaj nii sayuun mán so' a ma'. Dan me se ca'anj so', ne se qui'yáá so' a doj cacun' rej rihaan so' a ma' —taj Jesucristó rihaan chana yo' a.

Nana nihánj taj xna'anj se vaa cataj Jesucristó se vaa ya vaa se-nana so' a

¹² Gaa ne cataj uún Jesucristó rihaan nij xrej ata suun nocoo doj do', rihaan nij sí fariseo do' a:

—Ase vaa ya'an chuguun vaa 'unj rihaan soj sij man rihaan chumii nihánj adonj. Dan me se sí nocó' manj ro', se cachéé so' rej rmi' ma'. 'Unj ro', me ya'an chuguun cachéé ga so', ne xcáj so' cuentá me rej vaj so', qui'yáj, ne che'é dan gaa i'na' ya nimán so' nu' cavii nu' ca'anj adonj —taj Jesucristó no nij so' a.

¹³ Che'é dan cataj nij sí fariseo rihaan so' a:

—Tzaj ne inanj ma'án so' me sí taj xna'anj che'é ma'án so' á. Nuveé nana ya me nana a'mii so' che'é ma'án so' a ma' —taj nij sí fariseo rihaan Jesucristó a.

¹⁴ Gaa ne cataj Jesucristó rihaan nij so' a:

—Nda' se ma'anj me sí a'mii che'ej, tzaj ne ya vaa se-nanaj ei. 'O se 'unj me sí ne'en me rej cavij, ne 'unj me sí ne'en me rej ca'anj 'unj ei. Ne xa' soj, tzaj ne ne ne'en soj me rej cavij ne ne'en soj me rej ca'anj 'unj a ma'.

¹⁵ Xa' soj, tzaj ne inanj uta' soj cacun' xráá yuvi che'é inanj

se vaa ruvi' rihaan soj nanj ei. Tzaj ne 'unj me se ne utá' 'unj cacun' xráá a 'ó yuvií ma'. ¹⁶ Tzaj ne ca'vee se xcaj 'unj cuentá che'é yuvií daj vaa yuvií, tzaj ne ya xcaj 'unj cuentá che'é yuvií ei. Dan me se nuveé orún' 'unj me síí xcaj cuentá che'é yuvií ma'. 'Q se vaa Réj síí ca'née manj rihaan chumií nihánj, ne so' me síí racuíj manj adonj. ¹⁷ Ne se-tucuanj Moisés tucuáán noco' soj me se nana yo' taj se vaa sese cyaan vaa nana a'mii vij roj so', ne ya vaa se-nana roj so', taj nana yo' ei. ¹⁸ Dan me se 'unj me síí taj xna'anj che'é ma'anj, ne taj xna'anj Réj síí ca'née manj uún adonj —taj Jesucristó rihaan nij so' a.

¹⁹ Che'é dan xná'anj nij so' man Jesucristó, cataj nij so':
—Me rej ne rée so' ga —taj nij so' a.

Gaa ne cataj Jesucristó:

—Ne ne'en uxrá soj manj do', man Réj do' ma'. 'Q se sese ne'en ya soj manj, ne ne'en soj man Réj uún adonj —taj Jesucristó rihaan nij so' a.

²⁰ Nu' nihánj me nana tucu'yón Jesucristó gaa canicun' so' rá nuvíí noco rej rqué yuvií sa'anj rihaan Diose a. Ne taj vaj yuvií quita'aa man so' a ma'. 'Q se ataa quisij güii ca'vee qui'yaj nii sayuun man Jesucristó nanj adonj.

Nana nihánj taj xna'anj se vaa cataj Jesucristó se vaa daj chihqa mij se guun nucuaj nij síí uun chij rihaan nij yuvií israelitá cuchí' nij so' rihaan so' a ma'

²¹ Che'é dan cataj uún Jesucristó rihaan nij síí uun chij rihaan nij yuvií israelitá a:

—'Unj nihánj me se cavií 'unj ca'anj 'unj, gaa ne nano' soj manj, tzaj ne asa' cavi' soj, ne yo'q quitaj nu' cacun' tumé soj xráá soj, ne se guun nucuaj soj cuchí' soj rej ca'anj 'unj ma' —taj Jesucristó rihaan nij so' a.

²² Che'é dan xná'anj nij síí uun chij rihaan nij yuvií israelitá man tuvi' nij so', cataj nij so':

—Ticavi¹ so' man ma'an so', rá soj na'. Che'é dan cataj so' se vaa se guun nucuaj ní' cuchí' ní' rej ca'anj so', rá soj na' —taj nij so', xná'anj nij so' man tuvi' nij so' a.

²³ Gaa ne cataj Jesucristó rihaan nij so':

—Dan me se xa' soj, tzaj ne nanj sij man rihaan chumii nihánj me soj, ne 'unj, tzaj ne sij cavii rej xta' mej nanj á. ²⁴ Che'é dan cataj xna'anj 'unj rihaan soj se vaa asa' cavi' soj, ne yo'o quitaj nu' cacun' tumé soj xráá soj nanj ei. 'O se sese se cuchumán rá soj se vaa Diose mé 'unj, ne asa' cavi' soj, ne yo'o quitaj nu' cacun' tumé soj xráá soj nanj adonj —taj Jesucristó rihaan nij so' a.

²⁵ Che'é dan xná'anj nij so' man Jesucristó, cataj nij so':

—Me sí mé so' ga —taj nij so', xná'anj nij so' man Jesucristó a.

Gaa ne cataj Jesucristó rihaan nij so' a:

—Aj cataj xna'anj 'unj rihaan soj asino yaan me sij mej ei. ²⁶ Vaa ndo'o nana no xcúnj ca'mij che'é soj, ne no xcúun uxraj ya ca'ne' 'unj cacun' che'é soj ei. Dan me se sí ca'née manj, tzaj ne so' me sí a'mii ya uxrá, ne inanj nana ca'mii so' cunoj me nana taj xna'anj 'unj rihaan soj sij man rihaan chumii nihánj adonj —taj Jesucristó rihaan nij so' a.

²⁷ Tzaj ne ne quene'en nij so' se vaa ca'mii Jesucristó che'é Rej so' Diose sí ca'née man Jesucristó a ma'. ²⁸ Che'é dan cataj Jesucristó rihaan nij so' a:

—Asa' quisíj cavii 'unj xta' qui'yaj soj, gaa ne xcaj ya soj cuentá se vaa ya ya sij ca'née Diose nicaj yu'unj man yuvii mej ei. Ne ne 'yáá 'unj se vaa avii inanj raá ma'anj ma'. 'O se a'mii 'unj ndaa vaa tucu'yón Réj manj adonj. ²⁹ Ne so' me sí ca'née manj rihaan soj, ne yo'o nicun' so' ga 'unj, ne a doj ne tanáj yaníj so' manj a ma'. 'O se 'yáá 'unj se inanj me rá ma'an so' qui'yáj adonj —taj Jesucristó rihaan nij so' a.

³⁰ Gaa quisíj ca'mii Jesucristó nana vaa danj, gaa ne cuchumán rá que'ee nij síi uun chij rihaan nij yuvii israelitá ni'yaj nij so' man Jesucristó a.

Nana nihánj taj xna'anj daj ca'mii Jesucristó ga nij síi uun chij rihaan nij yuvii israelitá síi cuchumán rá ni'yaj man so' a

³¹ Che'é dan cataj Jesucristó rihaan nij síi uun chij rihaan nij yuvii israelitá síi cuchumán rá ni'yaj man so' a:

—Sese yo'õ canocõ' soj se-nanaj, ne sij ya ya tucu'yón se-nanaj me soj, ³² ne quene'en soj nu' nana ya, ne quinanii soj rihaan suun uun mozó, qui'yaj nana ya yo' chuguanj —taj Jesucristó rihaan nij so' a.

³³ Gaa ne cataj nij so' rihaan Jesucristó:

—'O se ta'níi ta'nij si'no síi cu'naj Abraham síi cane gaa naá me núj, ne daj chihaa míj ne guun núj mozó a ma'. Me che'é cataj so' se vaa quinanii núj rihaan suun uun mozó ga —taj nij so', xna'anj nij so' man Jesucristó a.

³⁴ Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa síi 'yaj cacun' ro', me síi uun mozó rihaan cacun' yo' ei. ³⁵ Ne xa' mozó, tzaj ne se ca'vee guun chij mozó, ne se ca'vee cane so' nu' cavii nu' ca'anj ma'. Ne xa' ta'níi síi tucua ve', tzaj ne so' me síi ca'vee cane rá ve' nu' cavii nu' ca'anj adonj. ³⁶ Che'é dan me sese tinanii ta'níi Diose man soj rihaan suun uun mozó, ne ya ya nuveé sij uun mozó me soj a ma'.

³⁷ “Aj ne'enj se vaa ta'níi ta'nij si'no síi cu'naj Abraham me soj á. Tzaj ne nano' uxrá soj daj qui'yaj soj ne cavi' 'unj ei. Danj 'yaj soj che'é rej na'vej rá soj nari' soj canocõ' soj se-nanaj ei. ³⁸ Dan me se a'mii 'unj inanj se vaa quene'enj qui'yaj Réj a. Tzaj ne nij soj me síi 'yaj ndaa vaa cataj rej soj rihaan soj adonj —taj Jesucristó rihaan nij so' a.

³⁹ Gaa ne cataj nij so' rihaan Jesucristó a:

—Xii núj me síí cu'naj Abraham gaa naá adonj —taj nij so' a.

Gaa ne cataj Jesucristó rihaan nij so' a:

—Sese ya ya ta'níí ta'nij si'no síí cu'naj Abraham me soj, ne qui'yaj soj ndaa vaa qui'yaj síí cu'naj Abraham yo' asuun tzaj a. ⁴⁰ Tzaj ne cuano nihánj me se nano' soj daj qui'yaj soj ne cavi' 'unj, ne 'unj me síí cataj xna'anj rihaan soj nu' nana ya cataj xna'anj Réj Diose rihanj adonj. Dan me se ino uxrá vaa 'yaj soj ga síí cu'naj Abraham adonj. ⁴¹ Maan se 'yaj soj inanj se vaa 'yaj rej soj nanj á —taj Jesucristó rihaan nij so' a.

Che'é dan cataj nij so' rihaan Jesucristó a:

—Nuveé ta'nij cacun' me núj ma'. 'Q se oruun Rej núj, ne Diose me so' nanj á —taj nij so' a.

⁴² Gaa ne cataj Jesucristó rihaan nij so' a:

—Sese Diose me Rej soj, ne cunuu 'ee rá soj manj se danj ei. 'Q se 'unj me síí cavii rej nicun' Diose, ne ca'ná' 'unj nihánj chuguanj. Dan me se ne ca'na' ma'anj nihánj ma'. 'Q se so' me síí ca'neé manj ca'naj nihánj adonj.

⁴³ “Che'é se na'vej rá soj cunō soj se-nanaj, che'é dan sayuun uxrá vaa nana a'mij rihaan soj adonj. ⁴⁴ 'Q se ta'níí síí chree me soj, ne me rá soj qui'yaj soj inanj ndaa vaa me rá rej soj síí chree qui'yaj soj adonj. Ne xa' so', tzaj ne síí ticavi' man yuvii me so' asij guun che'e chumii nihánj, ne daj chihaa míj ne ne'en so' ca'mii nicá so' nana ya ma'. 'Q se ne aran' rá so' ca'mii so' nana ya a man adonj. Danj inanj vaa so', a'mii ne so', che'é se síí ne inanj me so', ne síí tucu'yón man yuvii ca'mii ne yuvii me uún so' adonj.

⁴⁵ “Ne xa' 'unj, tzaj ne che'é se nana ya a'mij rihaan soj, che'é dan ne amán rá soj uno soj se-nanaj a ma'. ⁴⁶ A 'ó tuvi' soj se ca'vee quirii cacun' cutá' xráj a ma'. Inanj nana ya a'mij rihaan soj ei. Me che'é ne cuchuman rá soj cunō soj se-nanaj ga. ⁴⁷ 'Q se síí noco' ya man Diose me

síi uno se-nanā Dioṣe adonj. Tzaj ne nuveé sij noco' man Dioṣe me soj a ma'. Che'é dan ne uno soj a man adonj —taj Jesucristó rihaan nij síi uun chij rihaan nij yuvii israelitá a.

⁴⁸ Gaa ne cataj nij síi uun chij rihaan nij yuvii israelitá a:

—Yā uxrá vaa nanā ca'mii núj se vaa nuveé tuvi' núj mé so' a ma'. 'O se síi cavii estadó Samaria mé so' chuguanj. Nuū nanā chree nimán so' ei —taj nij so' rihaan Jesucristó a.

⁴⁹ Gaa ne cataj Jesucristó:

—Taj vaj nanā chree nuū nimanj ma'. 'O se aráj cochróo 'unj rihaan Réj Dioṣe, tzaj ne ne aráj cochroj soj rihanj a ma'. ⁵⁰ Ne 'yaj suun 'unj che'é yan cataj yuvii se vaa sij sa' mej ma'. Tzaj ne vaa Dioṣe, ne so' me síi me rá cataj yuvii se vaa sij sa' mé 'unj, ne so' me síi ca'ne' cacun' che'é yuvii adonj. ⁵¹ Yā yā cataj xna'anj 'unj rihaan soj cuano se vaa sese cunō soj se-nanaj, ne daj chihāa mǐj se cavi' soj a ma' —taj Jesucristó a.

⁵² Che'é dan nij síi uun chij rihaan nij yuvii israelitá cataj rihaan so' a:

—Cuanō nihánj me se ne'en yā núj se vaa nuū nanā chree nimán so' á. 'O se cavi' síi cu'naj Abraham cavi' nij síi nata' se-nanā Dioṣe gaa naá cavi', ne nihánj me taj so' se vaa sese cunō núj se-nanā so', ne daj chihāa mǐj se cavi' núj, taj so' man asanj. ⁵³ Dan me se gaa naá me se cavi' xii núj síi cu'naj Abraham, ne sij sa' doj mé so' rihaan so', rá so' na'. Ne cavi' nij síi nata' se-nanā Dioṣe uún a. Daj sij mé so', rá so' ga —taj nij so' rihaan Jesucristó a.

⁵⁴ Gaa ne cataj Jesucristó rihaan nij so' a:

—Sese cataj 'unj se vaa sij sa' me ma'anj, ne taj yu'vee nó se-nanaj a ma'. Tzaj ne vaa Réj, ne so' me síi taj se vaa sa' 'yáj adonj. Dan me se Dioṣe me Réj, ne nij soj me síi taj se vaa noco' soj man so', ⁵⁵ tzaj ne ne'en uxrá soj man

so' a ma'. Tzaj ne 'unj me sí ne'en man so' adonj. Dan me se sese cataj 'unj se vaa ne ne'enj man so', ne tuvi' soj sí ne mej nanj á. Tzaj ne ya ya ne'enj man so', ne nocó' 'unj se-nana so' chuguanj.

⁵⁶ “Dan me se guun niha' uxrá rá xii soj sí cu'naj Abraham che'é se quene'en so' se vaa vaa güii quene'en so' se vaa ca'na' 'unj rihaan chumii nihánj a. Dan me se quene'en so' se vaa ca'ná' 'unj, gaa ne guun niha' ya uxrá rá so' ei —taj Jesucristó rihaan nij so' a.

⁵⁷ Che'é dan nij sí uun chij rihaan nij yuvi israelitá cataj rihaan Jesucristó a:

—Ataa quisij so' vij chihaa chi' yo' a. Asa' a'vee taj so' se vaa quene'en so' man Abraham ga —taj nij so', xná'anj nij so' man Jesucristó a.

⁵⁸ Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa asij ataa ca'ngaa sí cu'naj Abraham, ne aj nej nanj adonj —taj Jesucristó rihaan nij so' a.

⁵⁹ Che'é dan quita'aa nij so' yahij, ne go' nij so' man Jesucristó, rá nij so' a. Tzaj ne curihanj yuve so' rá nuvií nocoo yo', ne ca'anj so' a. Dan me se maan tanuu sca'núj nij so' cachén Jesucristó, ca'anj so' a.

9

Nana nihánj taj xna'anj se vaa naxra' rihaan 'o sí tuchrii, qui'yaj Jesucristó a

¹ Dan me se cavii Jesucristó ca'anj so', gaa ne quene'en so' 'o sí tuchrii a. Dan me se sí tuchrii yo' me se tuchrii so' asij ca'ngaa so' a. ² Gaa ne xná'anj nij sí tucu'yón se-nana Jesucristó man Jesucristó, cataj nij so':

—Me che'é tuchrii sí nihánj, ga man maestro'. Ma'an so' qui'yaj cacun' na'. Ase rej so' qui'yaj cacun' xa' —taj nij so', xná'anj nij so' man Jesucristó a.

³ Gaa ne cataj Jesucristó:

—Nuveé ma'an so', nuveé rej so' ga nii so' do', me sí tumé cacun' ma'. Maan se Diose me rá quene'en ní' daj qui'yaj Diose che'é so' adonj. ⁴ 'Q se no xcúun ní' qui'yaj suun ní' se-suun sí' ca'neé manj rihaan chumii nihánj adonj. Ase vaa rej ranga' vaa yo' yaj, ne ca'vee qui'yaj suun ní' yaj ei. Tzaj ne quisij güii ca'ne' rá ní', ne ase vaa rej ni ro', gaa güii yo', ne se ca'vee qui'yaj suun ní' doj a ma'. ⁵ Tzaj ne cuano nihánj me se vaj 'unj rihaan chumii nihánj, ne ase vaa ya'an chuguun ro', danj vaa 'unj rihaan chumii nihánj adonj —taj Jesucristó rihaan nij sí' tucu'yón se-nana so' a.

⁶ Quisij ca'mii so' danj, gaa ne quirii talúj so' rihaan yo'óo, gaa ne qui'yaj so' doj sigui' man yo'óo yo', ne caxrj so' sigui' yo' rihaan sí' tuchrii yo' a. ⁷ Gaa ne cataj so' rihaan sí' tuchrii yo' a:

—Ca'anj so' na'nu' so' rihaan so' rá na Siloé á —taj Jesucristó rihaan so' a.

Dan me se cuyaan vaa nana “Siloé” yo' ga nana “rasuun ca'neé nii man” a.

Veé dan me se ca'anj sí' tuchrii yo', ne na'nu' so' rihaan so' rá na yo', gaa ne canicaj so' ca'na' uún so', ne curuvi' rihaan so' a.

⁸ Dan me se nij sí' yanj nichrun' yan yanj so' do', nij sí' aj ne'en man so' gaa tuchrii so' do', cataj nij so':

—Ne sí' nihánj me sí' cane cachín caridad gaa rque, rá soj na' —taj nij so' ni'yaj nij so' man sí' naxra' rihaan yo' a.

⁹ —Danj asanj. Veé ya so' ei —taj ta'aj nij so' a.

Ne yo'ó ta'aj nij so' cataj:

—Taj ma'. Maan se ase ni'yaj guee sí' cachín caridad ro', danj ni'yaj guee sí' nihánj, tzaj ne nuveé so' ma' —taj yo'ó ta'aj nij so' a.

Tzaj ne ma'an sí' naxra' rihaan yo' cataj:

—'Unj me síí cachíín caridad yo' ei —taj so' a.

¹⁰ Che'é dan xná'anj nij yuvií man so', cataj nij yuvií:

—Daj qui'yáá so', ne ca'vee naxra' rihaan so' ga —taj nij yuvií, xná'anj nij so' man síí tuchrií yo' a.

¹¹ Gaa ne cataj so':

—Síí cu'naj Jesucristó ro', qui'yaj sigui', ne caxrj so' sigui' rihanj, gaa ne cataj xna'anj so' rihanj se vaa ca'anj 'unj na'nu' 'unj rihanj rá na Siloé a. Gaa ne gaa quisj ca'anj na'nu' 'unj rihanj rá na yo', ne naruvi' rihanj nanj á —taj síí naxra' rihaan yo' rihaan nij yuvií a.

¹² Gaa ne xná'anj nij yuvií man so', cataj nij yuvií:

—Me rej vaj so' cuano ga —taj nij yuvií, xná'anj nij yuvií man síí tuchrií yo' a.

—Ne ne'enj me rej vaj so' cuano a ma' —taj síí tuchrií yo' rihaan nij yuvií a.

Nanā nihánj taj xna'anj se vaa ca'maan rá nij síí fariseo ni'yaj nij so' man síí naxra' rihaan yo' a

¹³ Dan me se ca'anj nicaj nii man síí naxra' rihaan yo' rihaan nij síí fariseo a. ¹⁴ Dan me se güii naránj rá nij yuvií israelitá me güii qui'yaj Jesucristó sigui' ne naxra' rihaan síí tuchrií yo' qui'yaj Jesucristó a. ¹⁵ Che'é dan xná'anj uún nij síí fariseo man síí naxra' rihaan yo' daj qui'yaj so' ne naxra' rihaan so' a.

Gaa ne cataj síí naxra' rihaan yo':

—Qui'yaj so' sigui', ne caxrj so' rihanj, gaa ne na'nuj rihanj, ne cuano nihánj ruvi' rihanj nanj á —taj so' rihaan nij síí fariseo a.

¹⁶ Che'é dan cataj ta'aj nij síí fariseo:

—Nuveé sij ca'néé Diose rihaan ní' me síí qui'yaj naxra' rihaan síí nihánj a ma'. 'Q se 'yaj suun so' güii nō xcúún ní' naraan rá ní' adonj —taj ta'aj nij síí fariseo yo' a.

Tzaj ne yo'ó ta'aj nij so' cataj:

—Tzaj ne nuveé sij tumé cacun' me so' a ma'. 'Q se nij síi tumé cacun' me se daj chihaa mǐj se guun nucuaj nij síi tumé cacun' qui'yaj nij so' suun sa' nocoo ndaa vaa qui'yaj síi qui'yaj naxra' rihaan síi nihánj a adonj —taj yo'ó ta'aj nij síi fariseo yo' a.

Dan me se cuxra' ta'aj nij síi fariseo man nij so', ne ino guun rá nij so' ga tuvi' nij so' ni'yaj nij so' man Jesucristó a. ¹⁷ Che'é dan cataj uún nij so' rihaan síi naxra' rihaan yo' a:

—Daj uun rá ma'án so' che'é síi qui'yaj naxra' rihaan so' ga —taj nij síi fariseo, xná'anj nij so' man síi naxra' rihaan yo' a.

Ne cataj so':

—Sij nata' se-nana Diose me so', rá yá 'unj adonj —taj síi naxra' rihaan yo' che'é Jesucristó a.

¹⁸ Tzaj ne ne cuchuman rá nij síi uun chij rihaan nij yuvií israelitá se vaa ya ya tuchrii me so' gaa rque ne naxra' rihaan so' a. Che'é dan ca'neé nij so' nana se vaa ca'na' rej so' do', nii so' do', ga síi naxra' rihaan yo' rihaan nij so' a. ¹⁹ Veé dan cuchí' roj so', gaa ne xná'anj nij síi uun chij rihaan nij yuvií israelitá man roj so', cataj nij so':

—Ya ya ta'níi roj soj me síi nihánj na'. Ya ya tuchrii me so' gaa ca'ngaa so' na'. Asa' ca'vee naxra' rihaan so' cuano, rá roj soj ga —taj nij so', xná'anj nij so' man roj nica so' a.

²⁰ Gaa ne cataj roj so':

—Ta'nij ya rój me síi nihánj, ne tuchrii ya me so' asij ca'ngaa so', ²¹ tzaj ne ne ne'en uxrá rój asa' ca'vee naxra' rihaan so' cuano a ma'. Ne ne ne'en uxrá rój me síi qui'yaj naxra' rihaan so' a ma'. Xna'anj soj man so' á. 'Q se síi aj nocoo me so', ca'mii so' che'é ma'an so' nanj á —taj roj so' a.

²² Danj ca'mii roj nica rej síi naxra' rihaan yo' do', nii so' do', che'é se cuchu'vi' roj so' ni'yaj roj so' man nij síi uun chij rihaan nij yuvií israelitá a. Dan me se aj guun

ya ca'mii nij síi uun chij rihaan nij yuvii israelitá se vaa sese cataj yo'ŕo so' se vaa sij ca'neé Diose t̄inanii man yuvii rihaan sayuun me Jesucristó, ne quirii nij so' xe' man síi a'mii danj sca'núj nij yuvii israelitá a. ²³ Che'é dan cataj rej síi naxra' rihaan do', nii so' do', se vaa síi aj nocoo me so', ne xna'anj nij so' man ma'an so' a.

²⁴ Che'é dan nacúun uún nij so' man síi naxra' rihaan yo', ne cataj nij so' rihaan so' a:

—Ve'é cataj yá so' rihaan Diose daj quirán' so' á. 'Ŕ se aj ne'en núj se vaa xa' snó'o ca'mii ga so', tzaj ne sij tumé cacun' me so' ei —taj nij so' rihaan síi naxra' rihaan yo' a.

²⁵ Che'é dan cataj síi naxra' rihaan yo':

—Ne ne'en uxraj sese sij tumé cacun' me so' ma'. Maan se orún' rasuun ne'én 'unj se vaa gaa rque, ne síi tuchrii mej, tzaj ne cuano nihánj me se ruvi' rihanj adonj —taj síi naxra' rihaan yo' a.

²⁶ Che'é dan xna'anj nij so' man so', cataj nij so':

—Ne xa' síi ca'mii ga so', tzaj ne daj qui'yaj so', gaa ne naxra' rihaan so' qui'yaj so' ga —taj nij so', xna'anj nij so' man so' a.

²⁷ Gaa ne cataj síi naxra' rihaan yo' rihaan nij so' a:

—Aj cataj xna'anj 'unj rihaan soj, tzaj ne ne cunoo soj a ma'. Me che'é me rá soj cataj xna'anj uún 'unj rihaan soj ga. Guun ma'an soj síi tucu'yón se-nana so', rá soj na' —taj síi naxra' rihaan yo' rihaan nij so' a.

²⁸ Gaa ne nij ca'mii nij so' ga síi naxra' rihaan yo', ne cataj nij so':

—Ma'an so' me síi tucu'yón se-nana so', ne xa' núj, tzaj ne sij tucu'yón se-nana Moisés me núj ei. ²⁹ Ne'en núj se vaa ca'mii ma'an Diose ga síi cu'naj Moisés, tzaj ne ne ne'en núj me rej cavii síi ca'mii ga so' a ma' —taj nij so' rihaan síi naxra' rihaan yo' a.

³⁰ Gaa ne cataj so' rihaan nij so' a:

—Niha' uxrá vaa se-nana soj chihá'. Ne ne'en soj me rej cavii so', tzaj ne sí nacuchra' rihanj me so' nanj adonj.
³¹ 'Q se ne'en ní' se vaa ne uno Diose rihaan nij sí tumé cacun' a ma'. Tzaj ne sese aráj cochroj ní' rihaan Diose, ne sese 'yaj ní' se vaa me rá Diose, ne qui'yaj Diose se vaa achíín ni'yaj ní' rihaan Diose nanj á. ³² Dan me se sí tuchrii mej gaa ca'ngaj, ne nu' ca'na' me se ne ca'na' nana rihaan ní' se vaa nacuchra' yo'o so' rihaan sí vaa danj a ma'. Tananj orún' so' me sí qui'yaj danj ei. ³³ Dan me se sese nuveé sij ca'née Diose rihaan ní' me so', ne daj chihaa mǐj se guun nucuaj so' qui'yaj so' danj ma' —taj sí naxra' rihaan yo' rihaan nij so' a.

³⁴ Gaa ne cataj nij so' rihaan so' a:

—Nanj sí tumé cacun' mé so' asij ca'ngaa so' ei. Ne nó xcúún so' tucuyón so' a 'ó nana rihaan núj a ma' —taj nij so' rihaan so' a.

Gaa ne quirii nij so' man so' xe' a. ³⁵ Dan me se cuchii nana rihaan Jesucristó se vaa quirii nij so' man sí naxra' rihaan yo' xe' a. Che'é dan nano' Jesucristó man so', gaa ne cataj Jesucristó rihaan so' a:

—So' me sí amán rá ni'yaj man sí ca'née Diose nicaj yu'unj man yuvij na' —taj Jesucristó rihaan sí naxra' rihaan yo' a.

³⁶ Gaa ne cataj so':

—Ne me sí me sí ca'née Diose nicaj yu'unj man yuvij, señor'. Cataj xna'anj so' noj, gaa ne cuchuman raj ni'yaj man so' ei —taj sí naxra' rihaan yo' rihaan Jesucristó a.

³⁷ Gaa ne cataj Jesucristó rihaan so':

—Aj quene'én so' man so', ne 'unj sij a'mii ga so' cuano me so' adonj —taj Jesucristó rihaan so' a.

³⁸ Gaa ne cataj so':

—Cuanō nihánj me se chumán raj ni'yaj mán so', Señor —taj so' a.

Gaa ne canicun' ruj so' rihaan Jesucristó a. ³⁹ Gaa ne cataj Jesucristó:

—Ca'ná' 'unj rihaan chumij nihánj che'é se no xcuún 'unj ca'ne' 'unj cacun' che'é yuvij adonj. Dan me se xa' nij síí ne ne'en, tzaj ne quene'en nij so', qui'yáj, ne xa' nij síí guun rá se vaa aj quisíj xcaj nij so' cuentá, tzaj ne ase vaa síí aráán rihaan ro', danj gaa nij so' se vaa se ca'vee xcaj nij so' cuentá ma' —taj Jesucristó a.

⁴⁰ Dan me se cachée ta'aj nij síí fariseo ga Jesucristó, ne cuno nij so' nana ca'mii Jesucristó a. Che'é dan xná'anj nij so' man Jesucristó, cataj nij so':

—Ne ase vaa síí aráán rihaan vaa núj, rá so' na' —taj nij so', xná'anj nij so' man Jesucristó a.

⁴¹ Gaa ne cataj Jesucristó rihaan nij so' a:

—Sese sij ne ne'en me soj, ne taj vaj cacun' tumé soj ma'. Tzaj ne cuano nihánj me se cataj soj se vaa aj ne'en soj a. Che'é dan yo'o tumé soj cacun' adonj —taj Jesucristó rihaan nij síí fariseo yo' a.

10

Nana nihánj taj xna'anj se vaa ase vaa síí tumé matzinj ro', danj vaa Jesucristó, tumé so' man ní' a

¹ Gaa ne cataj uún Jesucristó rihaan nij so' a:

—Ya ya cataj xna'anj 'unj rihaan soj cuano se vaa xa' síí ne atúj ta'yaa rej nuu nij matzinj ne avii raá chingá rej nuu nij xo', tzaj ne síí ituu me so' adonj. ² Tzaj ne síí atúj ta'yaa ro', so' me síí daan matzinj yo' adonj. ³ Dan me se x'núj ta'yaa rihaan so', 'yaj síí tumé ta'yaa, gaa ne uno nij matzinj se-nana so', gaa ne nacúún so' man nij matzinj a'mii so' se-chuvij 'o 'o nij xo', gaa ne 'anj nicaj so' man nij xo' xe' adonj. ⁴ Gaa quisíj quirii so' man nij xo' xe', ne noco' nij matzinj xcó so', che'é se u'yón nij xo' se-nana so' ei. ⁵ Tzaj ne yo'ó yuvij me se se canoco' nij xo' man

yo'ó so', maan se cunanj nij xo' rihaan yo'ó so', che'é se ino ca'mii yo'ó so' xrée nij xo', ne se cu'yón uxrá nij xo' se-nana yo'ó so' a ma' —taj Jesucristó a.

⁶ Dan me se ase vaa 'o cuentó vaa nana nihánj nana ca'mii Jesucristó rihaan nij so', tzaj ne ne xcaj nij so' cuentá me taj nana nihánj a ma'. ⁷ Che'é dan cataj uún Jesucristó:

—Ya ya cataj xna'anj 'unj rihaan soj cuano se vaa ase vaa ta'yaa rej atúj nij matzinj ro', danj vaa 'unj a. ⁸ Dan me se xa' taran' nij sí ca'na' gaa rque doj, tzaj ne ase vaa sí ituu vaa nij so' a. Tzaj ne ne cuno nij matzinj rihaan nij so' a ma'. ⁹ Dan me se ase vaa ta'yaa yo' vaa 'unj, ne sí atúj rej nicun' 'unj ro', so' me sí amán rá ni'yaj manj, ne quinanií so' rihaan sayuun, ne ve'é catuu so', ne ve'é curihanj so', ne nari' so' coj chrin' cha so' nanj adonj.

¹⁰ “Xa' sí ituu, tzaj ne me inanj rá so' qui'yaj ituu so' matzinj do', ticavi' so' matzinj do', tinavij so' matzinj do' ei. Che'é dan atúj so' rej nuu nij matzinj a. Tzaj ne 'unj me se ca'ná' 'unj che'é se me rá 'unj yo'o gaa i'na' nij xo', ne ve'é uxrá cayáan nij xo', qui'yáj chuguanj.

¹¹ “Ne 'unj ro', me sí daan ya nij matzinj, ne tumé sa' yá 'unj man nij matzinj, ne ca'nej nimanj cavij che'é nij xo' adonj. ¹² Xa' mozó, tzaj ne nuveé sij daan matzinj me so' ma'. Sij 'yaj canaán sa'anj uun me so', ne che'é dan sese ne'en so' xcuu ca'yánj ca'nu', ne chu'vi' so', ne tanáj so' matzinj yo', ne unánj so' a. Gaa ne tanáj ma'an so' man nij matzinj, gaa ne quita'aa ca'yánj yo' man nij matzinj, ne ticha'nuu ca'yánj yo' man nij xo' nanj adonj. ¹³ Danj 'yaj mozó yo', che'é se mozó uun me so', ne ne rihuun rá so' sese quiran' nij matzinj sayuun ma'.

¹⁴ “Ne xa' 'unj, tzaj ne sij tumé sa' man nij matzinj mej, ne ne'enj man nij matzinj noco' manj, ne ne'en nij xo' manj ei. ¹⁵ Dan me se ne'en Réj Diose manj, ne ne'enj man

Réj, ne ase vaa 'unj ga Réj ro', danj vaa daán 'unj matzinj gaj chuguanj. Ne a'néé nimanj cavij che'é nij xo' adonj. ¹⁶ Ne vaa doj daán 'unj matzinj uún, tzaj ne nuvi' nij xo' rej nuu matzinj nihánj ma'. Ne vaa che'é ca'na' yo'ó matzinj yo' uún, qui'yáj, ne cunō nij xo' se-nanaj, gaa ne cunuu chre' nij xo' ga matzinj nihánj, gaa ne cutumé 'unj man cunudanj nij xo' adonj.

¹⁷ “Dan me se ca'néé nimanj cavij, ne cunuu i'na' uún 'unj, ne che'é dan 'ee rá Réj Diose manj adonj. ¹⁸ Taj vaj sí 'yaj fuerzá manj cavij ma'. 'Q se ma'anj a'néé nimanj cavij nanj á. Dan me se nō xcúnj ca'nej nimanj cavij, ne nō xcúnj cunuu i'na' uún 'unj adonj. Nihánj me suun ca'ne' Réj Diose rihanj nanj adonj —taj Jesucristó rihaan nij so' a.

¹⁹ Gaa ne cuxra' ta'aj uún nij sí uun chij rihaan nij yuvii israelitá man nij so', gaa cuno nij so' nana yo' a. ²⁰ Dan me se ta'aj nij so' cataj:

—Nuu nana chree nimán so', ne snúú so' nanj á. Taj che'é cunō soj se-nana so' ma' —taj ta'aj nij so' rihaan tuvi' nij so', ni'yaj nij so' man Jesucristó a.

²¹ Gaa ne yo'ó ta'aj nij so' cataj:

—Nuveé nana chree nuú nimán sí nihánj a ma'. 'Q se se guun nucuaj sí nuu nana chree nimán nacuchra' so' rihaan sí tuchrii a ma' —taj yo'ó ta'aj nij so' a.

Nana nihánj taj xna'anj se vaa guun rá nij sí uun chij rihaan nij yuvii israelitá go' nij so' yahij man Jesucristó a

²² Güii dan me se canuú cha'anj che'é nuvií nocōo chuman' Jerusalén, ne yavii ayuu yu've' me yo' a. ²³ Gaa ne chéé Jesucristó rá chingá cu'naj Corredor Salomón rá nuvií nocōo yo', ²⁴ ne che'é dan cunuu chre' nij sí uun chij rihaan nij yuvii israelitá, ne yo'ō tucuachriin nij so' nu' anicaj man Jesucristó a. Gaa ne cataj nij so':

—Ndaa aman me quisij güii guun ya ya rá núj ni'yaj núj mán so' ga. 'O se cataj xna'anj yá yá so' rihaan núj sese ya sij ca'neé Diose tinanii man yuvii rihaan sayuun me yá so' ei —taj nij so' rihaan Jesucristó a.

²⁵ Gaa ne cataj Jesucristó rihaan nij so' a:

—Aj cataj xna'anj 'unj rihaan soj, tzaj ne na'vej rá soj cuchuman rá soj a ma'. Ne xa' suun sa' nocoo 'yáá 'unj che'é Réj Diose, tzaj ne ma'an nij suun sa' nocoo yo' taj xna'anj daj sij mej adonj. ²⁶ Tzaj ne ne cuchuman rá soj ni'yaj soj manj man asanj. 'O se nuveé daan 'unj matzinj me soj a ma'. ²⁷ Xa' daán 'unj matzinj, tzaj ne uno nij xo' se-nanaj, ne ne'enj man nij xo', ne nocó' nij xo' xcoj a. ²⁸ Gaa ne cunuu i'na' nij xo' cayáán nij xo' ga Diose nu' cavii nu' ca'anj, qui'yáá 'unj, ne daj chihaa mój se cavi' nij xo' a ma'. Ne taj vaj síí ca'nee man nij xo' ra'aj ma'. ²⁹ 'O se Réj Diose me síí rqué man nij xo' rihanj, ne sij uun chij ya me so' rihaan cunudanj, ne che'é dan taj vaj síí guun nucuaj ca'nee man nij xo' ra'a Réj Diose a ma'. ³⁰ 'O se ase vaa orún' yuvii vaa 'unj ga Réj adonj —taj Jesucristó rihaan nij so' a.

³¹ Gaa ne quita'aa uún nij síí uun chij rihaan nij yuvii israelitá yahij go' nij so' man Jesucristó a.

³² Gaa ne cataj Jesucristó rihaan nij so' a:

—Quisíj qui'yaj uxraj suun sa' nocoo quene'en nij soj, ne guun nucuáj qui'yáj danj, qui'yaj Réj Diose, ne che'é me suun sa' nocoo me rá soj go' soj yahij manj ga —taj Jesucristó, xna'anj so' man nij so' a.

³³ Gaa ne cataj nij síí uun chij rihaan nij yuvii israelitá:

—Se go' núj yahij mán so' che'é suun sa' nocoo qui'yáá so' a ma'. 'O se go' núj yahij mán so' che'é se ca'mii so' nana nij che'é Diose adonj. Dan me se nanj yuvii uun mé so', ne me che'é cataj so' se vaa Diose mé so' ga —taj nij so' rihaan Jesucristó a.

San Juan 10:34 60 San Juan 10:41

³⁴ Gaa ne cataj Jesucristó:

—Maan se vaa nana no rihaan yanj no tucuáan noco' soj, ne nana ca'mii ma'an Diose me nana yo', ne dan me se cataj Diose: “'Unj me síí cataj xna'anj se vaa diose me soj á”, taj Diose rihaan nij síí ca'mii se-nana so' gaa naá a. ³⁵ Dan me se sese ma'an Diose cataj se vaa nij síí ca'mii se-nana so' me ma'an uún diose, gaa ne daj chihaa míj se ca'vee tanáj xcō ní' se-nana Diose nana no rihaan yanj gaa ma'. ³⁶ Ne veé dan me ca'ne' Diose suun guee rihanj, ne ca'née so' manj rihaan chumii nihánj ne maan che'é se cataj 'unj se vaa ta'nij Diose mej, che'é dan cataj soj se vaa nana nij ca'mij che'é Diose á. Taj che'é ca'mii nij soj danj, raj ma'. ³⁷ 'O se sese ne 'yaj suun 'unj se-suun Réj Diose, ne ca'vee ca'ne' rá soj ga suun amán rá ni'yaj manj chuguanj. ³⁸ Tzaj ne sese ya 'yaj suun 'unj se-suun Réj Diose, ne ca'vee se ne amán rá soj ni'yaj soj man ma'anj, tzaj ne vaa che'é cuchuman rá soj ni'yaj soj man nij suun sa' nocōo qui'yáj ei. Ndaa síj, gaa ne xcaj soj cuentá, gaa ne yo'o quene'en soj se vaa ne Réj Diose gaj, ne nej ga Réj Diose uún adonj —taj Jesucristó a.

³⁹ Che'é dan guun rá uún nij so' quita'aa nij so' man so' a. Tzaj ne quinanii so' rihaan nij so' a.

Nana nihánj taj xna'anj daj guun rá nij síí cuchumán rá ni'yaj man Jesucristó a

⁴⁰ Gaa ne cavii uún Jesucristó ca'anj so' rej rnej tu'va chráa cu'naj Jordán ndaa rej cuta' ne síí cu'naj Juan man yuvii gaa chée so' a. Gaa ne guun raan so' rej yo' a. ⁴¹ Gaa ne cuchi' uxrá yuvii rihaan so', ne cataj nij yuvii se vaa síí cu'naj Juan síí cuta' ne man yuvii me se a doj suun sa' nocōo ne qui'yaj so', tzaj ne quisíj ya nu' nana cataj xna'anj síí cu'naj Juan che'é Jesucristó a. Danj cataj nij yuvii, ni'yaj nij yuvii nij suun sa' nocōo qui'yaj Jesucristó

a. ⁴² Gaa ne cuchumán rá que'ee nij so' ni'yaj nij so' man Jesucristó gaa vaj so' rej yo' a.

11

Nana nihánj taj xna'anj che'é se vaa guun gaa cavi' síi cu'naj Lázaro gaa ne cunuu i'na' uún so', qui'yaj Jesucristó a

¹ Dan me se vaa 'o síi ran', ne síi cu'naj Lázaro me so', ne síi ne chuman' Betania me so' a. Ne chuman' Betania yo' me se chiháán chana cu'naj Mariá ga chu'vij Mariá chana cu'naj Marta me chuman' Betania yo' a. ² Ne chana cu'naj Mariá yo' me se no' me chana caxrj casté gun' daj tacóó síi 'nij ra'a man ní', ne yuvé raa ma'an no' tanacoó no' tacóó so' a. Dan me se ra'vij no' me síi cu'naj Lázaro síi ran' yo' a. ³ Dan me se ca'née roj ra'vij síi cu'naj Lázaro yo' nana rihaan Jesucristó, cataj roj no': “Xa' síi 'ee rá so' man, tzaj ne ran' so', a Señor”, vaa nana ca'née roj no' rihaan Jesucristó a. ⁴ Dan me se cuchi' nana yo' rihaan Jesucristó, gaa ne cataj so':

—Nuveé che'e rej yo' cavi' síi cu'naj Lázaro me quiran' so' a ma'. 'O se quiran' so' che'é rej ve'é doj xcaj yuvii cuentá che'é Diose adonj. Dan me se ve'é doj xcaj yuvii cuentá che'é ma'anj ta'nij Diose, che'é se quiran' síi cu'naj Lázaro yo' nanj adonj —taj Jesucristó rihaan nij síi nata' nana yo' rihaan so' a.

⁵ Ne Jesucristó me se 'ee ndo'o rá Jesucristó man chana cu'naj Marta do', man chu'vij no' chana cu'naj Mariá do', man síi cu'naj Lázaro do' a. ⁶ Dan me se gaa cuno Jesucristó nana se vaa ran' síi cu'naj Lázaro, ne ne cavii ra'yanj so' ca'anj so' a ma'. 'O se guun raan so' yavj güii rej vaj so' a. ⁷ Dan me se cachén yavj güii yo', gaa ne cataj Jesucristó rihaan nij síi tucu'yón se-nana so' a:

—Cavii ní' ca'anj uún ní' estadó Judea ei —taj so' rihaan nij so' a.

⁸ Gaa ne cataj nij síi tucu'yón se-nana so' rihaan so' a:

—Cuanq nihánj me se guun ndo'o rá nij síi uun chij rihaan nij yuvií israelitá go' nij so' yahij mán so' ne cavi' so' á. Se guun ca'anj so' yo' ma' —taj nij so' rihaan Jesucristó a.

⁹ Gaa ne cataj Jesucristó:

—Ne'en soj se vaa chuvij orá ranga' rihaan chumii nihánj 'o 'o güii, ne dan me se sese cachee yo'o so' rej ranga', ne se naxru' so' ma'. 'O se curuvi' sa' rihaan so', qui'yaj güii chuguun rihaan chumii nihánj adonj. ¹⁰ Tzaj ne sese cachee yo'o so' rej nii, ne naxru' so', che'é se taj vaj ya'an chuguun nicaj so' adonj —taj Jesucristó a. ¹¹ Dan me se quisíj ca'mii so' danj, gaa ne cataj uún so' — Ne xa' tuvi' ní' síi cu'naj Lázaro, tzaj ne otoj so' ei. Tzaj ne ca'anj yaj, che'é rej narii 'unj nej rihaan so' a —taj Jesucristó rihaan nij síi tucu'yón se-nana so' a.

¹² Che'é dan cataj nij síi tucu'yón se-nana so' rihaan so':

—'O se sese otoj so', ne cunuu sa' ma'an so', Señor —taj nij so' rihaan Jesucristó a.

¹³ Dan me se nana dan ca'mii Jesucristó che'é se aj cavi' síi cu'naj Lázaro, tzaj ne nij síi tucu'yón se-nana Jesucristó me se guun rá nij so' se vaa ya ya otoj uun Lázaro, taj Jesucristó, rá nij so' a. ¹⁴ Che'é dan ca'mii nicaj Jesucristó rihaan nij so', cataj so':

—Aj cavi' síi cu'naj Lázaro, ¹⁵ ne guun niha' rá 'unj se vaa nuví' 'unj ne ga so' gaa cavi' so' a. 'O se che'é se cavi' so' ro', che'é dan cuchuman doj rá soj ni'yaj soj manj adonj. Tzaj ne cavií ní' ca'anj ní' rej naj so' ei —taj Jesucristó rihaan nij so' a.

¹⁶ Che'é dan cataj síi cu'naj Tomás Dídimó rihaan yo'ó nij síi tucu'yón se-nana Jesucristó:

—Cavií ní' ca'anj ní' ga so', gaa ne cavi' ní' ga so' á —taj so' ni'yaj so' man Jesucristó a.

¹⁷ Veé dan me se cuchi' Jesucristó chuman' Betania, gaa ne cataj xna'anj nii rihaan so' se vaa aj quisij ca'anj güii cachin' nii man síi cu'naj Lázaro rque yu'uj yuvej a. ¹⁸ Dan me se nichrun' naj chuman' Betania ga chuman' Jerusalén, ne orún' va'naj kilómetro naj chuman' Jerusalén yo' a. ¹⁹ Ne aj cavii que'ee nij yuvii israelitá chuman' Jerusalén, ne cuchi' nij so' rihaan chana cu'naj Marta do', rihaan chana cu'naj Mariá do', che'é rej se nanó rá roj no', che'é se aj cavi' ra'vij roj no' a.

²⁰ Dan me se gaa cuno chana cu'naj Marta se vaa ca'na' Jesucristó, ne curihanj no' nari' tuvi' no' ga Jesucristó, tzaj ne chana cu'naj Mariá me se quináj no' rá ve' yo' a. ²¹ Gaa ne cataj chana cu'naj Marta rihaan Jesucristó a:

—Sese cané so' nihánj, ne ne cavi' ra'vij asuun saj, man Señor. ²² Tzaj ne cuano nihánj me se ne'enj se vaa me ma'an rasuun cachinj so' rihaan Diose, ne qui'yaj so' nanj á —taj chana cu'naj Marta rihaan Jesucristó a.

²³ Gaa ne cataj Jesucristó rihaan no' a:

—Cunuu i'na' uún ra'vij so' —taj so' rihaan no' a.

²⁴ Gaa ne cataj chana cu'naj Marta rihaan so':

—Aj ne'enj se vaa asa' quisij güiii ca'anj ni'ya chumii nihánj, ne cunuu i'na' uún so' ga yo'ó nij yuvii cunuu i'na' uún ei —taj no' rihaan Jesucristó a.

²⁵ Gaa ne cataj Jesucristó rihaan no' a:

—Xa' 'unj, tzaj ne sij 'yaj nuu i'na' uún yuvii mej, ne 'unj me síi qui'yaj gaa i'na' yuvii cayáan yuvii ga Diose nu' cavii nu' ca'anj adonj. Ne xa' síi amán rá ni'yaj manj, tzaj ne ca'vee se cavi' so', tzaj ne yo'o gaa i'na' nimán so' chuguanj. ²⁶ Che'é se amán rá so' ni'yaj so' manj, ne che'é dan vaa i'na' nimán so', ne daj chihaa mij se cavi' nimán so' a ma'. Amán rá so' nana nihánj na' —taj Jesucristó, xná'anj so' man chana cu'naj Marta yo' a.

²⁷ Gaa ne cataj no':

—Chumán raj, Señor. Dan me se aj cuchumán raj se vaa sij ca'néé Diose t̄inani man núj rihaan sayuun mé so', ne ta'nij Diose mé so', ne ca'ná' so' rihaan chumī nihánj a —taj no' rihaan Jesucristó a.

²⁸ Dan me se quis̄j ca'mii no' danj, gaa ne ca'anj no', ne canacúun yuve no' man chu'vij no' chanā cu'naj Mariá, cataj no':

—Aj ca'na' maestró, ne nacúun so' mán so' a —taj no' rihaan chanā cu'naj Mariá a.

²⁹ Ne gaa cuno chanā cu'naj Mariá nanā yo', gaa ne ra'yanj cavii no', ne ca'anj no' rej nicun' Jesucristó a.

³⁰ Dan me se ataa cat̄ū Jesucristó rque chuman' yo', ne nicun' so' rej nari' tuvi' chanā cu'naj Marta ga so' a.

³¹ Dan me se nij yuvī israelitá yuvī cane rá ve' nanó cuentó ga chanā cu'naj Mariá me se quene'en nij so' se vaa ra'yanj canicun' no' ne curihanj no' xe', ne canoco' nij so' xcó no', ne curihanj nij so' xe' a. 'Q se guun rá nij so' se vaa ca'anj chanā cu'naj Mariá rihaan yu'uj yuvej che'é rej ta'vee no', rá nij so' a.

³² Dan me se gaa cuchi' chanā cu'naj Mariá rej nicun' Jesucristó, gaa ne quene'en no' man so', gaa ne canicun' ruj no' rihaan Jesucristó, gaa ne cataj no':

—Sese cané so' nihánj, ne ne cavi' ra'vij asuun saj, man Señor —taj no' rihaan Jesucristó a.

³³ Dan me se quene'en Jesucristó se vaa ta'vee no', se vaa ta'vee nij yuvī israelitá ca'na' ga no' do', gaa ne quinanó ndo'o rá so', ³⁴ gaa ne cataj so':

—Me rej cachin' soj man so' ga —taj so', xná'anj so' man nij so' a.

Gaa ne cataj nij so' rihaan so' a:

—Ca'anj ní, gaa ne quene'én so' á —taj nij so' rihaan so' a.

³⁵ Gaa ne ta'vee Jesucristó a. ³⁶ Che'é dan cataj nij yuvii israelitá rihaan tuvi' nij so' a:

—Ni'yaj soj ei. 'O se ta'vee so', che'é se 'ee uxrá rá so' ni'yaj so' man síi cavi' yo' a —taj nij yuvii ni'yaj nij yuvii man Jesucristó a.

³⁷ Gaa ne ta'aj nij yuvii cataj:

—'O se sij ne'en nacuchra' rihaan síi tuchrii me síi nihánj á. Che'é dan uun nucuaj so' naqui'yaj sa' so' man síi cu'naj Lázaro, ne sese cane so' nihánj, ne ne cavi' síi cu'naj Lázaro asuun saj ma' —taj ta'aj nij yuvii yo' a.

³⁸ Dan me se quinanó uún rá Jesucristó, ne cuchi' so' rej cachin' nii man síi cu'naj Lázaro yo' a. Dan me se yu'uj yujej me yo', ne caráán yahij rihaan yu'uj yo' a. ³⁹ Gaa ne cataj Jesucristó:

—Naxuun soj yahij rihaan yu'uj á —taj Jesucristó a.

Gaa ne cataj ra'vij síi cavi' chana cu'naj Marta rihaan so':

—Tzaj ne gun' ri'yuj man so' yaj, Señor. 'O se quisíj ca'anj ya güii naj so' nanj adonj —taj no' rihaan so' a.

⁴⁰ Gaa ne cataj Jesucristó rihaan no' a:

—Aj cataj xna'anj 'unj rihaan so' se vaa sese cuchuman rá so' ni'yaj so' manj, gaa ne quene'én so' se vaa nucuaj uxrá Diose á —taj Jesucristó rihaan chana cu'naj Marta yo' a.

⁴¹ Che'é dan naxuun nij so' yahij yo' a. Gaa ne naxcaj Jesucristó rihaan so', ne cataj so':

—Guun ni'yaj ní' se vaa cunó so' se-nanaj, Ataj Chij.

⁴² Aj ne'enj se vaa niganj unó so' se-nanaj, tzaj ne a'mij nana nihánj che'é rej cunó nij yuvii nicun' nihánj gaj a. 'O se me raj cuchuman rá nij yuvii se vaa so' me síi ca'née manj rihaan chumiij nihánj nanj adonj —taj Jesucristó, cachíin ni'yaj so' rihaan Diose a.

⁴³ Quisíj cataj so' danj, gaa ne nucuaj ndo'o caguáj so', cataj so':

—Lázaro. Cavii so' ca'na' so' nihánj ei —taj so', caguáj so' rihaan síi cu'naj Lázaro yo' a.

⁴⁴ Gaa ne curihanj síi cavi' yo' rque yu'uj, ne nacutáj yatzíj nu' man so', ne caráán yatzíj rihaan so' uún a. Gaa ne cataj Jesucristó rihaan nij yuvii a:

—Nache soj man so', ne cachee so' ca'anj so' á —taj Jesucristó rihaan nij yuvii a.

Nana nihánj taj xna'anj se vaa guun ndo'o rá nij xrej atá suun nocoo doj do', nij síi fariseo do', cavi' Jesucristó a

⁴⁵ Dan me se ca'na' nij yuvii israelitá ga chana cu'naj Mariá yo', ne quene'en nij so' daj qui'yaj Jesucristó a. Che'é dan cuchumán rá que'ee nij yuvii se vaa síi ca'née Diosé me Jesucristó a. ⁴⁶ Tzaj ne cavii yo'ó ta'aj nij so' ca'anj nij so' rihaan nij síi fariseo, gaa ne cataj xna'anj nij so' rihaan nij síi fariseo nu' se vaa qui'yaj Jesucristó a. ⁴⁷ Che'é dan cunuu chre' nij xrej atá suun nocoo doj do', nij síi fariseo do', qui'yaj nij so' juntá, gaa ne cataj nij so':

—Daj qui'yaj ní', rá soj ga. 'Q se xa' snó'o nihánj, tzaj ne 'yaj suun uxrá so' suun sa' nocoo adonj. ⁴⁸ Sese yo'ó tanáj ní' man so' qui'yaj so' danj, ne cuchuman rá cunudanj nij yuvii ni'yaj nij yuvii man so', gaa ne ca'na' nij tanuu 'yaj suun rihaan gobiernó man Romá, gaa ne tirí' nij tanuu man ní' do', man chiháán ní' do', man nu' tuvi' ní' do' á —taj nij so' rihaan tuvi' nij so' a.

⁴⁹ Gaa ne ca'mii yo'ó tuvi' nij so', síi cu'naj Caifás, ne so' me xrej atá suun nocoo doj yo' yo' a. Dan me se cataj so' rihaan nij so' a:

—Ne ne'en uxrá nij soj a ma'. ⁵⁰ 'Q se ataa xcaj soj cuentá se vaa xa' soj, tzaj ne cavii sa' doj soj sese cavi' orún' snó'o che'é nij yuvii, gaa ne veé danj me se quiri'

nu' ní sij israelitá ma' —taj sí cu'naj Caifás rihaan yo'ó nij so' a.

⁵¹ Dan me se nuveé inanj nana cavii raa ma'an sí cu'naj Caifás me nana nihánj ma'. 'Q se xrej ata suun nocoo doj me so' yo' yo', ne che'é dan ma'an Diose me sí rqué nana ca'mii so', ne che'é dan me ya vaa se-nana so' gaa cataj so' se vaa cavi' Jesucristó che'é taran' nij yuvii israelitá yo' a. ⁵² Ne nuveé inanj che'é nij yuvii israelitá me cavi' Jesucristó ma'. 'Q se cavi' so' che'é rej naqui'yaj chre' so' man cunudanj nij ta'ní Diose nij sí man nu' rihaan chumii nihánj, gaa ne cunuu tuvi' cunudanj nij so' adonj.

⁵³ Dan me se maan güii dan me se guun che'e nij sí fariseo do', nij xrej ata suun nocoo doj do', nuchruij raa nij so' daj qui'yaj nij so', gaa ne cavi' Jesucristó a. ⁵⁴ Che'é dan me ne ca'vee cachee ranga' so' estadó Judea ma'. Gaa ne cavii so' ca'anj so' tu'va rej taj vaj yuvii man, gaa ne catúj so' yo'o chuman' cu'naj Efraín, gaa ne caran' so' chuman' yo' ga nij sí tuculyón se-nana so' a.

⁵⁵ Dan me se daj doj quisij cha'anj pascuá cha'anj navij rá nij yuvii israelitá, ne che'é dan cavii nij yuvii ne chuman' le'ej, ne ca'anj nij so' chuman' Jerusalén, che'é rej qui'yaj nij so' tucuaán noco' nij so' ne cunuu guee nij so' rihaan Diose a. ⁵⁶ Gaa ne nano' ndo'o nij yuvii man Jesucristó a. Dan me se canicun' nij yuvii rá nuvi' nocoo, ne xná'anj nij yuvii man tuvi' yuvii, cataj nij yuvii:

—Daj uun rá soj ga. Ca'na' so' rej canuú cha'anj, rá soj na' —cataj nij yuvii, xná'anj nij yuvii man tuvi' yuvii yo' a.

⁵⁷ Ne xa' nij xrej ata suun nocoo doj do', nij sí fariseo do', tzaj ne cataj xna'anj nij so' se vaa sese quene'en nij yuvii me rej vaj Jesucristó, gaa ne cataj xna'anj nij yuvii rihaan ma'an nij so' a. 'Q se guun rá nij so' quita'aa nij so' man Jesucristó adonj.

12

Nana nihánj taj xna'anj se vaa caxrj̄j chanā cu'naj̄ Mariá casté tacóó Jesucristó a

¹ Dan me se achiin yatan' güiii çanuû cha'anj pascuá, ne ca'anj Jesucristó chuman' Betania a. Chuman' Betania ro', ne síí cu'naj̄ Lázaro síí cunuu i'na' uún qui'yaj̄ Jesucristó a. ² Dan me se qui'yaj̄ chuvij̄i nii chā ni'yánj̄ Jesucristó, ne chanā cu'naj̄ Marta me chanā rque chá ni'yánj̄ nij síí 'na', ne ne síí cu'naj̄ Lázaro rihaan mesá gā Jesucristó gā chá so' chraa a. ³ Dan me se nicaj̄ chanā cu'naj̄ Mariá yo'õ aga' xij̄ casté gun' daj̄ tu'veē ndo'o, ne caxrj̄j no' tacóó Jesucristó, gā ne yuvé rā ma'an no' tanacoõ no' tacóó Jesucristó a. Gā ne nasj̄ toto' nu' rá ve' yo', qui'yaj̄ casté caxrj̄j chanā cu'naj̄ Mariá tacóó Jesucristó a.

⁴ Dan me se ne síí cu'naj̄ Judas Iscariote, ne yo'õ síí tuculyón se-nanā Jesucristó me so', ne síí tacuachén man Jesucristó rihaan nij síí taj̄ ri'yunj̄ man Jesucristó me so' a. Dan me se cataj̄ so':

⁵ —Me che'é ne cutu'veē nii casté nihánj̄ ne quirj̄' uxrá nii sa'anj̄ ga. 'O se ase vaa sa'anj̄ 'yaj̄ canaán yuvij̄ rque 'o yo' nó casté nihánj̄, ne vaa che'é rque ní' sa'anj̄ yo' rihaan nij síí niquē nanj̄ á —taj̄ síí cu'naj̄ Judas yo' a.

⁶ Dan me se ðanj̄ tu'va ma'an síí cu'naj̄ Judas yo', tzaj̄ ne a doj ne nanó rá Judas yo' che'é nij síí niquē a ma'. Maan se sij̄ tumé se-chrunj̄ nij tuvij̄' Jesucristó chrúún sa'anj̄ me so', tzaj̄ ne síí ituū me so', ne qui'yaj̄ ituū ndo'o so' sa'anj̄ man rque chrúún yo', ne che'é dan ca'mii so' ðanj̄ nanj̄ ei.

⁷ Dan me se cataj̄ Jesucristó rihaan so' a:

—Ca'ne' rá so' qui'yaj̄ ma'an no' ei. Che'é yan quisij̄ güiii cachin' nii manj̄ ro', che'é dan caxrj̄j no' casté tu'veē ndo'o manj̄ nanj̄ á. ⁸ Xa' nij síí niquē, tzaj̄ ne nu' güiii mán nij síí niquē gā soj, ne xa' ma'anj̄, tzaj̄ ne se canicún'

'unj rihaan soj nu' cavii nu' ca'anj ni'yaj soj ma' —taj Jesucristó rihaan síí cu'naj Judas yo' a.

Nana nihánj taj xna'anj se vaa guun rá nij xrej atá suun nocoo doj se vaa cavi' uún síí cu'naj Lázaro yo' a

⁹ Dan me se xcaj ndo'o nij yuvii israelitá cuentá se vaa ne Jesucristó chuman' Betania, ne che'é dan ca'anj uxrá nij so' chuman' yo' a. Dan me se nuveé inanj che'é ma'an Jesucristó me ca'anj nij so' ma'. 'Q se me rá nij so' quene'en nij so' man síí cu'naj Lázaro síí cunuu i'na' uún qui'yaj Jesucristó a. ¹⁰ Gaa ne guun 'o rá nij xrej atá suun nocoo doj se vaa cavi' síí cu'naj Lázaro uún, qui'yaj nij so' a. ¹¹ 'Q se che'é síí cu'naj Lázaro me se cavii ndo'o nij yuvii israelitá canoco' nij so' man Jesucristó, ne cuchumán rá nij yuvii israelitá ni'yaj nij so' man Jesucristó a.

Nana nihánj taj xna'anj daj qui'yaj nij yuvii gaa canicaj uún Jesucristó ca'anj so' chuman' Jerusalén a

¹² Gaa ne güii a'yuj me se cuchi' nana rihaan taran' nij yuvii israelitá navij rá cha'anj pascuá se vaa catuu Jesucristó chuman' Jerusalén a. ¹³ Che'é dan me cuta nij yuvii ra'a chruun yuun, ne curihanj nij yuvii tu'va chuman' nari' tuvi' nij so' ga Jesucristó a. Gaa ne caguáj nij yuvii, cataj nij yuvii:

—Caraa guee ní' rihaan Diose ei. Cunaj ndo'o vaa ca'na' síí ca'neé síí 'nij ra'a man ní' adonj. Síí uun chij rihaan ní' sij israelitá me so' chuguanj —taj nij yuvii, caguáj nij yuvii a.

¹⁴ Gaa ne nari' Jesucristó yo'o burró, gaa ne cavii so' xráa burró a. Dan me se cuyaán qui'yaj so' ga nana nihánj nana no rihaan danj Diose a: ¹⁵ “Soj sij man chuman' Jerusalén me se se chuhu'vi' soj ma'. 'Q se xcaj soj cuentá se vaa 'na' síí guun chij rihaan soj nanj adonj. Dan me se síí nica' nimán me so', ne táá so' xráa burró le'ej ta'níí xcuu burró chana adonj”, taj nana no rihaan danj Diose yo' a.

¹⁶ Dan me se nij sí tucu'yón se-nanā Jesucristó me se gaa güii catúj Jesucristó chuman' Jerusalén, ne ne xcay nij so' cuentá, ne ne caxrii rá nij so' se vaa qui'yaj so' ndaa vaa cataj nanā no rihaan yanj yo' ma'. Tzaj ne ndaa quisíj cavii sa' Jesucristó qui'yaj Diose, gaa ne ninuj rá nij so' nanā no rihaan danj Diose, ne ninuj rá nij so' se vaa guun che'é Jesucristó a.

¹⁷ Dan me se nij yuvii cumán ga Jesucristó me se cataj xna'anj nij so' nu' se vaa guun gaa canacúun Jesucristó man sí cu'naj Lázaro se vaa curihañanj so' yu'uj yujej ne cunuu i'na' uún ya sí cu'naj Lázaro qui'yaj Jesucristó a.

¹⁸ Gaa ne che'é se cuno nij yuvii man chuman' Jerusalén se vaa qui'yaj so' suun sa' nocoo yo', gaa ne che'é dan ca'na' nari' nij so' man Jesucristó a. ¹⁹ Che'é dan cataj nij sí fariseo rihaan tuvi' nij so' a:

—Ni'yaj soj ei. 'Q se ne qui'yaj canaán uxrá ní, qui'yaj soj a ma'. 'Q se veé danj ya canoco' cunudanj nij yuvii man rihaan chumii se-nanā so' nanj adonj —taj nij so' rihaan tuvi' nij so' ni'yaj nij so' man Jesucristó a.

Nanā nihánj taj xna'anj se vaa ca'na' doj sí a'mii xna'ánj griego ca'mii nij so' ga Jesucristó a

²⁰ Dan me se mán ta'aj nij sí a'mii xna'ánj griego, ne sij cuchí' chuman' Jerusalén gaa anuú cha'anj pascuá me nij so', ne cuchí' nij so' na'vij nij so' rihaan Diose a. ²¹ Dan me se cuchí' nij so' rihaan sí cu'naj Felipé sí cavii chuman' Betsaida chuman' naj estado Galilea, gaa ne xná'anj nij so' man so', ne cataj nij so':

—Me rá núj ca'mii núj doj ga Jesucristó, señor —taj nij so' rihaan sí cu'naj Felipé yo' a.

²² Gaa ne ca'anj sí cu'naj Felipé cataj xna'anj so' rihaan sí cu'naj Andrés se vaa cataj nij sí a'mii xna'ánj griego yo' rihaan so' a. Gaa ne ca'anj cataj xna'anj roj so' rihaan Jesucristó, ne cataj roj so' rihaan Jesucristó se vaa ca'na'

nij sí a'mii xna'ánj griego ne me rá nij so' ca'mii nij so' ga Jesucristó a. ²³ Gaa ne cataj Jesucristó rihaan roj so' a:

—'Unj sij ca'née Diose nīcaj yu'unj man yuvii, tzaj ne cuano nihánj me se quisj güii cavii sa' 'unj, ne guun chij 'unj, qui'yaj Diose ei. ²⁴ Ya ya cataj xna'anj 'unj rihaan soj cuano se vaa ase vaa 'núú vaa ní', ne sese se quiniy 'núú yaan rihaan yo'óo ne cavi' ma'an 'núú yaan yo', ne quinavij uun 'núú yaan, tzaj ne sese cavi' 'núú yaan yo', ne quisij que'ee doj 'núú qui'yaj yo' nanj adonj. ²⁵ Dan me se xa' sí me rá gaa i'na' rihaan chumii nihánj, tzaj ne yo'o cavi' so', ne xa' sí a'vej rá cavi' rihaan chumii nihánj che'é se me so' sí nocó' manj, tzaj ne yo'o gaa i'na' nimán so' nu' cavii nu' ca'anj adonj. ²⁶ Che'é dan me sese vaa 'o so' nuu rihanj 'yaj suun rihanj, ne canoco' so' manj cuaj ei. Ne me rej ma'an canicun' ma'anj ro', maan dan canicun' sí nuu rihanj uún nanj ei. Gaa ne cavii sa' uxrá sí 'yaj suun rihanj, qui'yaj Réj adonj.

²⁷ “Cuanó nihánj me se nanó ndo'o raj chuguanj. Ne daj qui'yáj a ranj a. Cachinj ni'yáj rihaan Réj se vaa tīnani so' manj rihaan sayuun quīranj cuano, rá soj na'. Taj che'é qui'yáj danj ma'. Che'e yan quīrán' 'unj sayuun ca'naj adonj —taj Jesucristó rihaan roj so' a.

²⁸ Gaa ne cachíin ni'yaj Jesucristó rihaan Diose, cataj so':

—Cavii sa' doj ma'án so' rihaan chumii nihánj, qui'yáa so', Ataj —taj Jesucristó, cachíin ni'yaj so' a.

Gaa ne cavii 'o nana rej xta' ca'mii Diose cuno nij so', ne nana cavii rej xta' me:

—Aj cavii sa' 'unj, qui'yáj, tzaj ne cavii sa' 'unj doj, qui'yáj adonj —taj nana yo' nana cavii rej xta' ca'mii Diose cuno nij so' a.

²⁹ Dan me se nicun' uxrá yuvii ga Jesucristó, ne cuno nij so' nana yo', ne cataj nij so' se vaa caguáj tu'vii rej xta' a. Ne yo'ó ta'aj nij so' cataj se vaa ca'mii yo'o se-mozó Diose

nana yo' rihaan Jesucristó a. ³⁰ Gaa ne cataj Jesucristó rihaan nij yuvii:

—Nuveé che'e orún' 'unj me ca'mii Diose nana yo' ma'. 'Q se ca'mii Diose nana yo', che'é rej xcaj soj cuentá ei. ³¹ Che'é se vaa quiranj cuano ca'ne' Diose cacun' che'é nij yuvii man rihaan chumii nihánj, ne quirii yaníj Diose man síi chree síi uun chij rihaan chumii nihánj chuguanj. ³² Gaa ne asa' quisíj naxcaj nii manj rihaan chumii nihánj cachron nii manj rihaan rcutze, gaa ne guun rá cunudanj nij yuvii canoco' nij yuvii manj, qui'yáj adonj —taj Jesucristó rihaan nij yuvii a.

³³ Ne ma'an nana nihánj nana ca'mii Jesucristó ro', taj xna'anj daj qui'yáj nii man so' ne cavi' so' a.

³⁴ Gaa ne cataj nij yuvii rihaan Jesucristó a:

—Aj ne'en núj nana no rihaan danj Diose se vaa síi ca'nej Diose tinanii man yuvii rihaan sayuun me se sij cayáan nu' cavii nu' ca'anj me so' a. Ne me che'é cataj so' nihánj se vaa naxcaj nii man síi ca'neé Diose nicaj yu'unj man yuvii rihaan chumii nihánj ga. Me che'é cavi' so' ga. Daj sij me síi ca'nej Diose nicaj yu'unj man yuvii, rá so' ga —taj nij yuvii, xna'anj nij yuvii man Jesucristó a.

³⁵ Che'é dan cataj Jesucristó rihaan nij so' a:

—Cuano nihánj me se vaj soj rej chuguun sa' ya'an, tzaj ne daj doj quisij orá quina'aj ya'an yo', ne se guun nucuaj soj xcaj soj cuentá ma'. Che'é dan vaa che'é xcaj soj cuentá ndaa vaa 'yaj nij síi vaj rej chuguun ya'an ei. Sese taj, ne guun soj síi chéé rej rmi', ne xa' síi chéé rej rmi', tzaj ne ne ne'en so' me rej vaj so' ma'. ³⁶ Dan me se vaj soj rej chuguun ya'an, ne che'é dan cuchuman rá soj ni'yaj soj ya'an sa' ei. Quisij qui'yaj soj danj, gaa ne guun soj ta'níi ya'an chuguun, ne sij xcaj cuentá guun soj adonj —taj Jesucristó rihaan nij yuvii a.

Quisíj ca'mii Jesucristó nana nihánj, gaa ne ca'anj Jesucristó, ne caxríj yuve so' man so', che'é se na'vej rá so' quene'en nij yuvií man so' a.

Nana nihánj taj xna'anj se vaa ne cuchuman rá nij sí israelitá ni'yaj nij so' man Jesucristó ma'

³⁷ Nda' se uxrá qui'yaj Jesucristó suun sa' nocoo ni'yaj nij yuvií, qui'yaj Diose, tzaj ne ne cuchuman rá nij yuvií se vaa sij ca'née Diose me so' a ma'. ³⁸ Ne veé danj quisíj ya nu' se-nana sí cu'naj Isaías sí nata' se-nana Diose gaa naá a. Dan me se cataj sí cu'naj Isaías:

—Ataj sí chij. Doj yuvií cuchumán rá cuno nana ca'mii núj, ne doj yuvií xcaj cuentá se vaa nucuaj ndo'o so' sij 'nij ra'a man núj ei —taj sí cu'naj Isaías yo' a.

³⁹ Ne vaa doj nana nihánj nana ca'mii Diose ne cachrón sí cu'naj Isaías rihaan yanj, ne dan me se cataj xna'anj Diose me che'é ne guun nucuaj nij yuvií israelitá cuchuman rá nij so' ni'yaj nij so' man Jesucristó a:

⁴⁰ —Sí ca'née 'unj me se nata' uxrá so' se-nanaj rihaan yuvií nihánj ndaa se caráán rihaan nij yuvií, ne se ca'vee quene'en nij so' doj ma'. Ne ne ca'vee catuu doj se-nanaj nimán nij so' ma'. 'O se na'vej uxrá rá nij so' xcaj nij so' cuentá ne canicaj nimán nij so' ne nahuun sa' nij so' qui'yáá 'unj ma' —taj Diose ne cachrón sí cu'naj Isaías rihaan yanj gaa naá a.

⁴¹ Danj ca'mii Isaías che'é se aj quene'en so' se vaa sa' uxrá qui'yaj Jesucristó, ne che'é dan ca'mii so' danj che'é Jesucristó a.

⁴² Tzaj ne cuchumán rá que'ee nij sí uun chij rihaan nij yuvií israelitá ni'yaj nij so' man Jesucristó a. Tzaj ne ne cataj xna'anj nij so' se vaa cuchumán rá nij so' ma'. 'O se chucu'vi' nij so' ni'yaj nij so' man nij sí fariseo, se vaa cuta' nij sí fariseo cacun' xráá nij so', gaa ne quirii yaníj nij sí fariseo man nij so' rque nij yuvií israelitá yo'

a. ⁴³ Dan me se niha' rá nij so' doj cunō nij so' ca'mii sa' yuvii che'é nij so', ne ne caraya'anj nij so' se vaa ve'é ca'mii Diose che'é nij so' a ma'.

Nana nihánj taj xna'anj che'é cacun' tumé síi na'vej rá cunō se-nana Jesucristó a

⁴⁴ Ne sca' ndo'o ca'mii Jesucristó, cataj so':

—Xa' síi amán rá ni'yaj manj, tzaj ne nuveé inanj ma'anj me síi amán rá so' ni'yaj so' man ma'. 'O se amán rá so' ni'yaj so' man síi ca'néé manj rihaan chumii nihánj adonj. ⁴⁵ Ne xa' síi acaj cuentá che'ej, tzaj ne so' me síi acaj cuentá che'é síi ca'néé manj rihaan chumii nihánj adonj. ⁴⁶ Xa' ma'anj, tzaj ne chuguun ya'an rihaan chumii nihánj qui'yáj gaa ca'naj rihaan chumii nihánj, che'é rej se quináj nij síi amán rá ni'yaj manj rej rmi' man chuguanj.

⁴⁷ “Ne ca'vee se se ca'vej rá yo'o so' cunō so' se-nanaj nana catúj xréé so', tzaj ne nuveé 'unj me síi cuta' cacun' xráá so' a ma'. 'O se nuveé che'e se cuta' 'unj cacun' xráá yuvii me ca'ná' 'unj rihaan chumii nihánj ma'. Tananj ca'ná' 'unj rihaan chumii nihánj che'é rej tinanii 'unj man nij yuvii man rihaan chumii nihánj rihaan chrej chi'ii uun chij nimán nij so' adonj. ⁴⁸ Dan me se síi tanáj xcō manj ne na'vej rá cunō se-nanaj me se quitaj cacun' xráá so' ei. 'O se che'é se ne cunō so' nana ca'mij rihaan so' ro', che'é dan quitaj cacun' xráá so' asa' quisíj güii ca'ne' Diose cacun' che'é yuvii chuguanj. ⁴⁹ Ne 'unj nihánj me se nuveé inanj nana cavii raj me nana ca'mij ma'. 'O se Réj síi ca'néé manj me síi cataj xna'anj rihanj daj ca'mij ei. ⁵⁰ Ne aj ne'enj se vaa sese cunō ní' se vaa cataj xna'anj so' rihaan ní', ne cayáán ní' ga so' nu' cavii nu' ca'anj a. Che'é dan nana a'mij me se ma'an nana ca'mii Réj rihanj me nij nana a'mij adonj. —Danj cataj Jesucristó a.

13

Nana nihánj taj xna'anj se vaa na'nu' Jesucristó tacóo nij sí tucu'yón se-nana so' a

¹ Dan me se gaa ataa quisij cha'anj pascuá, ne quene'en Jesucristó se vaa nichrun' quisij orá tanáj so' chumiij nihánj ne quinán' so' rihaan Rej so' Diose a. Dan me se 'ee rá so' man nij sí cachée ga so' rihaan chumiij nihánj, ne yo'ó 'ee rá so' man nij so' ndaa se cavi' so' a. ² Dan me se quisij orá chá xti'nó nij so', ne aj guun rá sí chree se vaa sí cu'naj Judas Iscariote ta'ní Simón me sí tacuachén man Jesucristó rihaan nij sí taj ri'yunj man Jesucristó a.

³ Ne aj quene'en Jesucristó se vaa quisij guun chij ma'an so' rihaan cunudanj rasuun, qui'yaj Diose, ne aj quene'en so' se vaa sij cavii rej yanj Diose me so' ne quinán' uún so' rihaan Diose a. ⁴ Dan me se gaa quisij chá xti'nó nij so', ne quirii Jesucristó cotoó nuu so', ne cata'aa so' 'ó yatzij toalla, ne tumij so' catuun so' a. ⁵ Veé dan, gaa ne caraa so' na rque rco'oo, gaa ne guun che'e so' na'nu' so' tacóo nij sí tucu'yón se-nana so', ne nachen so' yatzij toalla numij catuun so', ne tinacoó so' tacóo nij sí tucu'yón se-nana so' a. ⁶ Dan me se cuchi' so' rihaan sí cu'naj Simón Pedró, ne cataj Pedró rihaan so' a:

—Señor. Ma'an so' na'nu' tacój aj na' —taj Pedró, xná'anj so' man Jesucristó a.

⁷ Gaa ne cataj Jesucristó rihaan so' a:

—Ne ne'én so' me che'é 'yáj danj cuano ma'. Tzaj ne vaa güii, ne xcaj so' cuentá adonj —taj Jesucristó rihaan Pedró a.

⁸ —Daj chihaa míj se guun na'nu' so' tacój a ma' —taj Pedró rihaan Jesucristó a.

Gaa ne cataj Jesucristó rihaan so' a:

—Tzaj ne sese se na'nú' 'unj tacój so', ne se ca'vee guún so' tuví' 'unj ma' —taj Jesucristó rihaan Pedró a.

⁹ Gaa ne cataj Simón Pedró rihaan Jesucristó a:

—Se na'nú' so' inanj tacój, man Señor. Ndaa nu' ra'aj do', nu' raj do', na'nu' so' ei —taj Pedró rihaan Jesucristó a.

¹⁰ Gaa ne cataj Jesucristó rihaan so' a:

—Xa' sí aj cane, tzaj ne taj che'é na'nu' nii man nu' nee man so' ma'. 'O se aj vaa cuj man so' nanj á. Maan se inanj tacóo so' na'nu' nii nanj adonj. Ne nda' se aj vaa cuj man ta'aj soj, tzaj ne nuveé taran' soj me sí vaa cuj man ma' —taj Jesucristó a.

¹¹ 'O se aj quene'en Jesucristó se vaa taquachén yo'o tuvi' nij so' man so' rihaan nij sí taj ri'yunj man so', ne che'é dan cataj so' se vaa nuveé cunudanj nij so' me sí vaa cuj man a.

¹² Dan me se gaa quisj na'nu' Jesucristó tacóo nij so', ne nanuû so' se-cotoó so', ne ca'anj cane uún so' rej ne nij so', gaa ne xná'anj so' man nij so', cataj so':

—Ne'en soj me che'é qui'yáj danj man soj na'. ¹³ Xa' soj, tzaj ne ve'é a'mii soj rihanj, taj soj se vaa sij tucu'yón man soj mej, ne sij uun chij rihaan soj mej, ne cunaj uxrá a'mii soj ei. 'O se veé yá 'unj nanj á. ¹⁴ Dan me se 'unj me sí tucu'yón man soj ne 'unj me sí uun chij rihaan soj, tzaj ne guún 'unj mozó rihaan soj ne na'nú' 'unj tacóo soj ei. Che'é dan xcaj soj cuentá se vaa no xcúún soj cunu nica' nimán soj ne guun soj mozó rihaan tuvi' soj ne na'nu' soj tacóo tuvi' soj nanj adonj. ¹⁵ Danj inanj qui'yáj, che'é rej me raj quene'en soj manj, ne xcaj soj cuentá daj qui'yaj ma'an soj uún adonj. ¹⁶ Cuanq nihánj me cataj xna'anj yá 'unj rihaan soj se vaa nuveé sij uun chij doj me mozó rihaan se-ru'vee mozó ma'. Ne nuveé sij uun chij doj me sí ca'anj suun rihaan sí ca'née man so' ma'. Ne ase vaa mozó do', ase vaa sí ca'anj suun do', vaa soj rihanj a. Che'é dan daj se qui'yáá 'unj ro', danj gaa qui'yaj soj, qui'yaj suun

soj che'é tuvi' soj ei. ¹⁷ Ne aj cuno soj nana nihánj, ne sese qui'yaj soj nu' nana nihánj, ne vaa che'é guun niha' rá soj, ne ya cavií sa' soj adonj. ¹⁸ Tzaj ne ne ca'mij nana nihánj che'é taran' nij soj ma'. Dan me se aj ne'enj man soj sij narii 'unj canoco' manj, tzaj ne vaa che'é quisij guee nana nihánj nana no rihaan danj Diose adonj: “Síí chá rachruún gaj ro', me síí guun rá tiguíj che'é manj adonj”, me nana no rihaan danj Diose a.

¹⁹ “Asij cuano nihánj nu' rej rihaan cataj xna'anj 'unj rihaan soj daj guun rej rihaan, ne cuano nihánj me se ataa quíranj se vaa quíranj, tzaj ne asa' quisíj quíranj yo', gaa ne cuchuman rá soj daj sij mej ei. ²⁰ Ya ya cataj xna'anj 'unj rihaan soj se vaa xa' síí ve'é nicaj tuvi' ga síí ca'nej 'unj rihaan chumii nihánj, tzaj ne so' me síí ve'é nicaj tuvi' ga ma'anj, ne xa' síí ve'é nicaj tuvi' ga ma'anj, tzaj ne so' me síí ve'é nicaj tuvi' ga síí ca'née manj nanj adonj —taj Jesucristó rihaan nij síí tucu'yón se-nana so' a.

Nana nihánj taj xna'anj se vaa cataj xna'anj Jesucristó che'é síí tacuachén man so' rihaan nij síí taj ri'yunj man so' a

²¹ Síj ca'mii Jesucristó nana nihánj, gaa ne quinanó ndo'o rá so', gaa ne guun che'e so' cataj xna'anj so' daj qui'yaj yo'o so' man so', cataj so':

—Cuanó nihánj me se cataj yá 'unj rihaan soj se vaa yo'o tuvi' nij soj me síí tacuachén manj rihaan nij síí taj ri'yunj manj adonj —taj Jesucristó rihaan nij síí tucu'yón se-nana so' a.

²² Gaa ne ni'yaj taran' nij so' man tuvi' nij so' a. 'O se ne quene'en nij so' me che'é ca'mii Jesucristó nana vaa danj a ma'. ²³ Dan me se yanj yo'o so' x'núú Jesucristó, ne nichrun' uxrá ne so' ga Jesucristó, ne síí 'ee rá Jesucristó man me so' a. ²⁴ Che'é dan ticun' Simón Pedró raá Simón Pedró rihaan so', che'é rej xna'anj so' man Jesucristó me

síí che'e a'mii Jesucristó a. ²⁵ Che'é dan xná'anj tuvi' so' man Jesucristó, cataj so':

—Me síí qui'yaj danj, ga Señor' —taj so', xná'anj so' man Jesucristó a.

²⁶ Gaa ne cataj Jesucristó:

—Tiguíj 'unj doj rachrúun candó nuu rque co'oo, ne rquej man síí qui'yaj danj manj a —taj Jesucristó a.

Gaa ne tiguíj Jesucristó yo'o xco' rachrúun rque candó nuu rque co'oo, ne go' so' man síí cu'naj Judas ta'níí síí cu'naj Simón Iscariote a. ²⁷ Ne gaa quisíj quita'aa síí cu'naj Judas rachrúun yo', gaa ne catúj Satanás nimán so' a. Che'é dan cataj Jesucristó rihaan so' a:

—Cavii so' ca'anj so' cuaj qui'yáa so' ndaa vaa me rá so' á —taj Jesucristó rihaan Judas yo' a.

²⁸ Tzaj ne a 'ó nij so' ne quene'en me che'é ca'mii Jesucristó nana vaa danj rihaan síí cu'naj Judas a ma'. ²⁹ Dan me se che'é se sij tumé chrúun sa'anj me síí cu'naj Judas, che'é dan guun rá ta'aj nij so' se vaa ca'ne' Jesucristó suun rihaan so' quiraan so' se vaa cachijn rihaan nij so' che'é cha'anj do', se vaa go' so' doj sa'anj rihaan nij síí nique do' a.

³⁰ Dan me se nicaj Judas rachrúun yo', ne nu' quita'aa so' nu' curihanj so' xe', ne rej nii me yo' a.

Nana nihánj taj xna'anj che'é suun ca'ne' Jesucristó rihaan ni' a

³¹ Che'é dan gaa quisíj curihanj Judas, ne cataj Jesucristó rihaan yo'ó nij so' a:

—Daj doj quene'en yuvii se vaa sij sa' uxrá mej sij ca'née Diose nicaj yu'unj man yuvii, ne che'é dan quene'en nij yuvii se vaa sij sa' uxrá me ma'an Diose adonj. ³² Ne che'é dan quene'én' se vaa sij sa' me ma'anj, qui'yaj Diose, ne nichrun' qui'yaj so' danj nanj adonj. ³³ Nichrun' quinavij orá chée 'unj ga soj, nanj rej. Dan me se aj cataj 'unj rihaan

nij síi uun chij rihaan nij yuvii israelitá se vaa cavii 'uñj ca'anj 'uñj, ne se guun nucaj nij so' cuchi' nij so' rej ca'anj 'uñj ma'. Ne xa' ma'an soj, tzaj ne nano' ma'an soj manj, ne nihánj me cataj xna'anj 'uñj rihaan soj se vaa se guun nucaj ma'an soj cuchi' ma'an soj rej ca'anj 'uñj a ma'.³⁴ Ne nihánj me suun naca a'nej rihaan soj, se vaa yo'o gaa 'ee rá soj man tuvi' soj ei. Dan me se daj se cunuu 'ee raj ni'yaj man soj ro', danj gaa qui'yaj soj, gaa 'ee rá soj man tuvi' soj a.³⁵ Sese gaa 'ee rá soj man tuvi' soj, ne quene'en nu' yuvii man rihaan chumii se vaa sij tucu'yón se-nanaj me soj nanj adonj —taj Jesucristó rihaan nij síi tucu'yón se-nana so' a.

Nana nihánj taj xna'anj che'é nana nij ca'mii Pedró che'é Jesucristó a

³⁶ Gaa ne cataj Simón Pedró rihaan Jesucristó a:

—Me rej ca'anj so', ga Señor! —taj Pedró, xna'anj so' man Jesucristó a.

Gaa ne cataj Jesucristó:

—Xa' rej ca'anj 'uñj, tzaj ne se guun nucaáa so' canocó' so' manj cuano ma'. Tzaj ne vaa güii, ne canocó' so' manj adonj —taj so' rihaan Pedró a.

³⁷ Gaa ne cataj Pedró rihaan so' a:

—Me che'é se guun nucaj canocoj man so' cuano, Señor!. 'O se ca'nej nimanj cavij che'é so' á —taj Pedró rihaan Jesucristó a.

³⁸ Gaa ne cataj Jesucristó rihaan so' a:

—Ya ya ca'nej nimán so' cavii' so' che'ej, rá so' na'. Cuano nihánj me se cataj ya 'uñj rihaan so' se vaa gaa ataa caguaj to'loo, ne va'nuj ya cataj so' se vaa ne ne'én so' manj chuguanj —taj Jesucristó rihaan Pedró a.

14

Nana nihánj taj xna'anj che'é nu' se vaa qui'yaj Jesucristó che'é ní' a

¹ Gaa ne cataj Jesucristó rihaan taran' nij so' a:

—Ca'ne' rá soj ga suun guun vij rá á. Cuchuman rá soj ni'yaj soj Diose, ne cuchuman rá soj ni'yaj soj manj ei. ² Tucuá Réj me se vaa ndo'o rej cane yuvi ei. Sese ne vaa danj, ne me che'é cataj xna'anj 'unj rihaan soj se vaa ca'anj 'unj naqui'yaj sa' 'unj rej cane ma'an soj, rá soj ga. ³ Ne che'é se ca'anj 'unj naqui'yaj sa' 'unj rej cane soj, che'é dan ne'en soj se vaa ca'na' uún 'unj rihaan soj, ne nacaj 'unj man soj; ndaa síj, gaa ne cane rcua'aan taran' ni' yo' ei. ⁴ Ne aj ne'en soj chrej uchi' ndaa rej ca'anj 'unj nanj adonj —taj Jesucristó rihaan nij sí tucu'yón se-nana so' a.

⁵ Gaa ne cataj sí cu'naj Tomás rihaan Jesucristó a:

—Ne ne'en núj rej ca'anj so', man Señor. Asa' ca'vee quene'en núj chrej uchi' ndaa rej ca'anj so' ga —taj sí cu'naj Tomás, xna'anj so' man Jesucristó a.

⁶ Gaa ne cataj Jesucristó rihaan so' a:

—Ma'anj me guun chrej rihaan soj, ne ma'anj me nana ya cunō soj, ne ma'anj me sí qui'yaj ga i'na' nimán soj adonj. Sese se ca'vej rá yo'o so' canoco' so' manj, ne daj chihaa míj se cuchi' so' rihaan Réj Diose a ma'. ⁷ Sese ne'en ya soj manj, ne aj ne'en soj man Réj Diose adonj. Dan me se asij cuano ro', ne'en soj man so' nanj adonj —taj Jesucristó rihaan Tomás a.

⁸ Gaa ne cataj sí cu'naj Felipé:

—Tiháan so' man Réé so' rihaan núj, ne guun ya rá núj, Señor —taj Felipé rihaan Jesucristó a.

⁹ Gaa ne cataj Jesucristó rihaan Felipé a:

—Sij que'ee ndo'o güii cachée 'unj ga nij soj, ne me che'é ne quene'en so' manj, ga Felipé'. Xa' sí ne'en manj,

tzaj ne so' me sí ne'en Réj Diose adonj. Asa' ca'vee cataj so' se vaa me rá so' t'haán 'unj man Réj Diose rihaan so' ga. ¹⁰ Ne cuchumán ya rá so' se vaa cyaan vaa rá 'unj ga Réj Diose a. 'O se xa' nana a'mij, tzaj ne nuveé nana avii raa ma'anj me nana yo' ma'. 'O se nuu Réj Diose nimanj, ne so' me sí 'yaj suun nu' suun 'yaj sunj adonj. ¹¹ Cuchuman rá soj se vaa cyaan vaa rá 'unj ga Réj ei. Ca'vee se ne amán rá soj ni'yaj soj man ma'anj, tzaj ne cuchuman rá soj se-nanaj che'é suun 'yaj sunj ei. ¹² Ne cuano nihánj me se cataj yá 'unj rihaan soj se vaa sí amán rá ni'yaj manj me se ase vaa suun 'yaj suun ma'anj ro', danj gaa suun qui'yaj suun ma'an so' uún nanj adonj. Tzaj ne suun sa' doj qui'yaj suun so', che'é se nucuí' 'unj rihaan Réj Diose ei. ¹³ Ne me ma'an rasuun cachinj soj rihanj che'é se me soj sí noco' manj, ne nu' yo' qui'yáj che'é soj adonj. Ndaa síj, gaa ne ve'é ca'mii nii che'é Réj Diose, qui'yáj ei. ¹⁴ Sese cachinj soj yo'o rasuun rihanj che'é se me soj sí noco' manj, ne veé danj qui'yáj adonj.

¹⁵ “Sese ya aráj cochroj soj rihanj, ne cunō soj nij nana cataj xna'anj 'unj rihaan soj a. ¹⁶ Gaa ne cachinj ni'yaj ma'anj rihaan Réj Diose, gaa ne ca'nej so' yo'ó sí cuchi' rihaan soj, ne racuíj ndo'o so' man soj, ne canē so' ga soj nu' cavii nu' ca'anj a. ¹⁷ Dan me se Nimán Diose me sí cuchi' rihaan soj, ne inanj nana ya rque so' man soj a. Tzaj ne se guun nucuaj nij yuvii man rihaan chumii nihánj nacaj nij so' man Nimán Diose a ma'. 'O se ne ne'en nij so' man so' ma'. Tzaj ne soj me se ne'en soj man so', che'é se ne so' ga soj, ne yo'o canē so' nimán soj adonj. ¹⁸ Se quináj ma'an soj ma'. 'O se ca'na' uún 'unj rihaan soj ei. ¹⁹ Nichrun' ca'anj 'unj, ne se quene'en uún nij sí man rihaan chumii nihánj manj ma'. Tzaj ne quene'en ma'an soj manj, che'é se yo'o vaa i'na' 'unj ga Diose, ne gaa i'na' nimán soj ga Diose adonj. ²⁰ Asa' quene'en soj

manj ne quene'en soj se vaa cuyaan vaa rá 'unj ga Réj, ne cuyaan gaa rá soj ga 'unj nanj adonj. ²¹ Síí nari' se-nanaj ne uno nana yo' ro', síí yo' me síí ya ya aráj cochroj rihanj chuguanj. Ne cunu 'ee rá Réj Diose man síí aráj cochroj rihanj, ne gaa 'ee rá ma'anj man so', ne quene'en so' manj, qui'yáj ei —taj Jesucristó rihaan nij síí tucu'yón se-nana so' a.

²² Dan me se ca'mii síí cu'naj Judas rihaan so' a. Tzaj ne nuveé sij cu'naj Judas Iscariote me so' ma'. Yo'ó síí cu'naj Judas me a. Dan me se xná'anj so' man Jesucristó, cataj so':

—Me che'é cataj so' cuano nihánj se vaa quene'en núj mán so' qui'yáa so', tzaj ne se quene'en nij síí man rihaan chumij nihánj mán so' ga. Me che'é ca'mii so' danj ga —taj Judas, xná'anj so' man Jesucristó a.

²³ Gaa ne cataj Jesucristó rihaan so' a:

—Sese aráj cochroj yo'o so' rihanj, ne sese cunō so' se-nanaj, gaa ne cunu 'ee rá Réj Diose man so', gaa ne cuchí' núj rihaan so', ne yo'o cayáan núj ga so' adonj. ²⁴ Xa' síí ne aráj cochroj rihanj, tzaj ne ne uno so' se-nanaj ma'. Ne nana ca'mij cuno soj me se nuveé inanj se-nanaj me nana yo' ma'. Se-nana Réj síí ca'née manj rihaan chumij nihánj me nana ca'mij cuno soj nanj adonj.

²⁵ “Dan me se cuano yaj ne ma'anj ga soj, ne ca'mij nu' nana nihánj rihaan soj adonj. ²⁶ Tzaj ne vaa güii ca'nej Réj Diose man Nimán so' cuchí' Nimán so' rihaan soj, ne racuíj ndo'o Nimán so' man soj, gaa ne tucu'yón Nimán so' nu' nana man soj, ne ninuj rá soj nu' nana ca'mij rihaan soj, qui'yaj Nimán Diose yo' ei.

²⁷ “Dan me se se xej nuu nimán 'unj tanáj 'unj rihaan soj, ne se xej nuu nimán 'unj rquej man soj, ne se tiha' yu'unj 'unj man soj, ndaa vaa 'yaj nij síí man rihaan chumij nihánj ma'. Ya ya gaa xej nimán soj, qui'yaj yá 'unj adonj. Taj

che'le' quinano rá soj ma'. Se cuhu'vi' nimán soj ma'. ²⁸ Aj cuno soj nana ca'mij, se vaa cavii 'unj quinán' 'unj, tzaj ne ca'na' uún 'unj rihaan soj adonj. Sese sij aráj cochroj rihanj me soj, ne guun niha' rá soj cuno soj nana se vaa cavii 'unj quinán' 'unj yan yanj Réj Diose ei. Uun chij doj Réj rihanj nanj adonj.

²⁹ “Cuanō nihánj me se cataj xna'anj 'unj rihaan soj daj quirán' 'unj rej rihaan ní', ne asa' quisíj quirán' 'unj danj, gaa ne me rá 'unj cuchuman rá soj ni'yaj soj manj chuguanj. ³⁰ Se ca'mij que'ee doj nana rihaan soj a ma'. 'Q se daj doj ca'na' sí chree sí guun chij rihaan chumii nihánj, ne a doj se ca'vee guun chij so' rihanj a ma'. ³¹ Tzaj ne me rá 'unj quene'en nij sí man rihaan chumii nihánj se vaa aráj cochróo 'unj rihaan Réj Diose, ne che'le' dan qui'yáj ndaa vaa cataj xna'anj so' rihanj adonj. Canicun' caya soj, ne cavii ní' ca'anj ní' ei —taj Jesucristó rihaan nij sí tucu'yón se-nana so' a.

15

Nana nihánj taj xna'anj se vaa ase vaa yo'q ya'aa coj chruj uvá ro', danj vaa Jesucristó, ne ase vaa ya'aa ra'a avii xráa ya'aa manj ro', danj vaa ní' a

¹ Gaa ne cataj uún Jesucristó a: —Ase vaa yo'q ra'a manj chruun uvá ro', danj vaa yá 'unj, ne Réj Diose me sí tumé chruun uvá yo' chuguanj. ² Ne a me ma'an 'o ra'a chruun yo' ne rii chruj uvá, ne a'néj so' man ra'a yo' nanj adonj. Tzaj ne ra'a chruun man chruj uvá raá me se ve'é a'ne' so' man yo', gaa ne cumán doj chruj uvá raá yo' uún ei. ³ Dan me se ra'a chruun cachij sa' me soj, che'le' se aj cuno soj nana ca'mij rihaan soj ei. ⁴ 'Q nuû rá soj manj, ne 'o nuû 'unj nimán soj a. Dan me se xa' ra'a chruun uvá, tzaj ne se ca'vee cumán chruj raá yo' sese ma'an inanj yo' a ma'. Ne ase vaa ra'a chruun chruj uvá ro', danj vaa soj, ne sese

se cuno sa' soj rihanj, ne sese ca'anj yanij soj rihanj, ne se ca'vee qui'yaj soj ndaa vaa me ra Réj Diose qui'yaj soj ma'.

⁵ “Dan me se 'unj nihánj me ma'an ra'a manj coj chruj uvá, ne soj me ra'a catuun avii xráa ra'a manj ei. Ne sese yo'o cuno soj rihanj, ne sese yo'o cunuû 'unj nimán soj, ne qui'yaj uxrá soj se vaa me ra Diose qui'yaj soj chuguanj. 'O se sese se racuíj 'unj man soj, ne se guun nucuaj soj qui'yaj suun soj a doj suun sa' ma'. ⁶ Sese se ca'vej rá yo'o so' quinaj so' ga 'unj, ne quirijij nii man so', ndaa vaa 'yaj nii man ra'a chruun yo', ne canacoo yo', ne naqui'yaj chre' nii man nij ra'a chruun yo', ne quirijij nii man nij yo' rihaan ya'an ei. Dan me se cacaa nu' nij síí vaa danj nanj adonj.

⁷ “Tzaj ne sese yo'o cuno soj rihanj, ne sese yo'o cunuû se-nanaj nimán soj, ne ca'vee se me ma'an rasuun guun rá soj cachinj soj rihanj, ne rquej man soj chuguanj. ⁸ Che'é se uno soj rihanj, che'é dan a'mii sa' yuvii che'é Réj Diose, ne che'é dan guun nucuaj soj qui'yaj suun ndo'o soj suun sa', ne sese cuno sa' soj rihanj, ne síí tucuyón se-nanaj me soj adonj. ⁹ Dan me se daj se 'ee rá Réj manj ro', danj vaa 'ee raj man soj chuguanj. Ne yo'o gaa 'ee raj ni'yaj 'unj man soj, qui'yaj soj ei. ¹⁰ Sese a'née sa' soj suun a'nej rihaan soj, ne yo'o gaa 'ee raj man soj a. Veé danj 'yáá 'unj, ne a'née sa' 'unj suun a'ne' Réj Diose rihanj, ne yo'o 'ee rá so' manj adonj.

¹¹ “Nu' nana nihánj cataj xna'anj 'unj rihaan soj che'é se me raj gaa niha' uxrá raj ni'yaj 'unj man soj, ne me raj gaa niha' uxrá rá ma'an soj uún a. ¹² Nihánj me suun sa' ya a'nej rihaan soj cuno soj ei. Nda' rá se vaa 'ee raj ni'yaj 'unj man soj ro', danj gaa 'ee rá soj ni'yaj soj tuvi' soj ei. ¹³ Dan me se sese ca'vej rá yo'o so' nayon so' rihaan tuvi' so' cavi' so' che'é tuvi' so', ne sij 'ee ya rá man tuvi' me so', ne taj vaj a doj síí 'ee doj rá man tuvi' rihaan síí ca'vej cavi' che'é tuvi' a ma'. ¹⁴ Ne nij soj me se tuvij me soj

sese qui'yaj soj ndaa vaa cataj xna'anj 'unj rihaan soj nanj adonj. ¹⁵ Rej rihaan ní' me se se cataj 'unj se vaa se-mozó 'unj me soj a ma'. 'O se mozó me se ne ne'en so' daj 'yaj síi uun chij rihaan so' ma'. Xa' soj, tzaj ne aj cataj 'unj se vaa tuvij me soj, che'é se aj cataj xna'anj 'unj rihaan soj nu' se vaa cataj Réj Diose rihanj adonj. ¹⁶ Ne quinarií soj manj a ma'. Tananj ma'án 'unj nihánj quinarií man soj ne cuné' 'unj man soj, yan cavií soj qui'yaj ndo'o soj se vaa me rá Diose qui'yaj soj, ne se quinavij suun sa' 'yaj suun soj daj chihaa míj ma'. Ne che'é se cuné' 'unj man soj, che'é dan me ma'an rasuun cachinj soj rihaan Réj Diose che'é se me soj síi noco' manj, ne rque so' rasuun yo' man soj adonj. ¹⁷ Nihánj me se vaa cataj xna'anj 'unj rihaan soj, se vaa gaa 'ee rá soj man tuvi' soj ei —taj Jesucristó rihaan nij síi tucu'yón se-nana so' a.

Nana nihánj me taj xna'anj Jesucristó se vaa nij ndo'o qui'yaj nij síi man rihaan chumií nihánj man ní' a

¹⁸ Gaa ne cataj uún Jesucristó a:

—Sese quitaj ri'yunj nij síi man rihaan chumií nihánj ni'yaj nij so' man soj, ne xcaj soj cuentá se vaa asino yaan quitáa ri'yunj nij so' man ma'anj a. ¹⁹ Sese sij man rihaan chumií nihánj uun me ma'an soj, ne gaa niha' rá yo'ó nij síi man rihaan chumií nihánj ni'yaj nij so' man soj asuun, tzaj ne narií 'unj man soj se vaa tanáj soj chumií nihánj ne canoco' soj manj, ne che'é dan nuveé sij man rihaan chumií nihánj me soj cuano ma'. Che'é dan táa ri'yunj nij síi man rihaan chumií nihánj ni'yaj nij so' man soj ei.

²⁰ “Yo'o cunuû rá soj nana nihánj nana cataj xna'anj 'unj rihaan soj se vaa nuveé sij uun chij doj me mozó rihaan se-ru'vee mozó ma'. Che'é se canoco' nij síi taj ri'yunj manj qui'yaj nij so' sayuun manj ro', che'é dan ne'en soj se vaa ndaa ma'an soj do', canoco' nij so' qui'yaj nij so'

sayuun nanj adonj. Ne che'é se ne cunō nij so' se-nanaj, ne che'é dan ne'en soj se vaa se cuno nij so' se-nana soj a man adonj. ²¹ Dan me se qui'yaj nij so' nu' se nij yo' man soj, che'é se me soj sí nocō' manj, che'é se ne ne'en nij so' man sí ca'née manj chuguanj. ²² Sese ne ca'na' 'unj, ne sese ne ca'mij ga nij so', ne taj vaj cacun' tumé nij so' saj ma'. Tzaj ne cuano nihánj me se natá' 'unj se-nana Diose rihaan nij so', ne se ca'vee cataj nij so' se vaa nuveé sij taj ri'yunj man Diose me nij so' ma'. ²³ 'O se sí taj ri'yunj manj ro', so' me sí taj ri'yunj man Réj Diose ei. ²⁴ Ne suun sa' nocōo qui'yaj sunj quene'en nij so' me se ne qui'yaj a yo'ó yuvi suun sa' nocōo vaa danj ma'. Ne sese ne qui'yaj suun sa' nocōo yo' quene'en nij so', ne ne tumé nij so' cacun' saj ma'. Tzaj ne yaj me se aj quene'en nij so' nij suun sa' nocōo qui'yaj sunj, ne quitáa ri'yunj nij so' mán 'unj, man Réj Diose do', nanj adonj. ²⁵ Tzaj ne nihánj me se quisij ya nu' nana nihánj nana nō rihaan se-tucuanj Moisés nana nayaa ma'an nij so' se vaa, "Quitáa ri'yunj rma'an nij so' manj", taj se-tucuanj Moisés yo', ne veé danj qui'yaj guee nij so' nanj adonj.

²⁶ "Dan me se ca'nej 'unj Nimán Diose cavii so' rej ne Diose ca'na' so' rihaan soj, ne racuíj so' man soj, ne inanj nana ya rque so' man soj, ne asa' ca'na' Nimán Diose rihaan soj, gaa ne cataj xna'anj so' rihaan soj che'ej ei. ²⁷ Ne cataj xna'anj ma'an soj che'ej, che'é rej asij guun che'ej cachée 'unj rihaan chumii nihánj, cachée soj gaj ei.

16

¹ "Nihánj me quisij cataj xna'anj 'unj nu' nana nihánj rihaan soj, che'é rej na'vej raj guun na'aj soj che'é se vaa quiran' soj a. ² 'O se se ca'vej rá nij sí israelitá cunū chre' soj ga nij so' rá ve' tucu'yón nij so' se-tucuanj Moisés ma'. Ne quisij güii guun rá nij so' se vaa nuveé sij nocō' man

Dioṣe me soj, ne guun rá síí ticavi' man soj se vaa ve'é uxrá 'yaj suun so' rihaan Dioṣe gaa ticavi' so' man soj a. ³ Danj qui'yaj nii, che'é rej ne ne'en uxrá nii man Réj Dioṣe do', man ma'anj do' a. ⁴ Tzaj ne nihánj me cataj xna'anj 'unj nu' nana nihánj rihaan soj, che'é rej asa' quiran' soj nu' sayuun nihánj, ne ninuj rá soj se vaa aj cataj xna'anj 'unj rihaan soj che'é nu' nihánj nanj adonj —taj Jesucristó rihaan nij síí tucu'yón se-nana so' a.

Nana nihánj me taj xna'anj Jesucristó se vaa ca'anj so' ne ca'na' Nimán Dioṣe rihaan ní' a

Gaa ne cataj uún Jesucristó a:

—Ne cataj xna'anj 'unj nu' nana nihánj rihaan soj gaa guun che'e soj cachéé soj gaj, che'é se cachéé ma'anj ga soj, ne che'é dan ne cachiiin nana vaa danj rihaan soj ma'. ⁵ Tzaj ne cuano nihánj me se quinán' uún 'unj rihaan síí ca'neé manj rihaan chumii nihánj, ne me che'é ne xná'anj soj manj me rej ca'anj 'unj ga. ⁶ Tzaj ne che'é se cataj xna'anj 'unj rihaan soj se vaa ca'anj 'unj ro', che'é dan nanó ndo'o rá soj ne nuu xru' rá soj chuguanj. ⁷ Tzaj ne ya vaa nana nihánj nana cataj xna'anj 'unj rihaan soj, se vaa cavii sa' soj doj che'é se ca'anj 'unj adonj. 'O se sese se ca'anj 'unj, ne se ca'na' Nimán Dioṣe rihaan soj ma'. Tzaj ne sese ca'anj 'unj, ne ca'nej 'unj man so' rihaan soj adonj. ⁸ Ne asa' quisíj ca'na' so', ne cutá' so' cacun' xráá nij síí man rihaan chumii nihánj se vaa tumé nij so' cacun' do', se vaa ataa cunu sa' nij so' rihaan Dioṣe do', se vaa ca'ne' ya Dioṣe cacun' che'é nij so' do' a. ⁹ Dan me se che'é se ne cuchuman rá nij yuvii ni'yaj nij so' manj ro', che'é dan cataj Nimán Dioṣe se vaa tumé nij so' cacun' a. ¹⁰ Che'é se cavii 'unj quinán' 'unj rej yanj Réj Dioṣe ne se quene'en soj doj manj ro', che'é dan cataj Nimán Dioṣe se vaa ataa cunu sa' nij yuvii rihaan Dioṣe a. ¹¹ Che'é se aj ca'ne' Dioṣe cacun' che'é síí chree síí uun chij rihaan chumii

nihánj ro', che'é dan cataj Nimán Diose se vaa ca'ne' Diose cacun' che'é ma'an nij yuvii uún adonj.

¹² “Dan me se vaa uxrá doj nana me raj cataj xna'anj 'unj rihaan soj, tzaj ne se guun nucuaj soj cunō soj nana yo' cuano a ma'. ¹³ Tzaj ne asa' quisij ca'na' Nimán Diose yo', ne tucu'yón so' nu' nana ya rihaan soj nanj ei. 'Q se sij a'mii inanjan nana ya me so' adonj. 'Q se se ca'mii so' nana cavii raá so' ma'. Tananj ca'mii so' inanjan nana cataj xna'anj Diose cunō so', ne dan me se cataj xna'anj so' che'é se vaa ca'na' rihaan soj rej rihaan soj nanj adonj. ¹⁴ Ca'mii sa' so' che'é 'unj, che'é se nicaj so' se-nanaj, ne nicaj so' nu' si'yáj, ne cataj xna'anj so' nana yo' rihaan soj chuguanj. ¹⁵ Nu' se nicaj Réj Diose me se si'yáj me yo' ei. Che'é dan cataj 'unj se vaa nicaj so' si'yáj, ne tijaan so' rihaan soj a —taj Jesucristó rihaan nij síi tucu'yón se-nana so' a.

Nana nihánj me taj xna'anj Jesucristó che'é güii guun niha'rá nij síi tucu'yón se-nana so' a

¹⁶ Gaa ne cataj uún Jesucristó:

—Cachen doj, gaa ne se quene'en soj manj ma'. Gaa ne cachén doj uún, gaa ne quene'en uún soj manj chuguanj —taj Jesucristó rihaan nij síi tucu'yón se-nana so' a.

¹⁷ Che'é dan xná'anj nij síi tucu'yón se-nana so' man tuvi' nij so', cataj nij so':

—Me che'é ca'mii so' nana vaa danj se vaa, “Cachen doj, gaa ne se quene'en soj manj, ne cachén doj uún, gaa ne quene'en uún soj manj, che'é se cavii 'unj quinán' 'unj rej yanj Réj Diose a”. Me che'é tu'va so' danj, rá soj ga —taj nij síi tucu'yón se-nana Jesucristó, xná'anj nij so' man tuvi' nij so' a.

¹⁸ Che'é dan xná'anj uún nij so', cataj nij so':

—Me che'é ca'mii so' nana “cachén doj” ga. 'Q se ne ne'en uxrá núj daj taj so' a ma' —taj nij so' rihaan tuvi' nij so' a.

¹⁹ Quene'en Jesucristó se vaa me rá nij so' xná'anj nij so' man so', ne che'é dan xná'anj ma'an so' man nij so', cataj so':

—Me che'é xná'anj ndo'o soj man tuvi' soj che'é nana ca'mij, se vaa cachén doj, gaa ne se quene'en uún soj manj, gaa ne cachén doj uún, gaa ne quene'en uún soj manj ga. ²⁰ Cuanō nihánj me cataj yá yá 'unj rihaan soj se vaa ta'vee soj ne quinano ndo'o rá soj, tzaj ne guun niha' rá nij síi man rihaan chumií nihánj adonj. Nda' se quinano ndo'o rá soj, tzaj ne cachén doj, gaa ne guun niha' uxrá nimán soj nanj ei. ²¹ Dan me se chana uchruj ne'ej me se nanó ndo'o rá no', che'é se daj doj quisij orá cuchruj no' ne'ej, tzaj ne gaa quisij ca'ngaa ne'ej, ne ni'yón no' nu' sayuun quiran' no' nanj ei. 'Q se uun niha' ndo'o rá no' che'é se ca'ngaa yuvij rihaan chumií nanj adonj. ²² Ne xa' soj, tzaj ne cuano nihánj me se nanó rá soj, tzaj ne vaa güii quene'en uún 'unj man soj, gaa ne guun niha' uxrá rá soj, ne taj vaj a doj síi ca'nee se niha' nimán soj a ma'. ²³ Ne güii dan me se se xná'anj soj a doj nana manj a ma'. Ya ya cataj xna'anj 'unj rihaan soj cuano se vaa me ma'an rasuun cachinj ni'yaj soj rihaan Réj Diose ne cata' tu'va soj se-chuvij, ne rque so' nu' yo' man soj adonj. ²⁴ Dan me se nda' se sij noco' manj me soj, tzaj ne gaa rque me se ne cachinj ni'yaj soj a doj rasuun rihaan Diose ma'. Cachinj ni'yaj soj, ne quiri' soj ei. Ndaa síj, gaa ne gaa niha' uxrá rá soj adonj —taj Jesucristó rihaan nij síi tucu'yón se-nana so' a.

Nana nihánj me taj xna'anj Jesucristó se vaa quinán' so' rihaan Réj so' Diose ne ca'na' uún so' rihaan chumií a

²⁵ Gaa ne cataj uún Jesucristó a:

—Dan me se aj ca'mii cachrón ndo'oj rihaan soj che'é rasuun nihánj, tzaj ne vaa güii, ne se ca'mii cachronj doj rihaan soj a ma'. Tananj nana nica nata' 'unj rihaan soj che'é Réj Diose a. ²⁶ Ne güii dan me se cachinj ni'yaj soj

rasuun rihaan Réj Diose, ne cataj tu'va soj se-chuvij, ne taj che'é cataj 'un̄j rihaan soj se vaa ma'an̄j cachin̄j ni'yaj rihaan Réj che'é soj a ma'. ²⁷ 'O se ma'an̄ Réj Diose 'ee rá man soj, che'é se sij aráj cochroj rihan̄j me soj, ne amán rá soj se vaa cavii 'un̄j rihaan Réj Diose nan̄j á. ²⁸ Dan me se cavii 'un̄j rihaan Réj Diose, ne ca'ná' 'un̄j rihaan chumii nihán̄j, gaa ne cavii uún 'un̄j rihaan chumii nihán̄j, ne nucuí' uún 'un̄j rihaan Réj Diose adon̄j —taj Jesucristó rihaan nij sí tucu'yón se-nan̄a so' a.

²⁹ Gaa ne cataj nij sí tucu'yón se-nan̄a so' a:

—Cuano nihán̄j me se nan̄a nica a'mii so' no núj, ne a doj ne ca'mii cachrón so' ma'. ³⁰ Nihán̄j me se ne'en núj se vaa ne'én so' cunudan̄j, ne ndaa ne'én so' me nan̄a uun rá yuvii xna'an̄j yuvii mán so' a. Che'é dan amán rá núj se vaa cavii so' rihaan Diose nan̄j á —taj nij sí tucu'yón se-nan̄a Jesucristó a.

³¹ Gaa ne xna'an̄j Jesucristó man nij so', cataj so':

—Ndaa yaj cuchumán ya rá soj na'. ³² Dan me se quisij güii, ne veé aj quisij güii yo', ne cha'nuu soj, ne ino rej cunan̄j 'o 'o soj, ca'an̄j soj, ne tanáj soj man orún' 'un̄j nan̄j á. Tzaj ne se quináj orún' 'un̄j ma'. 'O se nicun' Réj Diose gaj adon̄j. ³³ Nu' nan̄a nihán̄j ca'mij rihaan soj, che'é se me raj gaa xej nimán soj che'é rej noco' soj manj, tzaj ne quiran' soj sayuun rihaan chumii nihán̄j, tzaj ne vaa che'é guun niha' rá soj, ne guun ya ya rá soj se vaa 'un̄j nihán̄j qui'yaj canaán ya rihaan chumii nihán̄j ei —taj Jesucristó rihaan nij sí tucu'yón se-nan̄a so' a.

17

Nan̄a nihán̄j taj xna'an̄j daj ca'mii Jesucristó gaa cachín ni'yaj so' rihaan Rej so' Diose a

¹ Quisíj ca'mii Jesucristó nana dan rihaan nij sí tu-cu'yón se-nana so', gaa ne naxcaj rihaan so', ni'yaj so' rej xta', ne cataj so':

—Aj quisíj orá yo', Ataj. Ve'é cavii 'unj sij ta'nij so', qui'yáa so', gaa ne ve'é ca'mii yuvií che'é so', qui'yáj, ² che'é se guun chij 'unj rihaan cunudanj yuvií, qui'yáa so' a. Ne che'é dan nu' nij sí rqué so' manj me se gaa i'na' nij so' nu' cavii nu' ca'anj, qui'yáj a. ³ Ne sí gaa i'na' nu' cavii nu' ca'anj me se so' me sí ne'en mán so' do', mán 'unj do' a. Dan me se orún' so' me Diose ya, ne 'unj Jesucristó me sí ca'née so' rihaan chumii nihánj adonj. ⁴ Dan me se aj qui'yaj sunj nu' suun ca'né' so' rihanj, ne che'é dan aj ca'mii sa' nij yuvií man rihaan chumii nihánj che'é so' nanj adonj. ⁵ Ne cuano nihánj me se qui'yáa so' cavii sa' 'unj ga ma'án so', Ataj Chij, ndaa vaa cavii sa' 'unj ga so' asij ataa guun chumii nihánj a.

⁶ “Ne xa' nij sí rqué so' manj sí cavii rihaan chumii nihánj, tzaj ne cataj xna'anj 'unj se-nana so' rihaan nij so', ne sij cuno rihaan so' me nij so', ne rqué so' man nij so' rihanj, ne aj canoco' nij so' se-nana so' nanj á. ⁷ Nihánj me se ne'en nij so' se vaa nij rasuun nicaj 'unj me se ma'án so' me sí rqué nu' rasuun yo' manj nanj adonj. ⁸ 'O se cataj xna'anj 'unj nu' nana rqué so' manj rihaan nij so', ne cuno nij so', ne ne'en ya' nij so' se vaa cavii 'unj rihaan so', ne amán rá nij so' se vaa ca'née so' manj rihaan chumii nihánj a.

⁹ “Nihánj me se achíin ni'yáa 'unj rihaan so' che'é nij so' a. Ne xa' che'é nij sí man rihaan chumii nihánj, tzaj ne se cachíin ni'yáa 'unj che'é cunudanj nij so' ma'. Maan inanj che'é nij sí rqué so' manj me cachinj ni'yáa 'unj rihaan so' adonj. 'O se sij uno rihaan so' me nij so' nanj á. ¹⁰ Ne nij sí noco' manj me se noco' nij so' mán so', ne nij sí noco' mán so' ro', noco' manj, ne aj cavii sa' 'unj, qui'yaj nij so' nanj

á. ¹¹ Ne nihánj me se nuví' 'unj yáán rihaan chumií nihánj a ma'. 'O se nij síí nihánj yáán rihaan chumií nihánj adonj. 'Unj me se quínán' 'unj rej yanj so' nanj adonj. Dan me se nij síí rqué so' manj me se qui'yáá so' se ndo'o, ne cutumé so' man nij so', che'é rej yo'o cunō nij so' rihaan so', Ataj Chij. Ne cuyaan gaa rá nij so' ga ní' ei. ¹² Gaa cayáán 'unj ga nij so' me se tumej man nij so' cunō nij so' rihaan so' a. Che'é se rqué so' man nij so' rihanj ro', che'é dan ve'é tumej man nij so' a. Ne cunaj cutumej man nij so' adonj. Ne a 'ó nij so' ne ca'anj ni'ya, qui'yáj ma'. Tzaj ne quene'én so' se vaa ca'anj ni'ya yo'o tuvi' nij so', ne orún' so' ca'anj ni'ya, ne dan me se quisij ya nu' nana nō rihaan dáán so' adonj.

¹³ “Nihánj me se quínán' 'unj rej yanj so', ne a'mii 'unj nu' nana nihánj gaa vaj 'unj rihaan chumií nihánj, che'é se me raj gaa niha' uxrá rá nij so' ndaa se vaa niha' rá ma'anj adonj. ¹⁴ Aj rquej se-nana so' rihaan nij so', ne che'é dan táá ri'yunj nij síí man rihaan chumií nihánj ni'yaj nij so' man nij síí rqué so' manj a. 'O se ase vaa 'unj ro', danj vaa nij síí rqué so' manj, ne nuveé sij man rihaan chumií nihánj me nij so' a ma'.

¹⁵ “'O se se cachíín ni'yáá 'unj se vaa ca'nee so' man nij so' rihaan chumií nihánj ma'. 'O se me rá 'unj cutumé so' man nij so' se cunuu chi'ii nimán nij so' a man adonj. ¹⁶ Dan me se ase vaa 'unj vaa nij so', ne nuveé sij man rihaan chumií nihánj me nij so' ma'. ¹⁷ Inanj nana ya cunō nij so', qui'yáá so', gaa ne sa' inanj gaa nij so' rihaan so' á. Ne se-nana ma'án so' me nana ya yo' ei. ¹⁸ Dan me se ca'néé 'unj man nij so' rihaan chumií nihánj, ndaa vaa ca'néé so' man ma'anj rihaan chumií nihánj a. ¹⁹ Ne nihánj me se inanj qui'yaj sunj rihaan so' cavi' 'unj che'é nij so', che'é rej cunuu sa' ya nij so' rihaan so' adonj.

²⁰ “Ne nuveé inanj che'é nij síí nihánj me achíín ni'yáj

rihaan so' a ma'. Tananj achíin ni'yáa 'unj che'é nij síi cunō se-nana so' ne cuchuman rá ni'yaj manj vaa güüi, qui'yaj nij síi nihánj síi nata' se-nana so' nanj adonj. ²¹ Dan me se, né so' ga 'unj, Ataj Chij, ne né 'unj ga so' a. Ne 'o rcua'aan ní', ne dan me se achíin ni'yáa 'unj che'é taran' nij so' se vaa cyaan gaa rá taran' nij so' uún, ne yo'o noco' nij so' man ní', ne che'é dan cuchuman rá nij síi man rihaan chumiij nihánj se vaa ca'née so' manj rihaan chumiij nihánj a. ²² Ne ase vaa cavii sa' 'unj qui'yáa so' ro', danj cavii sa' nij so', qui'yáj, che'é se me rá 'unj cyaan gaa rá nij so' ndaa rá se vaa 'yaj ma'an ní' a. ²³ Dan me se cayáan 'unj ga nij so' ndaa vaa yáan so' ga 'unj, gaa ne quisij nij so' nari' nij so' nu' nana ya, ne ase vaa orún' yuvii ro', danj gaa nij so' a. Ndaa síj, gaa ne quene'en nij síi man rihaan chumiij nihánj se vaa ca'née so' manj ne 'ee rá so' man nij síi rqué so' manj ndaa vaa 'ee rá so' manj adonj.

²⁴ “Ne xa' nij síi rqué so' manj, tzaj ne me rá 'unj cayáan nij so' ga 'unj rej cayáan 'unj, Ataj. 'O se me rá 'unj quene'en nij so' se vaa cavii sa' 'unj qui'yáa so' á. 'O se asij ataa qui'yáa so' chumiij nihánj me se aj 'ee rá so' manj, ne cavii sa' 'unj, qui'yáa so' ei. ²⁵ Ataj Chij, sa' inanj 'yáa so' ei. Tzaj ne ne ne'en nij síi man rihaan chumiij nihánj mán so' ma'. Tzaj ne 'unj me se quene'enj mán so', ne quene'en nij síi nihánj se vaa ca'née so' manj rihaan chumiij nihánj a. ²⁶ Ne cataj xna'anj 'unj rihaan nij so' daj sij mé so', ne cataj 'unj doj rihaan nij so', che'é rej gaa 'ee rá so' man nij so' ndaa vaa 'ee rá so' manj, ne cayáan 'unj ga nij so' a —taj Jesucristó, cachíin ni'yaj so' rihaan Diose a.

18

Nana nihánj taj xna'anj daj guun gaa quita'aa nij tanuu man Jesucristó a

¹ Gaa quisíj ca'mii Jesucristó nu' nana vaa danj, gaa ne cavii so' ga nij sí tucu'yón se-nana so', ne ca'anj nij so' rej xcō chráá cu'naj Cedrón, ne cuchi' nij so' 'o naa chruun, ne catúj taran' nij so' a. ² Ne sí cu'naj Judas sí tacuachén man Jesucristó rihaan nij sí taj ri'yunj man Jesucristó me se aj quene'en so' rej yo' a. 'O se aj guun que'ee ndo'o cunuu chre' Jesucristó rej yo' ga nij sí tucu'yón se-nana so' a. ³ Dan me se nicaj Judas man nij tanuu do', man nij se-mozó nij xrej atā suun nocōo doj do', man nij se-mozó nij sí fariseo do', ca'anj so' rej yo' a. Ne nicaj nij so' aga' ya'an do', ca' acaa do', neê espadá do', nicaj nij so' vaj nij so' rej yanj Jesucristó ga nij sí tucu'yón se-nana so' a. ⁴ Dan me se quene'en Jesucristó nu' se vaa quiran' so', tzaj ne curihanj so', ne cataj so' rihaan nij so' a:

—Me sí nano' soj ga —taj so', xná'anj so' man nij so' a.

⁵ Gaa ne cataj nij so' rihaan so' a:

—Nano' núj man Jesús sí cavii chuman' Nazaret a —taj nij so' rihaan Jesucristó a.

—'Unj me so' ei —taj Jesucristó rihaan nij so' a.

Dan me se canicun' sí cu'naj Judas ga nij so' 'na' so' ga nij so' a. ⁶ Dan me se gaa cataj Jesucristó se vaa ma'an so' me sí nano' nij so', gaa ne nu' naxuun nij so' man nij so', ne naxru' nij so' rihaan yo'óo a. ⁷ Gaa ne xná'anj uún Jesucristó man nij so', cataj so':

—Me sí nano' soj ga —taj uún Jesucristó a.

Gaa ne cataj uún nij so':

—Jesús sí cavii chuman' Nazaret a —taj uún nij so' a.

⁸ Gaa ne cataj Jesucristó:

—Aj cataj xna'anj 'unj rihaan soj se vaa 'unj me so' ei. Sese 'unj me sí nano' soj, ne ca'ne' rá soj ca'anj nij sí nihánj á —taj Jesucristó rihaan nij so' a.

⁹ D̄anj ca'mii so' rihaan nij tanuu che' é rej ca'vee quisij ya nu' nana ca'mii so' rihaan Diose se vaa ne ca'anj ni'ya a 'ó nij síi rqué Diose man so' a.

¹⁰ Dan me se nicaj síi cu'naj Simón Pedró neê espadá, ne quirii so' taneê so', ne go' so' raá se-mozó xrej at̄a suun noc̄o doj, ne veé d̄anj güéj nuj xréé so' rej nuva' so', qui'yaj Pedró a. Ne mozó yo' ro', cu'naj Malco a. ¹¹ Dan me se cataj Jesucristó rihaan Pedró a:

—Na'nej sa' so' taneê so' rque nuj á. Dan me se ase vaa 'o tazá nuu na vinó rqué Réj Diose manj co'oj ro', d̄anj vaa sayuun nihánj rihanj, ne me che' é na'vej rá so' co'oj man yo' ga —taj Jesucristó, xná'anj so' man Pedró a.

Nana nihánj taj xna'anj se vaa ca'anj nicaj nii man Jesucristó rihaan síi cu'naj Anás a

¹² Dan me se quita'aa nij tanuu do', síi uun chij rihaan nij tanuu do', nij se-mozó nij síi uun chij rihaan nij yuvii israelitá do', man Jesucristó, ne numíj nij so' ra'a so', ¹³ ne asino yaan ca'anj nicaj nij so' man so' rihaan síi cu'naj Anás a. Dan me se síi cu'naj Anás yo' me se rej chej síi cu'naj Caifás me so', ne Caifás me síi guun xrej at̄a suun noc̄o doj yo' yo' a. ¹⁴ Ma'an síi cu'naj Caifás me síi narqué chrej rihaan nij síi uun chij rihaan nij yuvii israelitá se vaa vaa che' é cavi' 'o snó'o che' é cunudanj nij yuvii israelitá yo' a.

Nana nihánj taj xna'anj se vaa cataj síi cu'naj Pedró se vaa nuveé sij noc̄o' man Jesucristó me so' a

¹⁵ Dan me se canoco' Simón Pedró do', yo'ó síi tucu'yón se-nana Jesucristó do', rej xc̄o Jesucristó a. Ne yo'ó so' me se sij ne'en xrej at̄a suun noc̄o doj man me so', ne catúj so' ga Jesucristó ta'yaa tucúa xrej at̄a suun noc̄o doj a. ¹⁶ Ne Pedró me se quináj so' xe' rej nichrun' ta'yaa a. Che' é dan curihanj yo'ó síi tucu'yón se-nana Jesucristó yo', ne ca'mii

so' ga chana tumé ta'yaa, ne catúj Pedró uún, qui'yaj so' a.
¹⁷ Dan me se xná'anj chana tumé ta'yaa man Pedró, cataj no':

—Ne nuvé so' me síí tucu'yón se-nana síí nihánj na'
 —taj no', xná'anj no' man Pedró a.

Ne cataj so':

—Taj ma' —taj Pedró yo' a.

¹⁸ Ne nicun' nij mozó do', nij tanuu do', rej nachráj nii ya'an a. 'O se acoj tiha' rej man nij so', ne cunuu guun nij so' ya'an a. Ne ca'anj Pedró uún cunuu guun ma'an so' ya'an a.

Nana nihánj taj xna'anj daj ca'mii Jesucristó rihaan síí cu'naj Anás a

¹⁹ Dan me se síí cu'naj Anás síí cayáan xrej ata suun nocoo doj asij rque doj ro', xná'anj so' man Jesucristó che'é nij síí tucu'yón se-nana Jesucristó do', che'é ma'an nana tucu'yón Jesucristó man nij so' do' a. ²⁰ Gaa ne cataj Jesucristó rihaan nij so' a:

—'Unj ro', ca'mii ranga' rihaan cunudanj nij yuvii a. Nu' güii tucu'yón 'unj se-nanaj rá ve' tucu'yón ní' se-tucuanj Moisés do', rá nuvíí nocoo do', ne yo' me rej nuu chre' taran' soj sij uun chij rihaan nij yuvii israelitá a. Ne taj vaj nana ne ca'mii yuve 'unj ma'. ²¹ Me che'é xná'anj soj manj ga. Xna'anj soj man nij yuvii cuno nana ca'mij á. Veé nij so' ne'en ya daj ca'mii 'unj nanj ei —taj Jesucristó rihaan síí cu'naj Anás yo' a.

²² Quisíj ca'mii Jesucristó danj, gaa ne coxro yo'o mozó nicun' rej yo' xruu Jesucristó, ne cataj so':

—Me che'é ca'mii so' danj rihaan xrej ata suun nocoo doj —taj so', guun yuvaa so' man Jesucristó a.

²³ Gaa ne cataj Jesucristó rihaan so' a:

—Sese ca'mii chi'ii 'unj, ne cataj so' me nana chi'ii ca'mij á. Tzaj ne sese ca'mii sa' 'unj, ne me che'é coxro so' manj ga —taj Jesucristó rihaan mozó coxro man so' a.

²⁴ Veé yo', gaa ne ca'née sí cu'naj Anás man Jesucristó rihaan sí cu'naj Caifás sí cayáan xrej atá suun nocoo doj, ne veé 'o danj numii so' ca'anj so' a.

Nana nihánj taj xna'anj se vaa yavij cataj Pedró se vaa nuveé sij nocoo' man Jesucristó me so' ma'

²⁵ Dan me se nicun' Simón Pedró cunuu guun so' ya'an a. Gaa ne cataj 'o yuvii rihaan so':

—Nuveé yo'o sí nocoo' man so' mé so' na' —taj yuvii, xná'anj yuvii man so' a.

Ne cataj Pedró:

—Taj ma' —taj so' a.

²⁶ Gaa ne xná'anj yo'o se-mozó xrej atá suun nocoo doj man so', ne tuvi' sí güéj xrée qui'yaj Pedró me so', ne cataj so':

—Nuveé so' me sí vaj ga Jesucristó rque naa chruun quene'enj na' —taj so', xná'anj so' man Pedró a.

²⁷ Gaa ne cataj uún Pedró se vaa nuveé tuvi' Jesucristó me so' a. Ne nu' ca'mii so' danj, gaa ne nu' caguáj to'loo a.

Nana nihánj taj xna'anj che'é nana ca'mii Jesucristó ga sí cu'naj Pilato a

²⁸ Dan me se nicaj nij mozó do', nij tanuu do', man Jesucristó curihanj nij so' rej ne sí cu'naj Caifás, ne ca'anj nij so' tucua suun a. Na'yaan uxrá me yo' a. Ne ne catuu nij sí israelitá rá tucua suun a ma'. 'O se me rá nij so' cha nij so' cha'anj pascua, ne che'é dan ne ca'vej rá nij so' guun chi'ii nij so' rihaan Diose qui'yaj tucua suun yo' a. ²⁹ Che'é dan curihanj ma'an sí cu'naj Pilato rej nicun' nij so' a. Ne xná'anj sí cu'naj Pilato man nij so', cataj so':

—Me cacun' cuta' soj xráá snó'o nihánj, rá soj ga —taj so' rihaan nij yuvij ca'na' ga Jesucristó a.

³⁰ Gaa ne cataj nij so' rihaan síí cu'naj Pilato a:

—Sese nuveé sij 'yaj chi'ij me síí nihánj, ne ne tacuachén núj man so' ndaa rihaan so' tzaj ma' —taj nij yuvij rihaan síí cu'naj Pilato a.

³¹ Che'é dan cataj síí cu'naj Pilato rihaan nij so' a:

—Nica'j soj man so', ne ca'ne' soj cacun' che'é so', qui'yaj soj ndaa vaa tucuáán nocó' ma'an soj á —taj síí cu'naj Pilato rihaan nij so' a.

—Tzaj ne no xcúún so' cavi' so', rá núj, tzaj ne na'vej rá soj sij cavii chuman' Romá ticavi' núj man a 'ó yuvij a ma' —taj nij so' rihaan Pilato a.

³² Che'é se ca'mii nij so' danj ro', che'é dan quisij ya nu' se-nana Jesucristó nana a'mii che'é daj qui'yaj nii man so' ticavi' nii man so' a. 'O se orún' nij yuvij man chuman' Romá cachrón rihaan rcutze man yuvij tumé cacun' a.

³³ Dan me se catúj uún síí cu'naj Pilato tucuá suun, ne canacúún so' ca'na' Jesucristó, ne xná'anj so' man Jesucristó, cataj so':

—Ma'an so' me síí nica'j suun rey uun chij rihaan nij yuvij israelitá na' —taj síí cu'naj Pilato rihaan Jesucristó a.

³⁴ Gaa ne xná'anj Jesucristó man so', cataj Jesucristó:

—Ma'an so' cavii raá nana vaa danj ca'mii so' na'. Ase yo'ó yuvij cataj xna'anj rihaan so' che'ej xa' —taj Jesucristó, xná'anj so' man síí cu'naj Pilato a.

³⁵ Gaa ne xná'anj síí cu'naj Pilato man so', cataj so':

—Sij israelitá mé 'unj, rá so' na'. Ne'én 'unj se-tucuanj soj, rá so' na'. 'O se nij tuví' so' do', ma'an nij xrej ata suun nocoo doj do', tacuachén mán so' rihanj á. Me cacun' tumé so' ga —taj síí cu'naj Pilato, xná'anj so' man Jesucristó a.

³⁶ Gaa ne cataj Jesucristó:

—'O se nuveé rihaan chumii nihánj me rej uun chij 'unj ma'. Sese rihaan chumii nihánj me rej uun chij 'unj, ne gaa tanuu 'yaj suun rihanj, ne cavii nij tanuu, cunu' nij tanuu, che'é rej se cata'aa nij síi uun chij rihaan nij yuvii israelitá manj tzaj adonj. Tzaj ne nuveé rihaan chumii nihánj me rej guun chij 'unj ma' —taj Jesucristó a.

³⁷ Gaa ne xná'anj síi cu'naj Pilato man so', cataj so':

—Che'é dan síi nicaj suun rey mé so' na'. Ya na' —taj Pilato, xná'anj so' man Jesucristó a.

Gaa ne cataj Jesucristó rihaan so' a:

—Ya uxrá vaa nana ca'mii ma'án so' se vaa sij nicaj suun rey mej á. Ne nihánj me cataj xna'anj 'unj rihaan so' me che'é ca'ngaa 'unj ne me che'é ca'ná' 'unj rihaan chumii nihánj ei. Dan me se ca'ná' 'unj cataj xna'anj 'unj nana ya rihaan yuvii a. Ne cunudanj nij síi ya ro', uno nana ya a'mij adonj —taj Jesucristó rihaan Pilato a.

³⁸ Ne cataj Pilato rihaan so':

—A me nana cu'naj nana ya ga —taj Pilato, xná'anj Pilato man Jesucristó a.

Nana nihánj taj xna'anj daj qui'yaj síi cu'naj Pilato gaa ca'ne' so' cacun' che'é Jesucristó a

Ne gaa quisij ca'mii síi cu'naj Pilato nana vaa danj ga Jesucristó, ne curihanj uún so' rej nicun' nij síi uun chij rihaan nij yuvii israelitá, ne cataj so' rihaan nij so' a:

—Taj vaj a doj cacun' tumé so' nari' 'unj a ma'. ³⁹ Tzaj ne vaa yo'o tucuáán nocó' ní' se vaa rii 'unj 'o tuvi' soj síi 'nij taga' 'o 'o cha'anj pascuá a. Ne me rá soj quirii 'unj man ma'an síi nihánj síi nicaj suun rey uun chij rihaan soj sij israelitá na' —taj síi cu'naj Pilato, xná'anj so' man nij yuvii a.

⁴⁰ Che'é dan caguáj uún nij yuvii, cataj nij so':

—Se quirií so' man síí nihánj a ma'. Tanánj síí cu'naj Barrabás quirií so' ei —taj nij yuvii, caguáj nij yuvii a.

Ne síí cu'naj Barrabás me se sij guun rá cunu' ga gobiernó me so' a.

19

¹ Dan me se nicaj síí cu'naj Pilato man Jesucristó, ne go' nij tanuu cuartá xráá so', qui'yaj Pilato yo' a. ² Ne qui'yaj nij tanuu cachriin tanj, ne cuta' nij so' raá Jesucristó, ne na'néé nij so' yatzíj tintá sa' ndo'o man Jesucristó a. ³ Gaa ne cuchi' ndo'o nij so' rihaan Jesucristó, ne cataj nij so':

—Veé síí nicaj suun rey uun chij rihaan nij yuvii israelitá mé so' á —taj nij so', ca'mii tico nij so', ne coxro nij so' xruu Jesucristó a.

⁴ Gaa ne curihanj uún síí cu'naj Pilato xe', ne cataj so' rihaan nij yuvii a:

—Ni'yaj soj ei. Curihanj uún so' rihaan soj, qui'yáj, che'é rej xcaj soj cuentá se vaa taj vaj cacun' tumé so' narí' 'unj a man chuguanj —taj Pilato rihaan nij yuvii a.

⁵ Gaa ne curihanj Jesucristó xe', ne 'nij raá so' cachriin tanj, ne nuu so' yatzíj tintá sa' yo' a. Ne cataj Pilato rihaan nij yuvii a:

—Ni'yaj soj man snó'o nihánj vij —taj Pilato rihaan nij yuvii a.

⁶ Dan me se gaa quene'en nij xrej atá suun nocoo doj do', nij se-mozó nij so' do', man Jesucristó, ne caguáj nij so', cataj nij so':

—Cavi' so' rihaan rcutze, qui'yáá so' ei —taj nij so', caguáj nij so' a.

Gaa ne cataj Pilato rihaan nij so' a:

—Nícaj ma'an soj man so' cachron soj man so' rihaan rcutze, sese me rá soj ei. Xa' 'unj, tzaj ne taj vaj a doj cacun' tumé so' narí' 'unj a ma' —taj Pilato rihaan nij so' a.

⁷ Gaa ne cataj nij sí uun chij rihaan nij yuvij israelitá no sí cu'naj Pilato:

—Vaa tucuáán nocō' núj, ne tucuáán nocō' núj taj se vaa no xcúún so' caví' so', che'é rej cataj so' se vaa ta'nij Diose me so' adonj —taj nij so' rihaan Pilato a.

⁸ Dan me se gaa cuno sí cu'naj Pilato nana vaa danj, gaa ne doj a chucu'vi' so', ⁹ gaa ne catúj uún so' tucuá suun, ne xná'anj so' man Jesucristó, cataj so':

—Me rej cavii so' ga —taj so', xná'anj so' man Jesucristó a.

Tzaj ne ne ca'mii Jesucristó a 'ó nana rihaan so' a.
¹⁰ Che'é dan cataj Pilato rihaan so' a:

—Me che'é ne a'mii so' ga. Ne ne'én so' sese 'unj ro', me sí no xcúún quirii mán so' taga', ne vej nó xcúún qui'yaj cachron nij tanuu mán so' rihaan rcutzé á. Me che'é ne acaj so' cuentá ga —taj Pilato, xná'anj so' man Jesucristó a.

¹¹ Gaa ne cataj Jesucristó rihaan so' a:

—Sese nuveé Diose me sí cune' mán so' catá so' suun nihánj, ne ne guun nucuáá so' qui'yáá so' a doj rasuun asuun tzaj ma'. Che'é dan sí tacuachén manj rihaan so' me sí tumé doj cacun' rihaan so' adonj —taj Jesucristó rihaan Pilato yo' a.

¹² Quisij cuno Pilato nana dan, gaa ne nano' so' daj qui'yaj so', gaa ne ca'vee tinanii so' man Jesucristó a. Tzaj ne doj a caguáj nij sí uun chij rihaan nij yuvij israelitá, cataj nij so':

—Sese ca'anj uun sí nihánj, qui'yáá so', ne nuveé tuvi' sí nicaj suun cu'naj César mé so' ma'. 'O se sí nihánj me se sij me rá guun sí nicaj suun rey me so', ne dan me se ca'nee so' suun man sí cu'naj César, rá so', ne sij taj ri'yunj man sí cu'naj César me so' adonj —taj nij so', caguáj nij so' a.

¹³ Dan me se gaa cuno Pilato nana vaa danj, gaa ne ca'anj nicaj so' man Jesucristó xe', ne ca'anj cayáan so' rihaan xruún so' chruun xlá rej ca'ne' so' cacun' che'é yuvij a. Ne rej ne chruun xlá yo' ro', me rej cu'naj Litóstratos xna'anj griego, ne Gabata cu'naj rej yo' xna'anj hebreo a. ¹⁴ Dan me se güii 'yaj chuvii nii che'é cha'anj pascuá me yo', ne rej caxuj me yo' a. Ne cataj Pilato rihaan nij síi uun chij rihaan nij yuvij israelitá a:

—Ni'yaj soj ei. Nihánj me síi nicaj suun rey uun chij rihaan soj chuguanj —taj so' rihaan nij yuvij a.

¹⁵ Gaa ne caguáj nij yuvij, cataj nij so':

—Nijcaj so' man so', ne ca'anj tanuu cachron nij tanuu man so' rihaan rcutze, qui'yaá so' cuaj ei —taj nij so' rihaan Pilato a.

Ne xna'anj Pilato man nij so', cataj so':

—Ma'an síi nicaj suun rey uun chij rihaan soj cachronj rihaan rcutze, rá soj a na' —taj so', xna'anj so' man nij so' a.

—Taj vaj 'ó rey ma'. Orún' síi cu'naj César me síi uun chij rihaan núj ei —taj nij xrej atá suun nocoo doj a.

¹⁶ Gaa ne tacuachén Pilato man Jesucristó rihaan nij so' cachron nij so' man so' rihaan rcutze a.

Nana nihánj taj xna'anj daj guun gaa cachrón nij tanuu man Jesucristó rihaan rcutze a

Dan me se ca'anj nicaj nij so' man Jesucristó, ¹⁷ ne ma'an so' cata rcutze, ne cavii so' ca'anj so' rej cu'naj tacaan cúu yave, ne rej yo' ro', cu'naj Gólgota xna'anj hebreo a. ¹⁸ Ne gaa cuchi' nij so' rej yo', gaa ne cachrón nij tanuu man so' rihaan rcutze, ne yavij roj so' cachrón uún nij tanuu rihaan yavij rcutze uún, ne yo'ó so' ro', nicun' rej nuva' Jesucristó, ne yo'ó so' ro', nicun' rej nichruun Jesucristó, ne tanuu nicun' ma'an Jesucristó a. ¹⁹ Ne ca'ne' síi cu'naj Pilato suun, se vaa cano letrá rihaan 'o rcuchra',

ne cano rcuchra' yo' raꝝ rcutze, ne letrá yo' taj xna'anj me che'é cavi' Jesucristó a. Ne nihánj me se taj letrá no rihaan rcuchra' yo', se vaa “Síí nihánj me Jesucristó síí cavii chuman' Nazaret, ne síí nicaj suun rey me so', uun chij so' rihaan nij yuvii israelitá”, taj letrá yo' a. ²⁰ Dan me se nayaa que'ee nij síí israelitá nana yo' a. 'O se nichrun' naj rej cachrón nii man Jesucristó rihaan rcutze ga ma'an chuman' Jerusalén yo' a. Ne cachrón nii nana yo' xna'ánj hebreo do', xna'ánj latín do', xna'ánj griego do' a.

²¹ Che'é dan nij xrej atꝝ suun nocoo doj che'é nij yuvii israelitá ro', cataj nij ro' rihaan síí cu'naj Pilato a:

—Se guun cano letrá se vaa síí nicaj suun rey uun chij rihaan núj sij israelitá me so' ma'. Maan se cataj letrá se vaa ma'an so' cataj se vaa síí nicaj suun rey uun chij rihaan nij yuvii israelitá me so' á —taj nij so' rihaan síí cu'naj Pilato a.

²² —Aj quisij cachrón 'unj nana cachronj nanj á —taj Pilato rihaan nij so' a.

²³ Dan me se gaa quisij cachrón nij tanuu man Jesucristó rihaan rcutze, ne nicaj nij so' sagan' Jesucristó, ne cuxra' ta'aj nij so' sagan' Jesucristó, ne nicaj 'o 'o tanuu ta'aj sagan' Jesucristó yo' a. Ne vaa se-cotoó Jesucristó uún a. Ne xa' se-cotoó so', tzaj ne taj rej nuva nii se-cotoó so' ma'. Maan se orún' yatzij me yo' gaa canánj nii man yo' a.

²⁴ Che'é dan cataj nij tanuu rihaan tuvi' nij so' a:

—Se cuxra' ta'aj ní' man cotoó nihánj ma'. Maan se tico tixaj ní' se-suerté ní' che'é nihánj, ne quene'en ní' me síí nacaj man cotoó yo' ei —taj nij so' a.

Danj qui'yaj nij so', ne quisij ya nu' nana nihánj nana no rihaan danj Diose a: “Cuxra' ta'aj nii sagan' 'unj, ne tico tixaj nii che'é se-cotoó 'unj a”, taj danj Diose a. Dan me se nij tanuu me nij síí qui'yaj danj adonj.

²⁵ Ne nichrun' nicun' nii Jesucristó dɔ', chu'vij nii so' dɔ', chana cu'naj Mariá nica sí cu'naj Cleofas dɔ', chana cu'naj Mariá Magdalena dɔ', rihaan rcutze nɔ Jesucristó a. ²⁶ Dan me se quene'en Jesucristó man nii so' dɔ', man sí tucu'yón se-nana so' sí 'ee rá so' man dɔ', se vaa nicun' rcua'aan roj so' rihaan so', ne cataj so' rihaan nii so':

—Sí nihánj guun ta'ní sɔ', nahiin —taj Jesucristó no nii so' a.

²⁷ Gaa ne cataj so' rihaan sí tucu'yón se-nana so' yo' a:

—Chana nihánj guun ní sɔ' á —taj so' rihaan sí tucu'yón se-nana so' yo' a.

Ne maan orá dan guun nij sí tucu'yón se-nana Jesucristó yo' man nii Jesucristó, ne ca'anj nicaj so' man no' ve' tucúa ma'an so' a.

Nana nihánj taj xna'anj daj guun gaa cavi' Jesucristó a

²⁸ Quisíj qui'yaj nij so' danj, gaa ne quene'en Jesucristó se vaa aj quisíj ya nu' se vaa taj danj Diose che'é so' a. Che'é dan cataj so':

—Nacoó 'unj na nanj á —taj so' a.

²⁹ Yanj 'o xruj nuu na vinó yuu rihaan yo'óó, ne nicaj nij so' 'o yataan esponja, ne tucua'anj nij so' yataan rque na vinó yuu yo', ne cuta' nij so' raa 'o coj hisopo, ne cachrón nij so' yataan yo' tu'va Jesucristó a. ³⁰ Ne gaa quisíj co'o Jesucristó na vinó yuu nuu rque yataan yo', ne cataj so':

—Veé danj navij suun, qui'yáj a —taj so', ne ni'naa raa so', ne ca'ne' rá so', ne cavi' so' a.

Nana nihánj taj xna'anj se vaa cho'oj 'o tanuu chruun lanzá x'núú Jesucristó a

³¹ Dan me se güii 'yaj chuvij nij sí israelitá cha nij so' cha'anj pascuá me yo', ne güii guee ndo'o me cuetan' a'yuj, 'yaj nij yuvij israelitá, ne ne ca'vej rá nij yuvij yo' canoco' xnangá rihaan rcutze güii guee yo' a. Che'é dan me cachín ni'yaj nij sí uun chij rihaan nij yuvij israelitá

rihaan sí cu'naj Pilato se vaa ca'ne' so' suun tucuachran' nii tacóo nij sí noco' rihaan rcutzē yo' che'é rej ra'yanj doj cavi' nij so', gaa ne quirii yanij nii man nij sí cavi' yo' a. ³² Qui'yaj Pilato ndaa vaa cachín ni'yaj nij so' rihaan so', ne ca'anj nij tanuu, ne asino tucuachran' nij tanuu tacóo yo'o sí noco' rej x'nuj Jesucristó, gaa ne tucuachran' uún nij tanuu tacóo sí noco' níchrej x'núu Jesucristó uún a. ³³ Tzaj ne gaa cuchi' nij so' rej noco' ma'an Jesucristó, gaa ne xcaj nij so' cuentá se vaa aj cavi' so', ne che'é dan ne tucuachran' nij so' tacóo so' ma'. ³⁴ Tzaj ne yo'o tuvi' nij tanuu nicaj xrúun so' chruun taj aga' sihaa raa, ne cho'oj so' x'núu Jesucristó, ne nu' qui'yaj so' danj, ne nu' cavii ndo'o ton do', na do', rej catúj aga' sihaa yo' a.

³⁵ Ne sí taj xna'anj nana nihánj me se sij quene'en nu' se vaa guun me so', ne ya vaa se-nana so', ne ne'en so' se vaa ya a'mii so', ne taj xna'anj so' nu' nana nihánj che'é rej cuchuman rá soj sij nayaá nana nihánj ni'yaj soj Jesucristó a.

³⁶ 'O se guun nu' nihánj che'é rej quisij ya nu' nana nihánj nana no rihaan danj Diose, se vaa taj yo': “Se cachran' a 'ó cúu man so' ma'”, taj nana no rihaan danj Diose a. ³⁷ Ne yo'ó nana ro', taj: “Ni'yaj nij so' man sí cho'oj ma'an nij so' aga' man a”, taj yo'ó nana no uún rihaan danj Diose a.

Nana nihánj taj xna'anj daj guun gaa cachin' nii man Jesucristó rque yu'uj yuvej a

³⁸ Quisij qui'yaj nij tanuu danj, gaa ne cachín ni'yaj sí cu'naj José sí cavii chuman' Arimatea rihaan sí cu'naj Pilato se vaa ca'vej rá sí cu'naj Pilato quirii yanij so' man Jesucristó a. Ne xa' sí cu'naj José yo', tzaj ne sij tucu'yón se-nana Jesucristó me so', tzaj ne maan se noco' yuve so' man Jesucristó, che'é se kuchu'vi' so' ni'yaj so' man nij sí uun chij rihaan nij yuvií israelitá a. Dan me se ca'vej rá

síi cu'naj Pilato, ne che'é dan quirii yaníj síi cu'naj José man Jesucristó a. ³⁹ Ne vaa síi cu'naj Nicodemo uún, ne sij cuhi' rihaan Jesucristó rej nii asij rque doj me so', ne ca'anj so' ga síi cu'naj José yo', ne cata so' ico chi' kiló taj doj squíi cu'naj mirra nachej ga se cu'naj áloe a. ⁴⁰ Dan me se tananij roj so' man Jesucristó, ne nucutáj roj so' mantá sa' man nu' nee man Jesucristó, ne caraa roj so' mirra do', áloe do', rque mantá yo' a. Dan me se tucuaán noco' nij yuvií israelitá gaa achin' nij so' man nij síi cavi' qui'yaj roj so' a.

⁴¹ Dan me se nichrun' rej cachrón nii man Jesucristó rihaan rcutze ro', naj 'o naa chruun, ne rque naa yo' ro', táa yu'uj rque yujej rej achin' nii xngá a. Tzaj ne yu'uj naca me yo', ne a 'ó xngá ne cachin' nii rque yu'uj yo' ma'. ⁴² Dan me se güii 'yaj chuvii nij síi israelitá cha nij so' cha'anj pascuá me yo', ne nichrun' naj rej taj yu'uj yo' ga rej nicun' rcutze yo', ne che'é dan cachin' roj so' man Jesucristó rque yu'uj yo' a.

20

Nana nihánj taj xna'anj daj guun gaa quisíj cunuu i'ng' uún Jesucristó a

¹ Dan me se taxrej cotungó vaa rmi' doj, ne ca'anj chana cu'naj Mariá Magdalena rej taj yu'uj rque yujej yo', ne quene'en no' se vaa taj yaníj yujej aráán rihaan yu'uj yo' a. ² Che'é dan cunanj no', ne cuhi' no' rihaan síi cu'naj Simón Pedró do', rihaan yo'ó síi tucu'yón se-nana Jesucristó síi 'ee rá Jesucristó man do' a. Ne cataj no' rihaan roj so':

—Quirii nii man síi 'nij ra'a man ní' rque yu'uj nanj á. Ne ne me rej ca'anj nicaj nii man so' a ma' —taj no' rihaan roj so' a.

³ Che'é dan cavii síi cu'naj Pedró ga yo'ó síi tucu'yón se-nana Jesucristó yo', ne ca'anj roj so' rej taj yu'uj yo',
⁴ ne cunanj roj so', ne ra'yanj doj cunanj yo'ó so' rihaan síi cu'naj Pedró, ne so' me síi cuchi' asino yaan doj tu'va yu'uj yo' a. ⁵ Gaa ne ni'yaj so' rque yu'uj yo', ne quene'en so' rej naj nij yatzíj, tzaj ne ne catuu so' ma'. ⁶ Dan me se cuchi' síi cu'naj Pedró síi noco' xcó so', gaa ne catúj ma'an Pedró rque yu'uj yo', ne quene'en so' rej naj nij yatzíj, ⁷ ne quene'en so' vitó aráán raā Jesucristó, tzaj ne nuvi' yo' naj rcua'aan ga yo'ó nij yatzíj a ma'. Tananj rej yaníj quinaj orún' yo', ne nacu'lu' yo' a. ⁸ Dan me se catúj uún yo'ó síi tucu'yón se-nana Jesucristó síi cuchi' asino yaan, ne quene'en so' nij yatzíj yo', gaa ne cuchumán rá so' se-nana chana cu'naj Mariá Magdalena yo' a. ⁹ 'Q se ataa nari' roj so' nana no rihaan danj Diose se vaa cavi' Jesucristó gaa ne cunu i'na' uún so' a. ¹⁰ Dan me se cavii uún roj síi tucu'yón se-nana Jesucristó yo', quinan' roj so' a.

Nana nihánj taj xna'anj se vaa quene'en chana cu'naj Mariá Magdalena man Jesucristó a

¹¹ Ne canicun' chana cu'naj Mariá nichrun' tu'va yu'uj yo', ne ta'vee ndo'o no' a. ¹² Ne quene'en no' vj se-mozó Diose nuu yatzíj catzii, ne ne roj so' rej cachin' nii man Jesucristó a. Yo'ó so' ne rej raā Jesucristó, ne yo'ó so' ne rej tacoj Jesucristó a. ¹³ Gaa ne xná'anj roj so' man chana cu'naj Mariá, cataj roj so':

—Me che'é ta'veé so', ga man nocoj —taj roj so' no' a.

—Ta'veé 'unj che'é se quirii nii man cúu man síi 'nij ra'a manj, ne ne me rej ca'anj nicaj nii man so' a ma' —taj no' rihaan roj so' a.

¹⁴ Síj ca'mii no' danj, gaa ne canicaj no' rej xcó no', ne quene'en no' man Jesucristó, nicun' so' rihaan no' a. Tzaj

ne ne cunuu yaan no' man Jesucristó a. ¹⁵ Gaa ne xna'anj Jesucristó man no', cataj so':

—Me che'é ta'veé so', ga man nocoj. Me síí nanó' so' ga —taj Jesucristó no no' a.

Dan me se guun rá no' se vaa sij tumé naa naj yo' me síí ca'mii ga no', rá no', ne che'é dan cataj no':

—Sese quirii yaníj so' man so', ne cataj xna'anj so' rihanj me rej ca'anj nicaj so' man so', ne nicaj 'unj man so' ca'anj 'unj á —taj no' rihaan síí nicun' rihaan no' a.

¹⁶ Gaa ne cataj Jesucristó:

—Mariá —taj so' a.

Canicaj no', cataj no':

—Raboni —taj no' rihaan so' xna'anj hebreo, ne dan me se “maestró” me se taj nana ca'mii no' rihaan so' a.

¹⁷ Gaa ne cataj Jesucristó rihaan no' a:

—Ca'ne' rá so', se catz'í so' doj manj ma'. 'O se ataa cavii uún 'unj quínán' 'unj rihaan Réj Diose, ne me rá 'unj ca'anj so' rihaan nij tinúú 'unj ne cataj xna'anj so' rihaan nij so' se vaa cavii 'unj quínán' 'unj rihaan Réj, ne so' me se Rej soj me uún so', ne Diose síí noco' 'unj me so', ne Diose síí noco' soj me uún so' adonj —taj Jesucristó rihaan chana cu'naj Mariá a.

¹⁸ Dan me se ca'anj chana cu'naj Mariá Magdalena, ne nata' no' rihaan nij síí tucu'yón se-nana Jesucristó se vaa quene'en no' man síí 'nij ra'a man ní', ne nata' no' nij nana cataj Jesucristó rihaan no' a.

Nana nihánj taj xna'anj daj guun gaa cuchi' Jesucristó rihaan nij síí tucu'yón se-nana so' a

¹⁹ Dan me se rej ti'nuu ma'an güii cotungó yo' me se caráán nij síí tucu'yón se-nana Jesucristó ta'yaa rihaan ve' man nij so', che'é se cuchu'vi' nij so' ni'yaj nij so' nij síí uun chij rihaan nij yuvii israelitá a. Gaa ne ca'na' Jesucristó, ne canicun' so' tanuu rej man nij so', ne cataj so':

—Gaa dínj nimán soj ei —taj Jesucristó rihaan nij so' a.

²⁰ Quisíj ca'mii so' danj, gaa ne tihaan so' ra'a so' tihaan so' x'núú so' tihaan so' rihaan nij so' a. Gaa quene'en nij so' nu' yo', gaa ne guun niha' uxrá rá nij síi tucu'yón se-nana so' ni'yaj nij so' man síi 'nij ra'a man ní' a.

²¹ Dan me se yuún ca'mii Jesucristó rihaan nij so', cataj so':

—Gaa dínj nimán soj ei. Ase vaa ca'néé Réj manj ro', danj gaa ca'nej 'unj man soj nu' rihaan chumii nihánj adonj —taj Jesucristó rihaan nij so' a.

²² Quisíj ca'mii Jesucristó danj, gaa ne ca'yánj Jesucristó rihaan nij so', ne cataj so':

—Nícaj soj Nimán Diose nihánj á. ²³ Ne sese cataj soj se vaa navij cacun' tumé me ma'an yuvij, ne quinavij nu' cacun' tumé so' a. Ne sese cataj soj se vaa se quinavij cacun' tumé me ma'an yuvij, ne veé danj gaa quitaj nu' cacun' tumé so' xráá so' nu' cavii nu' ca'anj uún a —taj Jesucristó rihaan nij síi tucu'yón se-nana so' a.

Nana nihánj taj xna'anj daj guun gaa quene'en síi cu'naj Tomás man Jesucristó a

²⁴ Dan me se yo'q tuvi' chuvij nij síi tucu'yón se-nana Jesucristó me síi cu'naj Tomás, ne yo'ó se-chuvij so' me Dídimó a. Ne nuvi' so' ne ga yo'ó nij so' gaa cuchi' Jesucristó rihaan yo'ó nij so' ma'. ²⁵ Che'é dan cataj xna'anj yo'ó nij síi tucu'yón se-nana Jesucristó rihaan Tomás se vaa quene'en nij so' man síi 'nij ra'a man ní' a. Tzaj ne cataj Tomás rihaan nij so' a:

—Sese se quene'en ma'anj rej catúj caquíí ra'a so', ne sese se cutaj ra'aj rej catúj caquíí ra'a so' do', sese se cutaj ra'aj rej quiran' chi'ii x'núú so' do', ne daj chihaa míj se cuchumán raj se vaa cunuu i'na' uún so' ma' —taj síi cu'naj Tomás rihaan nij so' a.

²⁶ Dan me se cachén tuj güii, ne mán uún nij sí tucu'yón se-nana Jesucristó, ne sí cu'naj Tomás ga nij so', ne dan me se raan nij ta'yaa, tzaj ne taj ni'yón, ne naruvi Jesucristó tanu yan man nij so' a. Ne cataj so':

—Gaa dínj nimán soj ei —taj so' rihaan nij so' a.

²⁷ Gaa ne cataj so' rihaan sí cu'naj Tomás a:

—Tucua'anj so' ra'á so' nihánj, gaa ne xcaj so' cuentá daj vaa ra'aj, ne cuta' so' ra'á so' x'núú 'unj nihánj rej catúj chruun lanzá, gaa ne guun ya ya rá so' se vaa cunuu i'na' uún 'unj á. Cuchuman rá so', ni'yaj so' manj á —taj so' rihaan sí cu'naj Tomás a.

²⁸ Gaa ne cataj sí cu'naj Tomás rihaan so' a:

—So' me sí 'nij ra'a manj, ne so' me Diose sí nocoj adonj —taj so' rihaan Jesucristó a.

²⁹ Gaa ne cataj Jesucristó rihaan so' a:

—Uun daj quene'en yá so' manj, gaa ne amán rá so' ni'yaj so' manj nanj á. Tzaj ne vaa che'é guun niha' rá nij sí ne quene'en manj ne amán rá ni'yaj manj ei. 'O se cavii sa' ya nij so' adonj —taj Jesucristó rihaan sí cu'naj Tomás a.

Nana nihánj taj xna'anj me che'é cachrón sí cu'naj Juan yanj nihánj a

³⁰ Dan me se vaa uxrá yo'ó nij suun sa' noco qui'yaj suun Jesucristó quene'en nij sí tucu'yón se-nana so', tzaj ne taj vaj nana che'é yo'ó nij suun sa' noco yo' nó rihaan yanj nihánj, ³¹ tzaj ne nō nana nihánj rihaan yanj nihánj che'é rej yo'ō cuchuman rá soj sij naya nana nihánj se vaa Jesucristó ro', me sí ca'née Diose tinanii man yuvii rihaan sayuun, ne ta'nij Diose me ya uún so' ei. Ne che'é se amán rá soj ni'yaj soj man so' ro', che'é dan gaa i'na' nimán soj rihaan Diose nu' cavii nu' ca'anj che'é ma'an Jesucristó chuguanj.

21

Nana nihánj taj xna'anj se vaa nari' tuvi' uún Jesucristó ga chij nij sí tucu'yón se-nana so' a

¹ Cachén doj, gaa ne cuchi' uún Jesucristó rihaan nij sí tucu'yón se-nana so' rej nuu na lacuaná cu'naj Tiberias a. Ne nihánj me se vaa qui'yaj so' a. ² Aj cunuu chre' sí cu'naj Simón Pedró do', sí cu'naj Tomás Dídimó do', Natanael sí cavii chuman' Caná chuman' naj estadó Galilea do', roj ta'ní sí cu'naj Zebedeo do', yavíj sí tucu'yón se-nana Jesucristó do' a. ³ Gaa ne cataj Simón Pedró rihaan yo'ó nij so' a:

—Ca'anj 'unj tiguíj 'unj nanj rque na quirij xcuaj, raj chuguanj —taj so' rihaan nij so' a.

—Ca'anj ní' chihá' —taj yo'ó nij so' rihaan Simón Pedró a.

Gaa ne cavii nij so' catúj nij so' rque rihoo chée rihaan na, ne nigan' qui'yaj suun nij so', tzaj ne a 'ó xcuaj ne quirí' nij so' a ma'.

⁴ Dan me se taxrej yo'ó güii me se nicun' Jesucristó tu'va na lacuaná yo' a. Tzaj ne ne quene'en nij sí tucu'yón se-nana so' se vaa ma'an so' me yo' a ma'. ⁵ Dan me se cataj Jesucristó rihaan nij so' a:

—Vaa doj se chá rihaan soj na' —taj Jesucristó, xna'anj so' man nij so' a.

Taj ma' —taj nij so' a.

⁶ Gaa ne cataj Jesucristó rihaan nij so' a:

—Tiguíj soj nanj rque na rej x'nuj rihoo rej nuva' rihoo, ne quirí' soj xcuaj ei —taj Jesucristó rihaan nij so' a.

Che'é dan tiguíj nij so' nanj ndaa vaa cataj Jesucristó, ne caraa nu' nanj, qui'yaj xcuaj, ne ne guun nucuaj nij so' cuxuun nij so' nanj a ma'. ⁷ Che'é dan ca'mii 'o sí tucu'yón se-nana Jesucristó sí 'ee rá Jesucristó man rihaan Pedró, cataj so':

—Síí 'nij ra'a man ní' me yo' ei —taj so' a.

Dan me se cuno Simón Pedró nana se vaa síí 'nij ra'a man ní' me yo', gaa ne che'é se aj quirii so' se-cotoó so', che'é dan nanuû ra'yanj so' se-cotoó so', gaa ne tagüéj so' man so' rihaan na yo' a.

⁸ Tzaj ne yo'ó nij so' ro', quináj rque rihoo yo', ne tiguúj nij so' chruun man rihoo yo', ne nicaj nij so' rihoo ca'anj nij so' ndaa tu'va na lacuaná yo', ne orún' cientó metró tiguúj ra'a nij so' man rihoo rque na, ne cuxuun nij so' nanj caraa xcuaj yo' rej tu'va na a. ⁹ Ne nu' cuchi' nij so' rihaan yo'óó, ne quene'en nij so' 'o ya'an nachráj Jesucristó, ne táá nee xcuaj do', rachrúún do', ruvaj yo' a. ¹⁰ Gaa ne cataj Jesucristó rihaan nij so' a:

—Nıcaj soj doj xcuaj quirii soj ca'na' soj ei —taj Jesucristó rihaan nij so' a.

¹¹ Che'é dan cavii Simón Pedró, ne cuxuun so' nanj yo' rihaan yo'óó a. Ne caraa 'o cientó táá yavıj chıhaa cha'nıj xcuaj rque nanj yo' a. Ne nda' se 'ee ndo'o nij xcuaj, tzaj ne ne sın' nanj ma'.

¹² Gaa ne cataj Jesucristó rihaan nij so' a:

—Cuva' soj, cha ruvá soj ei —taj so' rihaan nij so' a.

Ne a 'ó nij síí tucu'yón se-nana Jesucristó ne quisıj rá xna'anj man so' me síı me so' a. 'o se aj quene'en nij so' se vaa síı 'nij ra'a man ní' me yo' a. ¹³ Gaa ne ca'na' Jesucristó, ne nicaj so' rachrúún do', nee xcuaj do', rque so' man nij so' a.

¹⁴ Dan me se quisıj va'nıj nari' tuvi' Jesucristó ga nij síı tucu'yón se-nana so' gaa cunuu i'na' uún so' a.

¹⁵ Dan me se gaa quisıj chá ruvá nij so', ne xná'anj Jesucristó man Simón Pedró, cataj so':

—Cunó so' ca'mıj, Simón ta'nıı Jonás. Doj a 'ee rá so' manj rihaan nij síı nihánj na' —taj Jesucristó, xná'anj so' man Pedró a.

—Ne'en ma'án so' se vaa 'ee raj mán so', Señor —taj Pedró rihaan Jesucristó a.

—Ve'é rque so' cha daán 'unj matzinj á —taj Jesucristó ni'yaj Jesucristó nu' nij síi noco' man so' a.

¹⁶ Gaa ne xná'anj uún Jesucristó man Pedró, cataj so':

—Cunó so' ca'mij, Simón ta'níi Jonás. 'Ee rá so' manj na' —taj uún Jesucristó rihaan Pedró a.

—Ne'en ma'án so' se vaa 'ee raj mán so', Señor —taj uún Pedró rihaan Jesucristó a.

—Ve'é tumé so' man daán 'unj matzinj á —taj uún Jesucristó, ni'yaj so' nu' nij síi noco' man so' a.

¹⁷ Gaa ne cataj uún Jesucristó rihaan Pedró:

—Cunó so' ca'mij, Simón ta'níi Jonás. 'Ee rá so' manj na' —taj uún Jesucristó, ne veé danj quisij va'nuj xná'anj so' danj man Pedró a.

Dan me se quinanó rá Pedró che'é se quisij va'nuj xná'anj Jesucristó danj man so' a. Gaa ne cataj uún so' rihaan Jesucristó a:

—Ne'én so' cunudanj, Señor. Ma'án so' ne'en se vaa 'ee raj mán so' ei —taj Pedró rihaan Jesucristó a.

—Ve'é rque so' cha daán 'unj matzinj á. ¹⁸ Cuanō nihánj me se cataj yá yá 'unj rihaan so' se vaa gaa mé so' síi tachruu, ne numij ma'án so' yatzij catuún so', ne chéé so' me rej me ma'an guun rá so', tzaj ne asa' guun chij so', ne ticún so' ra'á so', ne yo'ó so' numij catuún so', ne nicaj so' mán so' ca'anj so' me rej me ma'an rá so' ca'anj so', ne nda' se na'vej rá so' ca'anj so', tzaj ne vaj so' ei —taj Jesucristó rihaan Pedró a.

¹⁹ Ne nana cataj Jesucristó rihaan Pedró, tzaj ne nana yo' taj xna'anj se vaa ticavi' nii man so', ne ca'mii sa' yuvii che'é Diosē, qui'yaj so' a.

Gaa ne cataj uún Jesucristó rihaan Pedró a:

—Yo'ō canocó' so' manj ei —taj Jesucristó rihaan so' a.

²⁰ Gaa ne canicaj Pedró, ne quene'en so' man yo'ó sí tucu'yón se-nana Jesucristó sí 'ee rá Jesucristó man a. So' ro', me sí cayáán rej x'nuj Jesucristó gaa chá xti'no nij so' gaa rque, ne so' me sí xná'anj man Jesucristó me sí tacuachén man Jesucristó rihaan nij sí taj ri'yunj man Jesucristó gaa chá xti'no nij so' gaa rque a. ²¹ Dan me se gaa quene'en Pedró man sí 'ee rá Jesucristó man yo', ne xná'anj so' man Jesucristó, cataj so':

—Daj quiran' sí nihánj ga, Señor' —taj so' rihaan Jesucristó a.

²² Gaa ne cataj Jesucristó rihaan so' a:

—Ne sese me rá 'unj yo'ó gaa i'na' so' rihaan chumij ndaa se ca'na' uún 'unj rihaan chumij nihánj, ne nuveé se-suun ma'án so' me yo' ma'. Yo'ó canoco' ma'án so' manj ei —taj Jesucristó rihaan Pedró a.

²³ Che'é dan cha'nuu nana nihánj sca'núj nij tinuj nij so', ne guun rá nij so' se vaa daj chihaa mij se cavi' sí tucu'yón se-nana Jesucristó yo' a. Tzaj ne ne cataj Jesucristó se vaa ya ya se cavi' so' ma'. Maan se cataj uun so' nana: “Sese me rá 'unj yo'ó gaa i'na' so' rihaan chumij ndaa se ca'na' uún 'unj rihaan chumij nihánj”, me nana ca'mii Jesucristó a.

²⁴ Dan me se sí tucu'yón se-nana Jesucristó nihánj me se so' me sí cataj xna'anj che'é nu' rasuun no' rihaan yanj nihánj, ne so' me sí cachrón nana rihaan yanj che'é rasuun nihánj, ne ne'en núj se vaa ya uxrá nu' vaa nana cataj xna'anj so' ei. ²⁵ Ne vaa que'ee doj rasuun qui'yaj uún Jesucristó, tzaj ne sese cachrón nii nu' nana che'é 'o 'o nij rasuun rihaan yanj nihánj, ne se quisij chumij nihánj cumán cunudanj nij yanj libró yo' rihaan chumij nihánj, rá 'unj a ma'.

Se-nānā Diosē nanā sā' me rá catūū nimán n' a
New Testament in Triqui, Copala (MX:trc:Triqui, Copala)

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Triqui, Copala

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 14 Jun 2022 from source files dated 1 Jun 2022

3a8f2838-fe9f-5490-8d78-a7bbfdab871